

Diika' ben postlka'

Bcheb Jesúza' wselee Espíritu Sántona'

1 ¹Teófilo, lee libr necha' bzej', na' bzej' yog' dii wenka' ben Jesúza' na' diika' bli' bsedile' dezd ka wzoloe' ²axt ka bllin lla biyep'e' yabana'. Na' ka zi' yizee, bzajniile' postlka' wleje' daa goll Espíritu Sántona'ne' kwenche gongake' llinna' daa bene' lall' na'gake'. ³Na' ka wde wite' na' bibane' ladj ben' wetka', jali'lawe' legake' na' dii zan dii bene' kwenche inezgakile' nan mbankzen'. Na' lo choa lla jali'lawe' legake', na' bzajniile' legake' che yel' wñabia' che Chioza'.

⁴Na' shlak wzoalen Jesúza' postlka', golle' legake':

—Bi illeshle Jerusalénni. Li kwez gak ka bcheb Xacho Chioza' gone', kon ka ba wniakz'. ⁵Dii li Juanna' bchoe' ben' nisa', per le', aga chllach yidsoa Espíritu Sántona' loo yichjall'do'lena'.

Biyep Jesúza' yabana'

⁶Na' ben'ka' ndop nllag kwit Jesúza', wñabgakile'ne':

—Xan', ¿awibejo' cho' ben' Israel lo ni'a na' ben' zit'ka' naa kwenche inabi'o neto'?

⁷Na' Jesúza' golle' legake':

—Bi chidol'le inezile bi lla bi gor gon Xacho Chioza' daa gone', la' toze' len' chñabi'e na' ba bllie' bia' batan gone'n. ⁸Na' ka yidsoa Espíritu Sántona' loo yichjall'do'lena' na' gone' le' yel' wak, na' we'le xtillaana' yell Jerusalénna', na' doxen gani mbani Judeani na' lekzka' gana' mbani Samáriana', na' doxen zbii zkaan yell-lioni.

⁹Na' ka biyoll golle' ka', wzolo biyep'e' yabana' chwiata ben'ka', na' wze to bej bkwashaan le' na' bich ble'gakile'ne'. ¹⁰Na' ka lle'gake' chwiagake' yabana' gana' biyep Jesúza', lii bllinte chop anjl kwite'ka', na' zoagake' do xtil. ¹¹Na' gollgake':

—Le' ben' Galilea, ¿berache chwiazle yabana'? Kwin Jesúza', beena' ble'ile bichej ladjleni na' biyep'e' yabana', kakzan ile'ilene' yiyede'.

Wlejgake' Matíaza' bizoe' lo laz Juda'

12 Na'ch biyetjgake' lo Yaa Olívoza' ziyajgake' Jerusalénna'. Nakan gaozə, ka to daa nllia ley che'ka' bia' koogake' nez llana' chombaangake'. 13 Na' ka billingake' Jerusalénna', biyepgake' yoona' llia shkwiana' cha'lə gana' zoagake'. Na' ben'kin billin: Pédrona', Jacóbona', Juanna', Andréza', Felípena', Tomáza', Bartoloména', Matewa', Jacóbona' xiin Alfewa', Simón, beena' che'gake' Zelote, na' Judas ben' bish' Jacóbona'.^a 14 Yog' ben'ki chdopgake' yog' lla kon ben'ka' nak ben' bish' Jesúza' kwenche choe'lwillgake' Chioza', na' len Maríana' xna Jesúza' na' zi' bal noolka'.

15 Na' llaka' wzoagake' na', Pédrona' wzie' ladj ben'ka' chonlilall'gake' Jesucrístona', nakgake' ka do to guiyoa galjə, na' golle' legake':

16—Le' ben' bish', benan byen billinin ka goll Espíritu Sántona' dii Davina' na' bzeje'n lee Cho'a Xtill' Chioza'. Bi'e dill' nakan gon Juda', beena' bchi'e ben'ka' bex'gake' Jesúza'. 17 Juda' goke' neto' txen naknto' postl, na' lenen' nan gone' neto' txen dga ngoo lo na'nto' chonnto'. 18 Na' mecha' daa bexee che dii mala' daa bene', lennan' biziile' to yell-lío gana' bxope' de gozyichjlə na' goshj li'ena' na' bchej yog' xjloe'na'. 19 Na' ka wnezi ben' Jerusalénka' ka gok che Juda', na' bsi'gake' yell-liona' daa bizi'e Acéldama de xtill'gake', na' zejín Yell-lío Chen. 20 La' lee libr che Sálmoka' nan:

Yidesh yiloashga lill xlatje'na',
na' ni sto kochno soan.

Na' lekzka' nan:

Ben' yoblə yiyakshga lo nee daa nan gok lo nee gone'.

21 'Na' chonan byen kwejcho to ben'ki bengake' cho' txen toshiizi kana' wzoalen Xancho Jesúza' cho', 22 ben'ki nakgake' cho' txen dezd ka bchoa Juanna' Jesúza' nisa' ax̄t ka biyep'e'

^a 1:13 Ben' bish' Jacóbona': ben'ka' nsed nagake' chiyal' inan xiin Jacóbona'.

yabana', kwenche gone' cho' txen we'cho dill' nakan gok biban Jesúza' ladj ben' wetka'.

23Na'ch wlejgake' chope': toe' le Matías, na' sto ben' yoo shonə leyin, José, Barsabás, na'ch Justo. 24Na' be'lwilgake' Chioza', che'gake':

—Chios, ben' nak Xannto', li' nombi'o yichjlall'do' yog' ben'. Bliyi neto' no ben'ki chop ba wlejo' 25kwenche gake' neto' txen naknto' postl, la' Juda' ba bnite' daa ndolee yel' wen dii mal che'na' na' ziyaje' latja' gana' chidolee.

26Na'ch bengake' to wyitj kwenche wnezgakile' noran ba wlej Chioza', na' bidol' Matíaza', na' wlene' postlka' shnej.

Ka bid Espíritu Sántona'

2 1Na' ka bllin lla gol' lni Pentecostéza', yog' ben'ka' chonlilall'gake' Jesúza' tozga ndop nllaggake'. 2Na' tokonganzi bengakile' to sshag ka ga za' to be' wal, za'n yabalə na' wnin doxen loo yoonə' gana' lle'gake'. 3Na'ch ble'gakile' dii nak ka bel' yi' chal'ninan, na' yog'ze' zen yichje'ka'. 4Na' Espíritu Santo che Chioza' wyo'e loo yichjlall'do' to toe', na' wzologake' wnegake' wde wdeli dill', kon ka goklall' Espíritu Sántona' ine to toe'.

5Na' lo llana' ben' zan ben' Israelka' lle' Jerusalénna' choe'la'ogake' Chioza', no ben' zaak wde wdeli yell dii lle' yellioni. 6Na' ka bengakile' sshaga' daa chak, na' bdop bllaggake' gana' chak ka'. Na' gokllej gokgangakile' ka biyombia'gake' xtillleeka' daa chne ben'ka' lle' na'. 7Na' le chibangakile', na' che' ljwelle':

—¿Aaga ben' Galilea yog' ben'ki choe' dill'ki? 8¿Nakra chak chakzgake' dill'ka' chne to tocho, lla? 9La' ni zoa ben' Partia, ben' Media, ben' Elam, ben' Mesopotamia, ben' Judea, ben' Capadocia, ben' Ponto, ben' Asia, 10ben' Frigia na' Panfilia, ben' Egipto na' zi bal'e ben' África, ben' zaak gaozə yell Ciréna', na' lezkka' len ben' za' Rómana'te. Balcho nakcho ben' Israel, na' zi balcho choncho ben' Israelki txen. 11Na' lezkka' zoa ben' Creta na' ben' Arabia. Na' yog'techo chenicho chne ben'ki xtill' to tocho, choe'gake' dill' che dii wenka' ba ben Chioza', diika' chonan ka yibanicho.

12Na' yog' beṅ'ka' bdop bllag na', bibangakile' na' gokklej gokgāngakile'. Na' che' ljwellgake':

—¿Bi zejín dga, lla?

13Na' bale' wnelegakile' legake', nagake':

—Zolli beṅ'kin.

Daa goll Pédróna' beṅ'ka' bdop bllag

14Na'ch Pédróna' wzechaile' len postlka' zi shnej, na' wñie' zillj chi'e beṅ'ka' ndop nllag na':

—Le' beṅ' Israel na' yog'le le' zoale Jerusalénni, cheenid' wzajniid' le' bi zeji dga chak, li wzenagyen' dga inia' le'. 15Beṅ'ki nak' txen aga zollgakilen' ka chza'lall'zle, la' shzilgaz naa. 16Dga chak ki naa, chillinin daa wna dii Joela', beena' bzej daa goll Chioza'ne' kani'yi, na' wne':

17Kat' ba zoa illin lla te che yell-lioni,

na'd Chios wi'a Espíritu cha'na' soe' loo yichjall'do' beṅ'ka' lle' zbii zkaan yell-lioni.

Na' gon' kwenche xiinleka', ka bi' byo na' ka bi' noolə, chixje'gakb' daa yep'gakb'.

Na' bi' wew'ka' ile'do'gakib', na' beṅ' golka' inegakile' yel.

18Na' ka'kzə wi'a Espíritu cha'na' yog' beṅ'ka'

choe'la'ogake' nad' llana' gak ka', ka beṅ' byo ka noolə,

na' we'gake' dill'ka' wxo'a' cho'a' lolleeka'.

19Na' xan yabana' wli'a dii gonan ka yibani beṅ',

na' ka'kzə lo yell-lioni

wli'gakidee chen, na' yi', na' llen.

20Wbilla' bich wzeeni'n,

na' bewaa yiyakan xna' ka chen

ka zi' illin lla choo lla xen che Xanchona'.

21Na' nottez beṅ' inabile' Xancho Chioza' gaklene'ne', na'

yisle'ne' kwenche bi kwiajee.

22'Na' le' nakle beṅ' Israel, li wzenag dga inia' le'. Nezkzile Chioza' wleje' Jesús, beṅ' Nazareta', daa bi'ene' yel' wñabia'na' kwenche bidyene' ladjleni dii zan yel' wak choo yel' wak xen na' bichlə dii benan ka bibani beṅ'. 23Na' beeni goke' lall' na'le

kon ka bliia Chioza' bia' gak che', na' béx'lene' bénlene' lo na' ben' malka' kwenche betgake'ne' lee yag cruza'. ²⁴Per Chioza' bisbane'ne' ladj ben' wetka', na' bi bi'e latj guete' toshiizi, daa bi gok inabia' yel' wita' le'. ²⁵Dii Davina' bi'e dill' che Jesúza' kani'yi, ka wne':

Chle'id' Xan'na' toshiizi.

Na' daa zoe' kwitii sh_laa de sh_lini kono gak bi goni nad'.

²⁶Daan le chibayi lall'dawaani na' cho'a dill' ka mbalaz zoa'.

Na' beli chen cha'ni nonan lez yibanan,

²⁷la' aga wsanlalloo nad' toshiizi ladj ben' wetka', ni bi wi'o latj gooll' iteb beli chen cha'ni daa nak' lall' no'.

²⁸Ba bliilo' nad' nakan nak neza' sho'a kwenche gat'ch yel' mban cha',

na' yiba yizakid' daa soalen' li' toshiizi.

²⁹Le' ben' bish', nezczicho dii xozxto'cho Davina' wite' na' bkwash'gake'ne', na' ni nakbia'te naa gana' bkwash'gake'ne'. ³⁰Na' dii Davina' bi'e dill' diika' goll Chioza' le', na' wnezile' kwinq Chioza' bchebe' wzoe' to xiinq dia' che' inabi'e. ³¹Chioza' bliile' dii Davina' diika' zi' gak che Crístona', na' bi'e dill' yibane' ladj ben' wetka' ka wne' aga wigaane' ladj ben' wetka' na' ni bi gooll' iteb beli chen che'na'. ³²Na' ka' gok, Chioza' bisbane' Jesúza' ladj ben' wetka', na' yog'nto' ble'into'ne' na' choe'nto' dill' bibane'. ³³Na' ka biyoll bigoyoe'ne' yabana' na' wlekwe'ne' kwite' de sh_lina', bene' lo nee bselee Espíritu Sántona' ladjnto'ni ka bchebe'. Na' Espíritu Sántona' ba bene' yog' dga ba ben ble'ile naa. ³⁴Bi gakile dii Davinan' biyep'e yabana', la' kwine', wne':

Xancho Chioza' golle' Xan'na':

“Wche' kwit' de sh_li ni

³⁵shlak wzoa' xni'ona' ben'ka' chakzbani li'.”

³⁶Na' nia' le', yog'cho cho' ben' Israel chiya' inezicho, Jesúza', beena' betle lee yag cruza', Chioza' bzoe'ne' nake' Xancho, na' len' Crístona', beena' wlej Chioza' inabi'e cho'.

³⁷Na' ben'ka' lle' na' ka bengakile' goll Pédrona' legake' ka', le nyesh'chga gokgakile', na' wñabgakile' Pédrona' na' postlka' sto, che'gake':

—Le' beṅ' bish', ¿beran chiyal' gonnto' shka'?

38 Na'ch Pédrona' chi'e legake':

—To tole, li yiyaj yileni na' li čhoa nisa' shi ba chonlilall'le Jesucrístona', na' yiyakxen xtol'leka' na' yidsoa Espíritu Sántona' loo yichjlall'do'lena'. 39 Chioza' ba bchebe' gone' le Espíritu che'na', na' len xiinleka', na' nottez beṅ' zit'. La' nchebe' wi'ene' yog' beṅ' gaxe' kwenche gonlilall'gake'ne'.

40 Na' dii zanch dill' be'len Pédrona' legake', got'yoile' legake', chi'e:

—Li yisla kwinle lao yel' zi'na' daa ile'i beṅ' wen dii malka' bi chajle' che Chioza'.

41 Na' beṅ'ka' wyajle' daa goll Pédrona' wchoagake' nisa'; na' lo llana' shona mil beṅ'ka' wlengake' beṅ'ka' nonlilall' Jesúza'.

Ka ben beṅ'ka' benlilall' Jesucrístona' dii nech

42 Na' yog'gake' wzegake' wneyi bengake' diika' bli' bsemi postlka' legake', na' xochi wzoagake'. Na' bdop bllaggake' be'lwillgake' Chioza' na' weej wdaogake' txen. 43 Na' yog'ze' bibani daa ble'gakile' yel' wak zanka' ben postlka'. 44 Na' yog' beṅ'ka' chonlilall'gake' Jesúza' gokgake' toz, na' choe' ljwelle' bi ka dii chyallji to toe'. 45 Na' biyit' bidegake' no yell-lio, no yoo chegake' wa bichlō dii napgake' na' choe' ljwellgake' ka to dii chyallji to toe'. 46 Na' yog' lla bdopgake' lesh' chyoodo'na' choe'lwillgake' Chioza', na' lezkza' bibagakile' weej wdaogake' txen lill ljwellgake'. 47 Na' wzoatezi wzoagake' be'la'ogake' Chioza' na' yog'zə beṅ' gokbe'gakile' ka mba chongake'. Na' yog' lla, Xancho Chioza' bene' ka wyanch beṅ'ka' benlilall' Jesucrístona'.

Biyaki to beṅ' bi chak sa'

3 1 To lla do ka chida shonə shlle'na', ka gora' chdop chllag beṅ' Israelka' choe'lwillgake' Chioza', Pédrona' len Juanna' wyajgake' yoodo'na'. 2 Na' cho'a puert che zeena' daa nechj yoodo'na', puert daa nsi'gake' Puert Xochi, chi' to beṅ' nxinj n'ena' ka goljtie'. Na' yog' lla chjlekgake'ne' na' kwenche chṅabe' karidá lao beṅ'ka' chdop chllag yoodo'na'. 3 Na' ka bllin Pédrona' na' Juanna' gana' chi'e, na' wṅabile' legake' izangakile' lat'

mech we'gake'ne'. ⁴Na'ch Pédróna' len Juanna' bwiagake'ne', na' Pédróna' golle'ne':

—Bwiakachi neto'.

⁵Na' beena' bwie' legake', gokile' mechan' we'gake'ne'. ⁶Na' Pédróna' chi'ene':

—Bibi mech nap' gon' li', lete dii nap' gon' li'. Kon ye'l' wak che Jesucristo, ben' Nazareta', nia' li' bizolla' na' bigoo nez.

⁷Na'ch Pédróna' wdoyoe' nee de sh_lina' na' bisolléene', na' lii biyakteyi n_i'ena'. ⁸Na'ch ka ben' bxit'zə bene' bizollee. Na' wyoolene' legake' lesh' chyoodo'na' chechj chde' na' chxit'sheshe' choe'lawee Chioza'. ⁹Na' yog' ben'ka' lle' na' ble'gakile'ne' chde' choe'lawee Chioza', ¹⁰na' billej bibangakile' daa nombia'gake'ne' chbi'e ch_nabe' karidá cho'a puert daa nsi'gake' Puert Xochi.

Bzajinii Pédróna' ben'ka' ndop nllag lesh' chyoodo'na'

¹¹Na' beena' biyaki n_i'ena' aga bsane' Pédróna' len Juanna', kon noe' legake'. Na' yog' ben'ka' lle' lesh' chyoodo'na' chillej chibangakile' na' wyajdogake' gana' zoa koridor daa le Koridor Che dii Salomón gana' zelengake' beena' biyaki. ¹²Na' ka ble'i Pédróna' ben'ka' chdop chllag na', golle' legake':

—Le' ben' Israel, ¿bera_çhe chibanzile daa biyaki beeni? ¿Na' bera_çhe chwiazle neto'? ¿Achakile kon ye'l' wak chento'nan' biyaki beeni? ¿Awa chakile daa zoanto' chonnto' ka chiyoolallii Chiozan' biyakile'? Aga daan. ¹³Chios, beena' be'la'o dii Abrahama', dii Isaaca', dii Jacoba', na' nochlə dii xozto'choka', len' wlo'e Xiine' Jesúza' balaan_n xenna', beena' benle lo na' ben'ka' betgake'ne'. Na' ka goklall' Pilátóna' yisane'ne', bi be'le latj. ¹⁴Lwaa dii nan in_able yisane' Jesúza', beena' nak liizelozi ben' li ben' shao', ben' wen xyana'lə wn_able bisane'. ¹⁵Kan' benle betle Jesúza', beena' chon' ye'l' mban daa nak dowalj. Per Chioza' bisbane'ne' ladj ben' wetka', na' neto' choe'nto' dill' daa nezinto' bibane'. ¹⁶Daa chon'lilall'nto' Jesúzan', ba biyaki beeni chwiale na' nombia'le. Dii li, daa non_ililall'nto' Jesúzan' chwiatele ba biyakchaile'.

¹⁷'Le' ben' bish', nezid', ka le' na' ka ben'ka' ch_nabia' le', bi gokbe'ile bin benle ka betle Jesúza'. ¹⁸Na' Chioza' bi'e latj gok ka' kwen_çhe billinin ka wna dii ben'ka' wdixjee xtilleena'

kani'yi, daa wnagake' Crístona' biya dii w̄chi' wsak' beṅ' le'.
 19Na' naa, li wzenag che Xancho Chioza', na' li yiyaj yileni dii malka' chonle kwenche yizi'xene' chele na' wzoe' le' mbalaz.
 20Na' yiselee Crístona', beena' wleje' kwenche inabi'e, kon ka wdixjee dii beṅ'ka' kani'yi. 21Chonan byen yigaane' yabana' axt ka illin lla yiyonshao' Chioza' yog'lolte dii de, kon ka goll Chioza' dii beṅ'ka' wleje' wdixje'gake' cho'a xtilleena' kani'yi.
 22La' dii Moiséza' golle' dii xoxxto'choka' dill'ki: “Xancho Chioza' kweje' sto beṅ' ka nad' ladjleni, beṅ' chixje'ile' le' bi dill' we'lene'ne'. Na' li wzenag yog' daa ine'. 23Na' beena' bi wzenag che', Chioza' kwej yichje'ne' na' bich gak gone' txen beṅ'ka' nak yell che Chioza'.”

24Na' yog'lol dii beṅ'ka' wdixjee daa goll Chioza' legake' kani'yi, wzolozan kon dii Samuela', wdixje'gake' gak diiki chak naa. 25Len', naki chele daa ba b̄heb Chioza' lao dii beṅ'ka' wdixjee daa golle' legake' kani'yi. Na' lekzka' naki chele dii wenna' daa b̄heb Chioza' gone' che dii xoxxto'cho Abrahama', ka golle'ne': “Ni che xiin dia cho'na' gon' dii wen che yog'lol beṅ' lle' zbii zkaan yell-lioni.” 26Na' ka bse! Chioza' Xiine' Jesúsza', zigaate bseleene' ladjchoni kwenche gak wen checho na' to tocho yiyaj yilenicho dii malka' choncho.

**Pédrona' len Juanna' gokgake' lo na'
 beṅ'ka' ch̄nabia' beṅ' Israelka'**

4 1Na' ni choe'lente Pédróna' len Juanna' beṅ'ka' dill' ka bllin b̄xozka' len beena' ngoo lo nee beṅ'ka' chap yoodo'na' na' len zi ba! saduceoka'. 2Le chllaagake' daa chli' chsedi Pédróna' len Juanna' beṅ'ka' lle' na' nakan gok biban Jesúsza' ladj beṅ' wetka'. 3Na'ch beṅ'gake' legake', na' daa ba wlle', jloogake' legake' lillyana', axt betiyoch bibejgake' legake'. 4Per beṅ' zan beṅ'ka' bzenaggake' dillaa be' Pédróna' len Juanna' beṅ'ilall'gake' Jesúsza'. Na' ka', wyanch beṅ'ka' beṅ'ilall'gake'ne', na' gokgake' ka do gayaa mil to beṅ' byoka'zə.

5Na' betiyo bidop billag beṅ'ka' ch̄nabia' beṅ' Israelka' yell Jerusalénna', len beṅ' golka' ch̄nabia', na' beṅ'ka' chli' chsedi leya'. 6Na' lekzka' len Anáza', beena' nak b̄xoz choo b̄xoz xen, na' Caifáza', Juanna', Alejándrona', na' nokchlə beṅ'ka' nak dialla

che b̄xoz choo b̄xoz xenna'. 7Na'ch b̄zegake' Pédrona' len Juanna' gchole'ka', na' w̄nabgakile' legake':

—¿No lsens cheyi na' no bse! le' chonle diiki?

8Na' Espiritu Santo che Chioza' bzajniile' Pédrona' kwenche golle' legake' ki:

—Le' ben' w̄nabia', na' le' ben' gol ch̄nabia'le yell Israeli, 9ch̄nabile neto' ka nak dii wenna' gok che beeni, na' cheenile inezile nakan gok biyakile'. 10Cheeninto' yog'lo!-le inezile na' yog'lo! ben' Israelka' inezgakile', beeni chwiale ze laoleni biyakile' kon yel' wak che Jesucristo, ben' Nazareta', beena' betle lee yag cruza', per Chioza' bisbane'ne' ladj ben' wetka'. 11Che Jesúsán' choe'n dill' daa nan “yaja' daa bi wyoolall'le le' nakle wen yoo, leyen'lannan' yaja' daa ba nchejcha yooná'.” 12Bichga zoa sto ben' yoblə gak yisle' cho' kwenche bi kwiayi'cho. La' kochno zoa doxen yell-lioni ben' ba wlej Chioza' kwenche yisle' cho'.

13Le bibani ben' w̄nabia'ka' daa chwiagake' bi blleb Pédrona' len Juanna' choe'gake' dillaa lawe'ka', la' nakbia' aga bi nsedgake' na' aga no nakgake'. Na' gokbe'gakile' daa wdalengake' Jesúsán' txenan chongake' ka'. 14Na' daa ze beena' biyaki ni'ena' kwite'ka', bibi gok ye'gake' legake'. 15Na'ch bibejgake' legake' shlak be'len ljjwellgake' dill' nak koogake' x̄nezin. 16Che' ljjwelle':

—¿Nakra goncho che ben'ki? La' yog'zə ben' zoa Jerusalénni inezgakile' ba bengake' to yel' wak xen, na' aga wak inacho bi nakan ka'. 17Na' kwenche bich ides dill'ka' choe'gake', chiya! kooshebchogake' kwenche kochno we'lengake' dill' che Jesúsán'.

18Na'ch goxgake' Pédrona' len Juanna' dii yoblə, na' gollgake' legake' bich wli' wsedgakile' ben' ni bi we'lengake' legake' xtill' Jesúsán'. 19Na' Pédrona' len Juanna' che'gake':

—Li wwiayen'shki shi nakan wen lao Chioza' wzenagnto' chele lwaa dii wzenagnto' che'. 20Bi gak wsannto' we'nto' dill' daa ben ble'into' che Jesúsán'.

21Na'ch ben' w̄nabia'ka' biya dii gollgake' legake' kwenche nan illebgake', na'ch bisanchokləgake' legake', la' bibi billel-lall'gake' gongake' daa yog'zə ben' choe'la'ogake' Chioza' ni che daa gok. 22Na' beena' biyaki ni'ena' kon yel' wak che Jesúsán' ba wdeile' choa yiz.

Wñabgakile' Chioza' gaklene' legake' we'gake' xtilleena'

23 Na' ka bisangake' Pédrona' len Juanna', biyajgake' gana' zoa beñ'ka' nonlengake' txen na' gollgake' legake' yog' daa goll b̄xozka' chñabia' na' beñ' golka' chñabia'. 24 Na' ka bengakile' daa gollgake' legake', na'ch gokgake' toz be'lwillgake' Chioza', che'gake':


—Chios, li' nako' beñ' zeelo chñabia'. Li' beno' yabana', yell-lioni, na' niso'na', na' yog'te dii de lo yell-lioni. 25 Na' Espíritu Santo cho'na' b̄xo'e' dill'ki cho'a loll' dii Davina' kana' wne':

¿Berache chllaa chlokz beñ' yell-lioki?

¿Berache toshiizi chgoo beñ'ki xnezin gongake' daa bi nxe bi nzak'?

26 Beñ'ka' chñabia' lo yell-lioni gokgake' toz gokzbangakile' na' biniatezgake' Xancho Chioza' len Crístona', beena' wleje' kwenche inabi'e.

27 'Dii li yell Jerusalénni Heródeza' na' Poncio Pilátona', len beñ' zit'ka' na' beñ' Israelka', bdop bllaggake' gokgake' toz goklall'gake' wlliaiyi'gake' Jesúsza', beena' nak liizelozi beñ' li beñ' shao', beena' wlejo' kwenche inabi'e. 28 Na' daa bengake' ka', gok ka bllio' bia'. 29 Na' ñaa Chios, bwia ka ngoosheb beñ'



Ki nak yell Jerusalénna' kana' wda Jesúsza'n.

wṇabia'ka' neto', na' goklen neto' naknto' wen llin ḥo', kwenḥe we'chnto' cho'a xtilloona' na' bi gall illebnto'. ³⁰Bli' yel' wak ḥo'na' kwenḥe yiyaki ben' bi shao' na' kwenḥe gonnto' bichlə dii yibani ben' kon yel' wak ḥe Xiino' Jesúza', beena' nak liizelozi ben' li ben' shao'.

³¹Na' ka biyoll be'lwillgake' Chioza', wxo' wṇib latja' gana' ndop nllaggake', na' wṇabia'chga Espíritu Sántona' legake' na' bi bllebgage' we'gake' cho'a xtil' Chioza'.

Daa de ḥe to toe' benin ḥe yoguee

³²Na' yog' ben'ka' ba chonlilall' Jesúza', toz ka gok yichjlall'do'eka'. Na' yog' daa de ḥe to toe', benin ḥe yoguee. Ni toe' bi wna: “Ḥa' dga.” ³³Na' postlka', kon yel' wak xen ḥe Chioza', be'chgake' dill' ḥe Xancho Jesúza' daa bibane' ladj ben' wetka', na' Chioza' dii xen goklene' yog'ləle'. ³⁴Na' ni toe' bibi byallji, la' beena' de yell-lio ḥe' wa lille' na' chiyiteen, na' mecha' daa choxee cheyin ³⁵cho'en postlka' kwenḥe choe'gake' kon ka'k' wej chyallji to toe'. ³⁶Na' wzoa to ben' Chipre lie' José. Nake' dia ḥe dii Levína', na' postlka' bsi'gake'ne' Bernabé, na' zejín witip lall' ben'. ³⁷Na' Joséni biyitee to yell-lio dii nape', na' mecha' bi'en postlka'.

Ananíaza' na' Safírana' wxiye'gake'

5 ¹Na' wzoa to ben' wlie' Ananías, na' xoole'na' wlie' Safira, na' biyit'gake' shkwe' yell-lio ḥe'ka'. ²Na' Ananíaza' len xoole'na' gokgake' toz bkwaangake' lat' mecha' na' bentezgage' ka be' doxenan postlka'. ³Na'ch Pédrona' golle'ne':

—Ananías, ḡberaḥe be'zo' latj wṇabia' Satanáza' yichjlall'do'na' na' chakilo' siyoo Espíritu Sántona' daa bgaanleno' lat' mecha' daa wdixjgake' ḥe yell-lio ḥo'na'? ⁴Ḥo' yell-liona' kana' zi' yiyitooon, na' ḥo' mecha' daa bexoo cheyin ka biyitooon. ḡBeraḥe wloolzə yichjlall'do'na' siyoo? Aga ben' yell-lionin chziyoo, san Chiozan' cheenilo' siyoo.

⁵Na'ch ka beni Ananíaza' daa goll Pédrona', to ka billeeze' wite'. Na' le blleb yog' ben'ka' wnezi ka gok ḥe'. ⁶Na' bllin to ḥop bi' wew' gana' chtoḷ Ananíaza', na' bitobgakbee to lech' na' jakwash'gakbee.

7Na' gok ka do shon gor ka bllin xoole'na', aga nezile' bin ba gok che ben' che'na'. 8Na' wñabi Pédróna'ne', chi'ene':

—Wnashki nad', ¿aka to nakz ben' cho'na'n biyit'le yell-lio chelena'?

Na' Safirana' chi'ene':

—Awe, ka't'kzan biyit'nto'n.

9Na'ch che' Pédróna'ne':

—¿Berache benzle toz dill' kon ben' cho'na' chakile wak siye'le Espíritu che Chioza'? Cho'a yooni ba ziza' bi'ka' jakwash'gakb' dii ben' cho'na', na' naa ljakwash'gakb' li'.

10Na' lii billeete Safirana' wite' lao Pédróna'. Na' ka biyoo bi' wew'ka' ble'gakib' ba wite', na'ch bibejgakbee na' jakwash'gakbee kwit dii ben' che'na'. 11Na' le blleb ben'ka' nonlilall' Jesucristóna' len yog' ben'ka' wnezi ka gok che dii Ananíaza' na' dii Safirana'.

Postlka' bengake' dii zan yel' wak

12Na' postlka' bengake' dii zan yel' wak na' bichlā dii chonan ka yibani ben' ladj ben'ka' lle' Jerusalénna'. Na' yog' ben'ka' chonlilall' Jesúsza' chdop chllaggake' loo koridor che yoodo'na' daa le Koridor che dii Salomón. 13Na' nochlā ben'ka' aga biyaxjgakile' gongake' legake' txen, la'kzi le ble'shiigakile' legake'. 14Na' ben' zan, ka noolā ka ben' byo, benlilall'gake' Xancho Jesúsza'. 15Na' chyixjgake' tnezka' ben'ka' bi shao', nxoagake' legake' no lo yagla' na' no lo daa, kwenche kat' te Pédróna' la'ch' bñen che'na' ten gana' degake' na' yiyakgakile'. 16Na' lezkza' zan ben' yellka' lliā gaozā Jerusalénna' chajgake' lao postlka' chjwa'gake' ben' che'i yillwe' na' ben' yoo dii xiw'ka'. Na' yog'lolzgakile' chiyaki.

Wloogake' postlka' lillyana'

17Na'ch bñoz choo bñoz xenna' na' saduceoka', ben'ka' nakgake'ne' txen, gokxee gokzbangakile' postlka'. 18Na'ch bex'gake' postlka' na' wloogake' legake' lillyana'. 19Na' wala' bllin to anjl che Xancho Chioza' bsalje' lillyana' na' bibeje' legake', na' golle':

20—Li yiyaj yoodo'na', na' li wzajniī ben'ka' chdop chllag na' doxen ka nak yel' mban zejli kañi daa we' Chioza' legake'.

21 Na'ch ka wyeeni', biyajgake' yoodo'na' ka goll anjla' legake', na' bli' bsedgakile' ben'ka'.

Na'ch b̄xoz choo b̄xoz xenna' na' ben'ka' nakgake'ne' txen bitopgake' yog'lōl ben'ka' ch̄n̄abia' yell Israela', na' bsel'gake' ben' kwenche nan lljxi'gake' postlka' de lillyana'. 22 Na' ka bllin ben'ka' chap yoodo'na' cho'a lillyana', kochno postlka' de na'. 23 Na'ch jayellgake' ben'ka' ch̄n̄abia':

—Nejchech lillyana', na' lle'te soldadka' cho'a puertka' chapgake'n, na' ka bsaljnto'n, ni to ben' bi yoo lo'inna'.

24 Na' beena' ngoo lo nee ben'ka' chap yoodo'na', len b̄xozka' ch̄n̄abia', ka bengakile' che'gake' ka', na' gokgakile' gate yiyoll yido dga. 25 Na' ni choe'tegake' dill', bllin to ben' chi'e legake':

—Ben'ka' wloole lillyana' lle'tgake' yoodo'na' chli' chsedgakile' ben'ka' lle' na'.

26 Na'ch wyaj ben'ka' chap yoodo'na' kon beena' ch̄n̄abia' legake' jaxi'gake' postlka' xochi. Bibi bengakile' legake' daa bllebake' shi ben'ka' chzenag chegake' wliagake' legake' yaj. 27 Na' ka billinlegake' postlka' lao ben'ka' ch̄n̄abia' yell Israela', na' b̄xoz choo b̄xoz xenna' chi'e legake':

28 —¿Abi chajle'kzlen nanto' le' bich wli' wsedzile ben' xtill' Jesús'a'? Na' li wwia ka ba benle, ba bli' bsedile yog' ben' Jerusalénki cho'a xtilleena', na' cheenile wtobile neto' daa betgake'ne'.

29 Na'ch Pédrona' len postlka' sto che'gake':

—Chonchan byen wzenagnto' che Chioza' aga ka che ben' yell-lioni. 30 Le' betle Jesús'a' na' bda'lene' lee yag cruza'. Na' Chios, beena' be'la'o dii xoxzto'choka', le' bisbane'ne' ladj ben' wetka'. 31 Na' Chioza' ba mbeke'ne' kwite' de shlina' gana' ba chi'e ch̄n̄abi'e, na' nzoe'ne' kwenche yisle' ben' lao dii mala', la' cheenile' yog' ben' Israelki yiyaj yileni dii malka' chongake' kwenche yizi'xen Chioza' chegake'. 32 Na' neto' choe'nto' dill' daa ble'into' gok che Jesús'a', na' daa betj Espíritu Sántona', beena' ba bzoa Chioza' loo yichjlall'do' yog' ben' chzenague' che', lekzka' chli'n nakan ka nannto'.

33 Na' ka beni ben' w̄n̄abia'ka' daa goll postlka', le bllaagake' na' goklall'gake' witgake' legake'. 34 Na' ladj ben'ka' ch̄n̄abia' len to fariseo, ben' le Gamaliel, ben' chli' chsedi leya', na' yog'z ben'

chle'shi'gakile'ne'. Na' wzollee, golle' legake' kwejgake' postlka' xtit chyoolə, ³⁵na' golle' ben' wñabia'ka':

—Le', ben' Israel, li wsak' shi bin gonile ben'ki. ³⁶Li lljadini kani batz bchej to ben' le Teudas, na' wne' nake' to ben' zakii, na' ka do tap guiyoa ben' bengake'ne' txen. Na' ka betgake'ne', yog' ben'ka' gokgake'ne' txen biyeslesgake', bich bi bengake'. ³⁷Na' ka wde gok ka', wizak dii yoblə kana' chlabgake' bal ben' lle' to to yell, na' bizchej Judas ben' Galileana', na' ka'kzə ben' zan bengake'ne' txen. Na' lekzka' betgake'ne' na' biyesles ben'ka' gokgake'ne' txen. ³⁸Na' naa, nia' le' bibi gonile ben'ki, la' ka nak dga chli' chsedgakile', shi nakan dii chyiljlall'zgake' winitlokzan. ³⁹Na' shi nakan che Chios, aga wak yisol yinitlen. Chiya! wwiayen'le kwenche bi gakkil-lenle Chioza'.

⁴⁰Na'ch betjgakile' daa goll Gamaliela' legake'. Na' bizgoogake' postlka', na' bet wdingake' legake', na' dii yoblə bllongake' kochno wli' wsedgakile' xtill' Jesúza'. Na' biyolla' bisangake' legake'. ⁴¹Na'ch bichej postlka' gana' ndop nllag ben'ka' chñabia', na' le chibagakile' daa be' Chioza' latj bchi' bsak' ben'ka' legake' daa choe'gake' xtill' Jesúza'. ⁴²Na' yog' lla postlka' bli' bsdgakile' xtill' Jesucristona' yoodo'na' na' lill ben'.

Wlejgake' gall ben' gak lall' nagake' mandadka'

6 ¹Na' ka zej chanch ben'ka' chonlilall' Jesúza', ben'ka' chne dill' griegona' wzolo che'gake' aga chaklebi ikaa noolə wizebka' chne dill' griegona' ka to daa chkaa nool wizebka' chne dill' hebrewa' kat' chyisgake' ye! wawa' yog' lla. ²Na'ch postlka' shllin bti'agake' yog' ben'ka' chonlilall' Jesúza', na' che'gake':

—Bi gak wsannto' chixje'nto' cho'a xtill' Chioza' kwenche kooz lo nanto' we'nto' dii yeej gao ben'. ³Na' le' ben' bish', li kwej gall ben' ladjeni, ben' chon wen, ben' chajni, na' chñabia' Espíritu Sántona' legake'. Na' gak lall' na'gake' chisgake' ye! wawa'. ⁴Na' neto' we'l-lall'chnto' we'lwillnto' Chioza' na' wli' wsedchinto' ben' cho'a xtilleena'.

⁵Na' yog'z ben'ka' biyoolall'gake' ka goll postlka', na' wlejgake' beena' le Esteban, nake' ben' nonlilall'chgue' Chioza' na' chñabia'

Espíritu Sántona' le'. Na' lezkka' wlejgake' Felípena', Prócorona', Nicanora', Timónna', Parménaza', na' Nicoláza', beñ' Antioquíana', beena' bene' txen beñ' Israelka'. 6Na' jwa'gake' legake' gana' lle' postlka', na' postlka' bxōa neeka' yichje'ka' na' wñabgakile' Chioza' gaklene' legake'.

7Na' beñ' zanch beni cho'a xtill' Chioza' na' wyanchga beñ'ka' beñlilall'gake' Jesúza' Jerusalénna', na' zan bxōzka' bzenaggake' na' beñlilall'gake' Jesúza'.

Bex'gake' Estébanna'

8Na' Estébanna', wzoalenchga ye'l' wak che Chioza' le', na' dii xen goklene'ne' kwenche bli'e ye'l' wakka' na' bichl̄o dii chonan ka yibani beñ'. 9Na'ch lle' shkwen beñ' Israelka' ba biyell bila' lo na' beñ'ka' wxi' legake', na' non chel̄ogake' chdop chllaggake' gana' choe'lwillgake' Chioza'. Na' gokgake' toz ba'l beñ' Cirene, beñ' Alejandría, beñ' Cilicia, na'ch beñ' zaak do Ásiana', gokdi-lengake' Estébanna'. 10Na' aga gokgake' ye'l' sin' che Estébanna', daa chñie' kon ka che' Espiritu che Chioza'ne'. 11Na' wdixjgake' ba'l beñ' kwenche wxiye'gake', che'gake': "Ba beninto' Estébanna' chñie' zban che dii Moiséza' na' che Chioza'." 12Na' daa gollgake' ka', bta bnegake' beñ' zan, len beñ' golka' chñabia' na' beñ'ka' chli' chsedi leya' kwenche bex'gake' Estébanna' na' jwa'gake'ne' lao beñ'ka' chñabia' beñ' Israelka'. 13Na' wdiljhgake' beñ'ka' wxiye', kwenche gollgake':

—Bi chsankz̄a beeni inie' che yoodo' che Chios chechona', na' che ley che'na'. 14Na' ba bizeninto' chizne' Jesús, beñ' Nazareta', yichinje' yoodo' chechona' na' yisha'tie' daa ba yoolocho choncho ka daa bli' bsemi dii Moiséza' cho'.

15Na' yog' beñ'ka' chi' chongake' ye'l' joschisa', ka bwiagake' Estébanna' na' ble'gakile' chey cheeni' cho'alawe'na' ka cho'alao anjl.

Estébanna' bi'e dill' lao beñ' wñabia'ka'

7 1Na'ch bxōz choo bxōz xenna' wñabile' Estébanna', chi'ene':
—¿Aleksi beñ'ki ka chono'n?

2Na' Estébanna' chi'e legake':

—Le' beñ' bish' na' le' nakle ka x̄anto', li wzenag dga inia'

le': Chios chechona', beena' liizelozi nak ben' choo ben' xen, bli'lawe' dii xoxzto'cho Abrahama' kana' zoe' yell-liona' mbani Mesopotámiana', kana' zi' shaje' yell Haránna'. ³Na' Chioza' golle'ne': "Bkwaan yell cho'ni na' dialla cho'ka', na' wyaj yell-lío gana' wliid' li'." ⁴Na'ch dii Abrahama' bcheje' gana' mbani ben' caldeoka' na' jsoe' yell Haránna'. Na'ch ka wde wit xe'na', Chioza' bizseleene' gani zoacho naa. ⁵Na' Chioza' bi bene' lo na' dii Abrahama' ni lat' yell-lioni de ni, san bchebe' wi'ene'n na' kat' guete' yigaanan lo na' xiin dia che'na', la'kzi aga non' bi' che dii Abrahama' ba zoa ka golle'ne' ka'. ⁶Na' lezkza' Chioza' chi'ene' xiin dia che'ka' soagake' yell zit' na' inabia' ben'ka' legake' wgongake' legake' llinna', na' wsak'zi'gake' legake' tap guiyoa yiz. ⁷Na' lezkza' Chioza' golle'ne': "Gon' ye!' zi' che ben'ka' wchi' wsak'gake' legake', na' yiyolla' yiza'gake' lall ben'ka' na' yiyedgake' ni, na' we'la'ogake' nad'." ⁸Na' ka bcheb Chioza' gone' dii wen che dii Abrahama', golle'ne' chiyal' sho'e senna' daa le circuncisión, le' na' xiin dia che'na'. Daan, dii Abrahama' wlo'e dii xiine' Isaaca' senna' ka gok xon' lla goljb', na' ka'kzə ben dii Isaaca' kon dii xiine' Jacoba', na' ka'kz ben dii Jacoba' kon dii xiine'ka' shllin, ben'ka' gok dii xoxzto'cho, cho' ben' Israel.

⁹Na' ben'ka' nak xiin dii Jacoba', gokxe'gakile' dii Joséna', beena' nak ben' bish'gake', na' bet'gake'ne' wxi' ben' Egíptoka'ne'. Per Chioza' wzoalene' dii Joséna', ¹⁰na'ch bisle'ne' lao yog'lol dii ben ble'ile'. Na' bi'ene' ye!' sin' kwenche faraónna', beena' chnabia' Egíptona', ble'shiile'ne' na' bzoe'ne' kwenche wñabia'lene' le' na' bene' lo nee yog' dii de che'.

¹¹Na' wzolo wche' wbinna', na' gokchga ye!' zi' ye!' yeshaa doxen gana' mbani Egíptona' na' gana' mbani Canaánna', na' bi got' dii yeej gao dii xoxzto'choka'. ¹²Na' ka wñezi dii Jacoba' de trígonal' Egíptona', na' bselee bi' che'ka', ben'ka' gok dii xoxzto'cho, jxi'gake'n. ¹³Na' ka wyajgake' de wchopi, dii Joséna' golle' legake' nan len' nake' ben' bish'gake', na'ch bembia' faraónna' dialla che dii Joséna'. ¹⁴Na'ch Joséna' biselee legake' kwenche jaxi'gake' xe', Jacoba', na' yog' xiin che'ka'. Na' yog'gake' nakgake' ka do guiyon shin'. ¹⁵Kan' gok jsoa dii Jacoba' Egíptona' gana' wite', na' lezkza' na' wit xiine'ka', ben'ka' gok dii xoxzto'cho. ¹⁶Na'

jakwash'gake' legake' loo bana' daa bizi' dii Abrahama' yell Siquema' che xiin beena' le Hamor.

17'Na' ka ba zoa gao gon Chioza' daa bchebe' gone' che dii Abrahama', ba wyanchga xiin dia che dii Israela', ben'ka' lle' Egíptona', ben' zan wal ba nakgake'. 18'Na'ch bllin lla wzolo wñabia' sto ben' yoblə yell Egíptona', ben' bi bembie' dii Joséna'. 19'Na' ben' wñabia'na' wxiyeen ben' wllall chechoka' na' biya dii bchi' bsakee dii xozxto'choka', na' bene' byen lljchoongake' bdo'do' che'ka' kwenche guetgakb'. 20'Na' kana'yen' golj dii Moiséza', nakchgab' xochido', na' shon beo'chga bisgol xaxna'baab' lille'ka'. 21'Na' ka bich gok kwkash'gake'b' lille'ka', benan byen jchoongake'b' kwenche nan guetb'. Na'ch noola' nak xiin faraónna' billelile'b' na' bikeeb' na' bisgole'b' ka xiine'. 22'Ka' gok bsed dii Moiséza' yog'lol yel' sin' che ben' Egíptoka' na' bi'e dill' zakii na' leyi bene' dii zakii.

23'Na' ka goki dii Moiséza' choa yiz, na' gokile' lljawie' ben' Israelka', ben'ka' nak ben' wllall che'. 24'Na' ka ble'ile' to ben' Egipto chchi' chsakee to ben' Israel, na' goklene' ben' Israela', bizi'e wzon che ben' Egíptona', bettie'ne'. 25'Na' goki dii Moiséza' ben' wllall che'ka' gakbe'gakile' nan Chioza' wchine' le' kwenche yisle' legake' lo na' ben' Egíptoka', per bi gokbe'gakile'. 26'Na' betiyo ble'ile' chop ben' wllall che', ben' Israel, chdiłgake'. Na' gokile' yizoe' legake' wen, na' chi'e legake': “¿Berache chdił-lenzə ljwell-le?, aga ne' ben' bishee til-lene?” 27'Na'ch beena' chit chiyine' ben' wllall che'na' blligee dii Moiséza' na' chi'ene': “¿No bzoa li' inabi'o neto' na' koo xnezi chento'ni? 28'¿Alezkza' cheenilo' wito' nad' ka beto' ben' Egíptona' daa neji?” 29'Na' daa goll beeni ka', dii Moiséza' bxonje' na' jsoe' gana' mbani Madiánna'. Na' la'kzi nake' ben' zit' ladj ben'ka', na' bgaane' na'z na' wzoa chop xiine'.

30'Ba gok choa yiz zoe' na', ka bli'lao to anjl le' to lo yag yesh' dii chal'niñ, zoan gana' bibi chashj chleb gaoz Yaa Sinaína'. 31'Na' le' bibani dii Moiséza' daa ble'ile' daa, na' wbiguee kwenche bwaiyenee kwaslol. Na'ch benile' shii Xancho Chioza', chi'ene': 32“Nadaan nak' Chios, beena' be'la'o dii xozxto'ka', Abrahama', Isaaca' na' Jacoba'.” Na'ch dii Moiséza' le' bllebe' axt chxiztite', na' aga biyaxjchile' wwie'. 33'Na'ch Xancho Chioza' golle' dii Moiséza': “Blechj xelo'na', la' nad' zoa' latji gani zio', na' aga ka

nla'z no se ni. 34Nad' ba ble'id' yel' zi'na' chle'i ben' Israelka' yell Egíptona', ben'ka' nak yell cha'. Ba benid' chonyesh'gake', na' ba bid' kwenche yisla' legake'. Na' li', chidoloo yiselaa Egíptona'."

35'Na' Chioza' bseleene' kwenche yisle' ben' wlall che'ka' lo na' ben' Egíptoka', na' inabiatie' legake', la'kzi bi bzenaggake' che' kana' wzoe' Egíptona'. Bengakile'ne' nakzi, na' gollgake'ne': "¿No bzoa li' inabi'o neto' na' koo xnezi chento'ni?" La'kzi gollgake' ka', Chioza' bseleene' ka bli'lao anjla' le' lo yag yeshaa daa goll'ni. 36Na' dii Moiséza' bene' zan yel' wak diika' ben ka bibani ben' Egíptoka' kana' bibeje' dii xozxto'choka' lalle'ka'. Na' bene' yel' wak loo nido'na' le Nido' Xna, na' lekzka' latja' gana' bibi chashj chleb gana' wdagake' choa yiz. 37Na' golle' dii xozxto'choka': "Xancho Chioza' kweje' sto ben' ka nad' ladjleni, ben' chixje'ile' le' dillaa daa we'lene'ne'." 38Na' dii Moiséza' wzoalene' dii xozxto'choka' latja' gana' bibi chashj chleb, na' len anjla', beena' bshaljlene'ne' lo yaa Sinaína', na' Chioza' be'lene'ne' dill' dii nsa'n yel' mban daa bikwaanlene' cho'.


39'Na' dii xozxto'choka' aga goongakile' wzenaggake' che dii Moiséza', bzoatezgake'ne' ka'lə na' goklall'gake' yiyajgake' Egíptona'. 40Na'ch gollgake' dii Aarónna': "Cheeninto' gono' to lwaa lsak' dii we'la'onto', kwenche yibialon laonto'ni. Ka nak Moiséza', beena' bibeje' cho' Egíptona', bi nezicho bi ba gok che'." 41Na'ch bengake' to lwaa lsak' me'do' na' bengake' lni cheyin, betgake' no bayix' kwenche be'la'ogake' daa beni ni'a neeka'. 42Na'ch Chioza' wlej yichje' legake' na' bi'e latj be'la'ogake' beljka' llia xan yabana'. Bengake' ka na lee libra' daa bzej dii ben'ka' wdixjee daa goll Chioza' legake' kani'yi, gana' nan:

Le', ben' Israel,

¿Achakile nadaan be'la'ole kana' betle bayix'ka' lo
choa yiza' wzoale latja' gana' bibi chashj chleb?

43Aga nadaan be'la'ole. Molocan' be'la'ole, benle to yoo
de lech' gana' be'la'olen ka chios chele,
na' be'la'ole belj che chios chele Refánna',
diika' ben'jilall'le.

Na' ni cheyi diikin kwej' le' lall-leni, na' wselaa le' zit'
walch aga ka yell Babilóniana'.



Na' shlak wzoa dii xoxzto'choka' latja' gana' bibi chashj chleb, bengake' to yoodo' de lech' dii gak yidob na' yiyoa'gake'n. Hch. 7:44a

44'Na' shlak wzoa dii xoxzto'choka' latja' gana' bibi chashj chleb, bengake' to yoodo' de lech' dii gak yidob na' yiyoa'gake'n. Na' bengake'n kon ka goll Chioza' dii Moiséza', na' kon ka bliile'ne'. Na' lo'inna' wlooshao'gake' yaj taaka' gana' nyoj ley che Chioza'. 45Dii xoxzto'choka' bigaanlengake' yoodo' de lechaa, na' bia'gake'n ka wyajlengake' dii Josuéna' jtıl-lengake' yellka' ben Chioza' lall' na'gake', na' bgaanan lallchoni axt ka bllin lla wñabia' dii Davina'. 46Na' Chioza', beena' be'la'o dii xoxzto'cho Jacoba', bibaile' ka ben dii Davina'. Na' Davina' wñabile'ne' wi'e latj gone' to lill xlatje'. 47Per Salomónna'lə, beena' nak xiine', bene'n 48la'kzi Chioza', beena' nak liizelozi beñ' choo beñ' xen, bi zoe' to loo yoo dii chon beñ' yell-lioni. La' ka wna dii beena' wdixjee daa goll Chioza'ne' kani'yi:

49Yabana' nakan gana' chi'a chñabi'a,
na' lo yell-liona' nzoa' ni'ani.

¿Nakran chakile gonle yoonā' gana' soa'?, na
Xanchona'.

¿Achakile chyallj ga yizi'lallaa?

50¿Abi chwiale nadaan ben' yog'lol dii de?

51'Na'ch Estébanna' chi'e beñ'ka' lle' na':

—Le ben' yichjlall'do' wal nakle. Bi chzenagle che Chioza' na' chonle ka ben' bi nombia' Chioza'. Nakle ben' widenag ka gok dii xozxto'choka'. Bikzə chzenagle che Espíritu Sántona'. ⁵²Dii xozxto'choka' bchi' bsak'gake' yog' dii ben'ka' wdixjee daa goll Chioza' legake' kani'yi. Betgake' ben'ka' be' dill' nan Chioza' wselee beena' zeelo nak ben' li ben' shao'. Na' ka bide' na' bénlene' lo na' ben'ka' betgake'ne'. ⁵³La'kzi nombia'le ley daa be' anjlka' dii Moiséza', bi chzenagkzlen.

Betgake' Estébanna'

⁵⁴Ka beni ben'ka' daa goll Estébanna' legake', le bllaagake' axt chaoyaaxaxj leye'ka'. ⁵⁵Na' Estébanna', chnabia'chga Espíritu Sántona' le', na' blis lawe'na' yabana' ble'ile' ye'l' chey cheeni' che Chioza', na' ble'teile' ze Jesúza' kwit de shli che Chioza'. ⁵⁶Na'ch golle' legake':

—iLi wwia! Chle'id' nyalj yabana', na' Beena' Bsel' Chioza' Yell-lioni zie' kwit Chioza' shlaa de shlina'.

⁵⁷Na' ben'ka' lle' na' bsej nague'ka' kwenche bi bengakile' xtilleena', na' de chosyaadiazgake' bex'gake'ne'. ⁵⁸Na' wlejpgake'ne' yell Jerusalénna' jalliagake'ne' yaja'. Na' ben'ka' ben ka' bkwaanlen xe'ka' daa ndobgake' to bi' wew' le Saulo kwenche wdapbaan. ⁵⁹Na' ka chlliagake'ne' yaja', be'lwille' Jesúza', chi'ene':

—Jesús, li' nako' Xan', bizi' bikaagach nad'.

⁶⁰Na' biyoll wne' ka', na' bchek' xibe'na' na' wnie' zillj, wne':
—Xan', wxi'xen che ben'ki dga chongakile' nad'.

Na' biyoll wne' ka' wite'.

Sáulona' bchi' bsakee ben'ka' choe'la'o Jesúza'

8 ¹Na' Sáulona' goke' toz ben'ka' betgake' Estébanna'.
Na' lo llana'tez wzolo bchi' bsak'gake' yog' ben'ka' nonlilall' Jesúza' Jerusalénna'. Na' wislesgake' doxen gana' mbani Judeana' na' gana' mbani Samáriana', na' totgui postlka' bigaangake' Jerusalénna'. ²Na' to chop ben' nonlilall' Jesúza' jakwash'gake' dii Estébanna' na' le wchellgakile'ne'. ³Na' Sáulona' bchi' bsakee ben'ka' nonlilall' Jesúza', chaje' lill che chegake' chjtoyoe' ka nool ka ben' byo kwenche chgwee legake' lillyana'.

**Be'gake' dill' wen dill' kob che Crístona'
gana' mbani Samáriana'**

4Na' ben'ka' bllesh Jerusalénna' be'gake' dill' wen dill' kob che Crístona' gattezə wyajgake'. 5Na' beena' le Felipe, wyaje' to yell xen che Samáriana' na' be'lene' ben'ka' dill' che Crístona'. 6Na' bdop bllag ben', na' yog'lolgake' bzenagyen'gake' dill' daa be' Felípena', daa ble'gakile' yel' wakka' chone'. 7Na' ben' zan bichej dii xiwaa, na' ka bichejgakan chosyaadiagakan. Na' lekzka' biyone' zan ben' net ni'a nee, na' ben' bi chak sa' wen. 8Na' daa gok ka', le biba bizaki ben'ka' lle' yella'.

9Na' lekzka' yella' wzoa to ben' willa' lie' Simón, na' kon yel' willa'na' chone' chziyee ben' doxen gana' mbani Samáriana', na' ben kwine' ben' choo ben' xen. 10Yog' ben' lle' na' chzenaggake' xtilleena', ka bi' xkwid' ka ben' gol, na' nagake':

—Beenin nsi'gake' Yel' Wak Choo Yel' Wak Xen che Chios.

11Na' le wyajle'gake' che', la' zan yiz ba gok chziyee legake' kon yel' willa'na' daa chone'. 12Na' ka bzajnii Felípena' legake' dill' wen dill' kob che yel' wñabia' che Chioza' na' che Jesucrístona', na' ben' zan wyajle'gake' xtilleena' na' wchoagake' nisa', ka noolə ka ben' byo. 13Na' lente Simónna' wyajli'e na' wchoe' nisa', na' wzoloe' chdalene' Felípena' gattez zeje', na' chibanile' ka nak yel' wakka' daa chon Felípena'.

14Na' ka wñezi postlka' lle' Jerusalénna' ba chajle' ben' Samáriaka' cho'a xtil' Chioza', na' bsel'gake' Pédrona' len Juanna' Samáriana'. 15Na' ka bllingake', be'llwillgake' Chioza' wñabgakile'ne' soa loo yichjlall'do' ben' Samáriaka' Espíritu Sántona'. 16La' bin' soa' Espíritu Sántona' loo yichjlall'do'eka'. Tochga ba wchoagake' nisa' daa chajle'gake' che Xancho Jesús'a. 17Na'ch Pédrona' len Juanna' bxoə neeka' yichj ben'ka', na' jsoa Espíritu Sántona' loo yichjlall'do'eka'.

18Na' ka gokbe'i Simónna' jsoa Espíritu Sántona' loo yichjlall'do' ben'ka' biyoll bxoə na' postlka' yichje'ka', na' bshabile' legake' mech, 19chi'e:

—Li gon' nad' yel' waki kwenche nottez ben' ka wxoə' na'ki yichje'ka' soa Espíritu Sántona' loo yichjlall'do'eka'.

20Na'ch Pédrona' golle'ne':

—Kwiayi'lenshgo' xmecho'na', daa chakilo' wak si'leno'n daa chon Chioza' ka'z. ²¹Bikz ga gag gono' ka nak dga chonnto', la' bi nak yichjlall'do'na' ka cheeni Chioza'. ²²Biyaj bileni dii mala' chono', na' be'lwill Chioza' shi yizi'xene' cheyi daa ba goklalloo gono'. ²³La' nakbia'cha bin nxe bin nzak' nak loo yichjlall'do'na', na' lennan' ntakw nchejan li'.

²⁴Na'ch che' Simónna' legake':

—Li we'lwillgach Chioza' ni cha' kwenche bi gag daa ba wnale gag cha'.

²⁵Na' ka biyoll be' Pédrona' na' Juanna' cho'a xtil' Chioza', na' biza'gake' ziyajgake' Jerusalénna'. Na' ka zingoo'gake' nez, be'gake' dill' wen dill' kob che Jesucristona' zan yellka' gana' mbani Samáriana'.

Felípena' na' beñ' Etiopíana'

²⁶Na'ch to anjl che Xancho Chioza' wñie' Felípena', chi'e:

—Wyaj lli'lə na' goxoo neza' daa ziza' Jerusalénlə na' zejan yell Gázalə, neza' daa chde latja' gana' bibi chashj chleb.

²⁷Na' wza' Felípena' zeje', na' tneza' billague' to beñ' Etiopía



Ki nak karretka' bchin beñ' wñabia'ka' na' no soldadka'.

wyaje' Jerusaléna' je'lawee Chioza'. Na' nake' to eunuco,^b ben' zakii, na' nak lall' nee mech che noolə wñabia' che Etiopiana' beena' le Candace. ²⁸Na' ba zingwee nez ziyaje' lalle'nalə, na' ziyoe' loo karret che'na' chlabe' daa bzej dii Isaíaza', beena' wdixjee daa goll Chioza'ne' kani'yi. ²⁹Na'ch Espíritu che Chioza' chi'e Felípena':

—Jabig' kwit karreta'.

³⁰Na' ka jabig' Felípena' kwit karreta', benile' chlab beena' daa bzej dii Isaíaza'. Na' chi'ene':

—¿Achajniilo' daa chlabo'?

³¹Na'ch ben' Etiopiana' chi'e:

—¿Nakra gon' shajniida'n?, la' bi zoa no wzajni nad'.

Na' golle' Felípena':

—Wyepgach na' wche' kwitii.

³²Na' Cho'a Xtill' Chioza' gana' chlabe' nan:

Betgake'ne' ka chite' to xil'do';

na' ka to xil'do', ba bi chosyaa kat' chshibe'b,

ka'kz le', ni shcho'a dill' bi wñie'.

³³Na' bsi'gake'ne' yel' zto', na' aga no goklen le' gone' yel' joschis che'.

Na' kono xiin dia che wzoa,

la' bsol bñitgake' yel' mban che'na'.

³⁴Na'ch ben' Etiopiana' chi'e Felípena':

—Ben goklen wna nad', ¿nora cheyin wna dii Isaíaza' ka'? ¿Ache kwinen' cho'e dill', anti che ben' yoblan?

³⁵Na'ch Felípena' wzoloe' bzajniile'ne' ka zeji gana' chlabe' na' bi'e dill' wen dill' kob che Jesúsza'. ³⁶Na' ka bllingake' to ga llia nis, na' che' ben' Etiopiana' Felípena':

—Ni llia nis, ¿ade daa wsej wllonan choa' nisa'?

³⁷Na' che' Felípena'ne':

—Shi chajli' o do yichj do lalloo, wak wchoa' li' nisa'.

Na' che' ben' Etiopiana':

—Chajli'a Jesucrístona' nake' Xiin Chioza'.

³⁸Na'ch bkweze' karreta' na' betjgake'; na' wyoogake' loo nisa' na' Felípena' bchoe'ne' nisa'. ³⁹Na' ka bichejgake' loo nisa', Espíritu che Xancho Chioza' bichi'e Felípena' gan yoblə, na' aga ble'chi ben' Etiopiana' le', per chiba chizakile' ziyaje'. ⁴⁰Na'

Felípena' billine' yella' le Azoto, na' bidie' to to yell chyise' dill' wen dill' kob che Jesúsza' axt billintie' Cesareana'.

Bisha' Chioza' yichjlall'do' Sáulona'

(Hch. 22:6-16; 26:12-18)

9 ¹Na' Sáulona' kon chde' chwall chshebe' ben'ka' nonlilall' Xancho Jesucristona'. Chiyiljallee nak gone' kwenche wite' legake'. Daan wyaje' Jerusalénna' jawie' b̄xoz choo b̄xoz xenna' ²na' w̄nabile'ne' wzeje' twej yish che to to gana' chdop chllag ben' wlall che'ka' choe'lwillgake' Chioza' yell Damáscona', na' we'n lsens yiyilje' ben'ka' ba wyoo lo nez li nez shao' che Jesucristona' na' goxee legake' kwenche yichi'e legake' pres Jerusalénna', ka noolə ka ben' byo. ³Ka ni ngwee nez, na' ba zoa illine' yell Damáscona', tokonganzi wyechj to beeni' xen wal le' dii za' yabalə. ⁴Na' Sáulona' jchaze' lo yona' na' benile' to shii ben', chi'ene':

—Saulo, Saulo, ¿biche chchi' chsak'zo' nad'?

⁵Na'ch Sáulona' chi'e:

—¿Nora li', ben'?

Na'ch billii beenan', chi'e:

—Nadaan Jesúsza', beena' chchi' chsakoo. Na' daa chono' ka', zi' che kwinzon' chono' na' chak cho' ka chak che goona' chilibb xisa' daa chbibe'b kwenche sa'b.

⁶Na'ch Sáulona' axt chxiztite' daa chllebe', na' golle'ne':

—Xan!, ¿beran cheenilo' gon'?

Na' Xanchona' chi'ene':

—Biyas na' wyaj Damáscona', na' na' inagake' li' daa chiyal' gono'.

⁷Na' ben'ka' zejlgake' Sáulona' txen legatega wzegake' bibangakile' na' bllebgake', daa bengakile' chak x̄ne, per ni to kono ble'gakile'. ⁸Na'ch biyas Sáulona' lo yona'. Na' ka bixa' jalawe'na' aga ble'chile'. Na' ben'ka' zejlene' txen bex'gake' neena' kwenche bche'gake'ne' yell Damáscona'. ⁹Na' shon lla bi gok ile'ile', ni bi weej wdawe'.

¹⁰Na' Damáscona' zoa to ben' chonlilallee Jesúsza' na' lie' Ananías, na' ben Xancho Jesúsza' ka ble'do'ile'ne', na' chi'ene':

—Ananías.

Na' Ananíaza' chi'ene':

—Ni zia', Xan'.

11 Na' Xanchona' chi'ene':

—Wyaj, na' wyoo neza' daa le Shlichá, na' lill Júdaza' inabo' to ben' Tarso, ben' le Saulo. Ba choe'lwille' nad', 12 na' ba ble'do'ile' li' choo gana' zoe' na' chxoa noona'ne' kwenche yile'ile'.

13 Ka beni Ananíaza' chi'ene' ka', na' golle'ne':

—Xan', ze xtill' beena' chsak'zi'e ben'ka' nonlilall' li' Jerusalénna'. 14 Na' naa ba blee ni noxee yish daa bzej bxozka' chnabia' daa cho'en lsens goxee yog'lolinto', neto' choe'lwillnto' li', na' yichi'e neto' pres Jerusalénna'.

15 Na' Xancho Jesúsza' golle'ne':

—Wyaj, la' ba wlej' Sáulona' kwenche wi'e xtilaana' lao ben'ka' bi nak ben' Israel, na' lao ben' wñabia' che'ka', na' lekzka' laole le' nakle ben' Israel. 16 Nad' wliidee ka chiyal' si' sakee ni cha'.

17 Na'ch Ananíaza' wyaje' gana' zoa Sáulona' na' wyo'e loo yooná, na' bxoá neena'ne'. Na' chi'ene':

—Saulo, ben' bish', Xancho Jesúsza', beena' wñie' li' tneza' kana' zo' ni, ba bselee nad' kwenche gon' ka yile'ilo' na' soa Espíritu Sántona' loo yichjlall'do'na'.


18 Na' ka bxoá neena' Sáulona', lii bikwaste jalawe'na' daa nak ka yid bdeej, na' bile'ile'. Na'ch bizollee na' wchoe' nisa'. 19 Na' ka wdawe', biyakshao'lallee, na' bigaanlene' ben'ka' nonlilall' Jesúsza' yell Damáscona' zan lla.

Be' Sáulona' xtill' Chioza' yell Damáscona'

20 Na' lii wzolote Sáulona' cho'e xtill' Crístona' to to gana' chdop chllag ben' Israelka' choe'lwillgake' Chioza' yell Damáscona', na' chi'e ben'ka' Jesúsza' nake' Xiin Chioza'. 21 Na' yog' ben'ka' bengakile' dill' daa choe' Sáulona' chibangakile', na' che' ljwelle':

—¿Aaga beenin chde' chchi' chsakee ben'ka' nonlilall' Jesúsza' Jerusalénna'? Na' ¿aaga ni cheyinnan' bide' ni kwenche yichi'e yog'lolgake' pres ljasane' legake' lao bxozka' chnabia'?

22 Na' btipch lall' Sáulona' kwenche zizikchli bi'e dill' nan Jesúsza' nake' beena' bcheb Chioza' wselee kwenche inabi'e, na' bich gok ina ben' Israelka' lle' yell Damáscona' bi nakan ka'.



*Wloogake' Pablona' to lo llom kwenche
biletjgake'ne' lee zeena' nechj yella'.*

Bila Sáulona' lo na' ben' Israelka'

23Ka ba gok zan lla choe' Sáulona' xtill' Jesúza' yell Damáscona', na' ben' Israelka' lle' na' bshag ljjwellgake' nan witgake'ne'. 24Na' gokbe'i Sáulona' ba chinogake'ne'. Ka wal ka tella wdapgake' cho'a puert che zeena' daa nechj yella' kwenche gox'gake'ne' ka yicheje' na' witgake'ne'. 25Na'ch ben'ka' nonlene' txen, wal-lə wloogake'ne' to loo llom na' biletjgake'ne' lee zeena' nechj yella' kwenche bile'.

Billin Sáulona' Jerusalénna'

26Ka billin Sáulona' Jerusalénna', gokile' lene' ben'ka' nonlilall' Jesúza', per yog'lole' bblebgake'ne', bi wyajle'gake' shi dii li ba chonlilallee Jesúza'. 27Na' Bernabéna' bchi'e Sáulona' gana' lle' postlka'. Na' golle' legake' nan Sáulona' be'ile' Xancho Jesúza' tneza' ka zeje' yell Damáscona', na' Jesúza' be'lene'ne' dill'. Na' lekzka' golle' legake' bi bblebe' bi'e xtill' Jesúza' yell Damáscona'. 28Na' ka' gok bigaane' Jerusalénna' goke' txen ben'ka' nonlilall' Jesúza', na' wal inleeb goke' bi'e xtill' Xancho Jesúza'. 29Na' be'lene' dill' ben' Israelka' chne

dill' griegona' kwenche shajle'gake' che Jesúza', per legake' goklall'ligake' witgake'ne'. ³⁰Na' ka wnezi ben'ka' nonlilall' Jesúza' ba chinogake' Sáulona' kwenche witgake'ne', bche'gake'ne' Cesareana'lə. Na' ka bllingake' na', na' bise'l'gake'ne' Társona'lə gana' nak lalle'.

³¹Na'ch ben'ka' nonlilall' Jesúza' doxen Judeana', Galileana' na' Samáriana' wzoagake' mbalaz, la' koch no bchi' bsak'ch legake'. Na' wlooshosh yichjgake' toz Chioza'. Na' Espíritu Sántona' goklene' legake' kwenche gokchachgake' lo xnez Chioza' na' kwenche wyanchgake'.

Biyaki beena' le Eneas

³²Do kana', chda Pédrona' chjawie' ben'ka' nonlilall' Jesúza' to to yell, na' lekzka' jawie' ben'ka' lle' yell Lídana'. ³³Na' yell Lídana' jti'e to ben' le' Eneas. Ba gok xon' yiz die' bi chak chase' daa net ni'a neena'. ³⁴Na' Pédrona' golle'ne':

—Eneas, Jesucrístona' yiyone' li'. Biyas na' bitob daa cho'na'.

Na' lii biyaste Enéaza'. ³⁵Na' yog' ben'ka' lle' yell Lídana' na' yell Sarónna', ble'gakile' biyaki beena' na' benlilall'gake' Xancho Jesúza'.

Biban Dorcaza' ladj ben' wetka'

³⁶Na' lekzka' yell Jópena' wzoa to noolə benlilallee Jesúza', na' wlie' Tabita,^c na' dill' griegona' che'gake'ne' Dorcas. Na' nooli, shlak wbane' toshiizi bzani ni'a neena' goklene' ben', na' biyesh'lallile' ben'ka' bibi de cheyin. ³⁷Na' bllin to lla gok Dorcaza' to yillwe' na' wite'. Na'ch biyoll biwazjgake'ne', jadixjgake'ne' loo yoo che'na' lliia shkwiana' cha'lə. ³⁸Na' Jópena' llian gaozə yell Lídana', na' ben'ka' wnezgakile' zoa Pédrona' yell Lídana', na'ch bsel'gake' chop ben' jellgake'ne':

—Sho'gach Jópena' naate.

³⁹Na'ch Pédrona' wzee zejlene' ben'ka' Jópena'. Na' ka blline', na' jwa'gake'ne' loo yooná' gana' de ben' weta', na' yog' nool wizebka' wyechjgake' Pédrona' chbellgake', na' bli'gakile'ne' xe'ka' daa ben dii Dorcaza' shlak wbane'. ⁴⁰Na' Pédrona' bibeje'

^c 9:36 *Tabita*: dillii nakan dill' arameo.

yog'l_{ole}' chyoolə, na' b_{chek}' xibe'na' be'l_{wille}' Chioza'. Na'ch bwie' noola' ba wit na' golle'ne':

—Tabita, biyas.

Na'ch lii b_{ixa}'te jalao Dorcaza' chwie' Pédrona'. Na'ch biyase' bibi'e. ⁴¹Na' Pédrona' bexee neena' na' bisolléene'. Na'ch biñie' nool wizebka' na' nochlə beñ'ka' nonlilall' Jesúza' kwenche bizoe'ne' shi'a shbane' lawe'ka'. ⁴²Na' wze dill' doxen yell Jópena' ka gok che Dorcaza', na' beñ' zan benlilall'gake' Xancho Jesúza'. ⁴³Na' Pédrona' bigaane' Jópena' zan lla lill Simónna, beena' chkoll yidxa bayix'ka'.

Pédrona' na' Cornéliona'

10 ¹Na' yell Cesareana' wzoa to beñ' wlie' Cornelio, na' nak lall' nee zan soldadka', na' beñ'ka' nak lall' nee wlegake' Ben' Italia. ²Na' Cornéliona' len beñ'ka' nakgake' toz loo yoo lille'na' choe'la'ogake' Chioza' na' chall chllebgake'ne'. Na' zoatezi zoe' choe'l_{wille}' Chioza' na' cho'e mech xen kwenche chaklene' beñ' Israelka', beñ'ka' chyallj ch_{chinin}. ³To lla, do ka chida shon, ble'do'ile' to anjl che Chioza' wyo'e gana' zoe' na' golle'ne':

—¡Cornelio!

⁴Na' Cornéliona' chwiayenee anjla' do chllebze', na' golle'ne':

—¿Beran cheenilo' beñ'do'?

Na' anjla' chi'ene':

—Chioza' chibaile' daa zoatezi zo' choe'l_{willo}'ne' na' daa chakleno' beñ' yesh'ka'. ⁵Na' naa bsel' beñ' shajgake' yell Jópena' kwenche lljxi'gake' beena' le Simón Pedro. ⁶Zoe' lill to beñ' le Simón, beena' chkoll yid, na' lille'na' zoan gaoz cho'a nido'na'. Na' Simón Pédrona' ine' li' daa chiyal' gono'.

⁷Na' ka biza' anjla' bshaljen Cornéliona', na'ch Cornéliona' goxe' chop xmose'na', na' sto soldad, beena' nonlilallee Chioza' na' zoe' chaklene'ne' chgwee x_{nezi} bittez. ⁸Na' golle' legake' yog' daa goll anjla', na'ch bselee legake' Jópena'.

⁹Na' betiyo do ka gobill ba zoa illin beñ'ka' bsel' Cornéliona' yell Jópena'. Na' ka lo gora', Pédrona' wyep'e koll' yoona' gana' zoe' kwenche we'l_{wille}' Chioza'. ¹⁰Na' wdone', na' goklallee gawe' shel'ka'. Na' shlak chongake' daa gawe', ble'do'ile' ¹¹byalj

yabana', na' to dii nak ka to lech' xen dii nchej tap yichjten chetjan lo yona'. ¹²Na' loo lechaa lle' biya bayix', no ba llia tap ni'a na'in, na' no ba chxobi leeb lo yona' na' no ba zoa xilin. ¹³Na'ch benile' shii to ben', chi'ene':

—Wzolla' Pedro. Bet baka', na' wdao.

¹⁴Na'ch Pédrona' golle'ne':

—Bi gaw' baka', Xan'; ni shlin bin' gaw' baki bi nak ba xilall'.

¹⁵Na' sto shii benile' shii beena', chi'ene':

—Daa ba wna Chioza' wak gawo', bich inazo' bi nakan xilall'.

¹⁶Shon shii golle' ka', na'ch biyep lechaa yabana'. ¹⁷Na' chibani Pédrona' chakile' bera zejín daa ble'do'ile', ka bllin ben'ka' bse!' Cornéliona' cho'a yona' gana' zoe', daa ba wñabgake' gan zoa lill beena' le' Simón, beena' chkoll' yid xa bayix'ka'. ¹⁸Na' ka bllingake', na' wnegake' zillj wñabgake' shi nan' zoa to ben' le Simón Pedro. ¹⁹Na' Pédrona' zie' wñeyi cheyi daa ble'do'ile', kat' wne Espíritu Sántona', chi'ene':

—Bwiakachi, na' lle' shon ben' chiyiljgake' li'. ²⁰Bizolla' na' biyetj, na' wyajlengake'. Bi gaxchopilo', la' nadaan bse'laa legake'.

²¹Na'ch biyetj Pédrona' gana' lle' ben'ka' bse!' Cornéliona'. Na' chi'e legake':

—Nadaan beena' chiyiljle. ¿Beran chak chele zidwiale nad'?

²²Na'ch che' ben'ka' Pédrona':

—To ben' wñabia' che soldadka' lie' Cornelio bse'lee neto'. Nake' to ben' zej shli lao Chioza' na' ngooshosh yichje'ne', na' yog' ben' Israelka' nezgakile' zoe' chone' wen. Na' to anjl che Chioza' golle'ne' inie' li' kwenche shajo' lille'na' wzajniilo'ne' na' wzenague' dill'ka' we'leno'ne'.

²³Na'ch Pédrona' wlo'e legake' loo yoolə gana' zoe', na' bigaangake' shyel. Na' betiyo wyajlen Pédrona' legake' na' len to chop ben' Jope, ben' nonlilall' Jesús'a.

²⁴Na' llana' sto bllingake' Cesareana'. Na' Cornéliona' ba btope' yog'lol dialla che'na' na' ben'ka' nllaguile', na' ba lle'gake' lille'na' chbezgake' illin Pédrona'. ²⁵Na' ka bllin Pédrona' lill Cornéliona', lii bchejte Cornéliona' bchek' xibe'na' lawe'na' choe'laweene'. ²⁶Na' Pédrona' bisolléene', chi'ene':

—Bizolla', bi wchekz' xibo' lawii, la' lekzka' ben'zə nad'.

27Na'ch shlak chshaljgake' wyoogake' loo yooná, na' ble'i Pédróna' ben' zan ba lle'. 28Na'ch golle' legake':

—Le' nezile ka na ley chento'na', neto' ben' Israel bi chiyal' gonnto' txen le' bi nakle ben' Israel, na' ni bi chiyal' sho'nto' loo yoo lill-le. Per Chioza' ba bzajniile' nad' bi chiyal' gakid' zban nottez ben'. 29Daan ka bla' ben'ki chnegake' nad', lii za'tia' bi bchia' dill'. Na' naa cheenid' inezid' biche bseloo ben'ki bidxi'gake' nad'.

30Na'ch Cornéliona' chi'ene':

—Ba gok tap lla, do ka naayen', chida shon, choe'lwill' Chioza' loo lillii kat' ble'id' to ben' byo zie' lawa' nakwe' to lech' dii chey cheeni'. 31Na' wne' nad': “Cornelio, Chioza' ba bzenague' daa choe'lwillo'ne', na' lekzka' chle'ile' ka chakleno' ben' yesh'ka'. 32Na' bsel' ben' shajgake' yell Jópéna' lljxi'gake' Simón Pédróna' kwenche yide' we'lene' li' dill'. Zoe' lill to ben' le Simón, ben' chkoll yid, na' lill beeni zoan gaoz cho'a nisdona'.” 33Daan lii bentia' wneyi bidxi'gake' li', na' choxkeno' ba bido'. Na' nezki Chioza' yog'nto' cheeninto' wzenagnto' yog' cho'a dillaa daa cheenile' ino' neto'.

Be' Pédróna' dill' lill Cornéliona'

34Na'ch wzolo Pédróna' bi'e dill', chi'e:

—Chakbe'id' naa, dii li Chioza' aga nakzi ben' chakile', 35san chle'shiile' yog' ben' lle' gattez yell kon shi chall chllebgake'ne' na' chongake' daa nak shli. 36Chioza' bselee ben' wdixje'ile' neto' ben' Israel dill' wen dill' kob che'na' nan wak yizoalenchone' mbalaz daa bselee Jesucrístona', beena' nak Xan yog'lolcho. 37Nezkzile kwaslol diika' gok gana' mbani Judeana', daa wzolo gana' mbani Galileana' ka wde wdixje'i dii Juanna' ben' nan chonan byen yiyaj yilengakile' na' choagake' nis. 38Nezile Chioza' bi'e Jesús, ben' Nazareta', ye' wak na' Espíritu Sántona', na' wda Jesúza' bene' dii wenka' na' biyone' yog' ben'ka' ntakw nchej dii xiwaa, daa wzoalen Chioza' le'. 39Neto' choe'nto' dill' che yog'te diika' ben Jesúza' Jerusalénna' na' doxen gana' mbani Judeana'. Na' biyoll bene' diika', betgake'ne' bda'gake'ne' lee yag cruza'. 40Per Chioza' bisbane'ne' ladj ben' wetka' biyon llana', na' bidli'lawe' neto'. 41Aga yog' ben' bli'lao Jesúza' ka bibane' ladj ben' wetka',

san bli'lawe' toz neto', neto' naknto' ben' ba wlej Chioza' kwenche we'nto' xtilleena'. Na' neto' weej wdaolennto'ne' ka wde bibane' ladj ben' wetka'. ⁴²Na' Jesúza' bselee neto' chixje'into' ben' nan Chioza' nzoe'ne' kwenche gone' ye' joschis che yog'lo' ben', ka ben' mban na' ka ben' ba wit. ⁴³Na' lekzka' kani'yi yog' dii ben'ka' wdixjee daa goll Chioza' legake' be'gake' xtill' Jesúza', wngake' Chioza' yizi'xene' saaxya che nottezə ben' gonlilallee Jesúza'.

**Wyoo Espíritu Sántona' loo yichjlall'do'
ben'ka' bi nak ben' Israel**

⁴⁴Na' ni chshaljte Pédrona', kat' Espíritu Sántona' wyo'e loo yichjlall'do' yog' ben'ka' chzenaggake' xtilleena'. ⁴⁵Na' ben' Israelka' nonlilall' Jesúza', ben'ka' bllinlen Pédrona' lill Cornéliona', bibangakile' daa wyoo Espíritu Sántona' loo yichjlall'do' ben'ka' bi nak ben' Israel. ⁴⁶Na' bengakile' chne ben'ka' wde wdeli dill' dii bi nombia'gake', choe'la'ogake' Chioza'. ⁴⁷Na' Pédrona' golle' ben' Israelka' lle' na':

—Aga no gak wllon wchoa ben'ki nisa', la' ba yoo Espíritu Sántona' loo yichjlall'do'eka' ka ba yo'e cho'.

⁴⁸Na' ben Pédrona' mandad wchoagake' nisa' daa chonlilall'gake' Xancho Jesucristona'. Na' biyolla' wñabgakile' Pédrona' kwenche bigaanlene' legake' chop shon lla.

Pédrona' golle' ben' Jerusalénka' ka gok

11 ¹Na' postlka' na' nochlə ben'ka' nonlilall' Jesúza' Judeana' bengakile' nan ben'ka' bi nak ben' Israel lekzka' chajle'gake' cho'a xtill' Chioza'. ²Na' ka billin Pédrona' Jerusalénna' gokdil-len xonj ben' le', ben'ka' che' chonan byen sho' ben' byoka' nonlilall' Chioza' sen daa le circuncisión la'kzi bi nakgake' ben' Israel. ³Na' gollgake'ne':

—¿Biche wyoozo' loo yoo lill ben'ka' bi nak ben' Israel na' weej wdaolenzgako'ne'?

⁴Na'ch Pédrona' golle' legake' yog' ka gok, chi'e:

⁵—Kana' ni zoa yell Jópena', shlak choe'lwill' Chioza' ble'do'id' to dii nak ka lech' xen, dii nchej tap yichjten, chetjan xan yabana' na' bla'ten gana' zia'. ⁶Na' ka bwiayenaa diika' llia loo lechaa, na' ble'id' lle' bayix' ba zoa tap ni'a na'b, na' no ba

znia, no ba chxobi le'in lo yona', na' ba zoa xilin. ⁷Na' benid' shii to beṅ' ne' nad': "Wzolla' Pedro, bet baka' na' wdao." ⁸Na' goshee: "Bi, Xan', ni tshii biṅ' gaw' baki bi nak ba xilall'." ⁹Na' sto shii benid' shii beena' ne' nad': "Daa ba wna Chioza' wak gawo' bich inazo' bi nakan xilall'." ¹⁰Gokte shon shii wne ka', na'tech biyep lech' xenna' yabana'. ¹¹Na' shintg ble'do'id' diika' kat' bidse shonə beṅ' cho'a yoonā' gana' zoa', zaake' yell Cesareana' ziddiljgake' nad'. ¹²Na' Espíritu che Chioza' wne' nad' bi gonchoplallaa sha'len' legake'. Na' lenkz beṅ' bish'choki xop wza'lengake' nad', na' yog'tento' wyoonto' lill Cornéliona'. ¹³Na' Cornéliona' bseesile' neto' nan ble'ile' to anjl zie' lille'na'. Na' anjla' golle'ne': "Bseṅ' to chop beṅ' yell Jópēna' kwenche lljxi'gake' beena' le Simón Pedro. ¹⁴Na' le' ine' li' nakan gono' kwenche yilaleno' beṅ'ka' lle' loo yoo lillo'na' bi kwiayi'le." ¹⁵Na' ka wzoloa' choe'lengakee dill', betj Espíritu Sántona' wyo'e loo yichjlall'do'eka', ka bidsoe' loo yichjlall'do'choki. ¹⁶Na'ch jadinid' daa wna Xancho Jesúsza' kana' wne': "Dii li Juanna' bchoe' beṅ' nis, san le', dii zak'chi gak chele, daa yidsoa Espíritu Sántona' loo yichjlall'do'lēna'." ¹⁷La' Chioza' bene' ka zoa Espíritu Sántona' loo yichjlall'do'eka' ka zoe' loo yichjlall'do'choki, cho' chonlilall'cho Xancho Jesucristona'. Na' ḡnora nak' nad' wllon' gon Chioza' daa cheenile' gone'?

¹⁸Na'ch ka biyoll bzenag beṅ' Jerusalénka' nonlilall' Jesúsza' dillaa be' Pédrōna', na' wzoagake' llizə, bich bi gollgake'ne'. Na' be'la'ogake' Chioza', che'gake':

—Len beṅ'ka' bi nak beṅ' Israel ba be' Chioza' latj yiyaj yilengakile' dii malka' chongake' kwenche gat' yel' mban chegake' zejli kaṅi.

Beṅ'ka' nonlilall' Jesúsza' Antioquána'

¹⁹Na' beṅ' Israelka' nonlilall' Jesúsza', beṅ'ka' bsheshlesgake' ka wde wit dii Estébanna', baḷe' wyaj zit' axt Feníciana', na' zi baḷe' bllin Chíprena' na' zibale' bllin yell Antioquána'. Na' gana' bllin to toe' be'lengake' to beṅ' wllall che'ka'z xtill' Jesúsza'. ²⁰Per baḷ beṅ'ka' nak beṅ' Chipre na' beṅ' Cirene, ka bllingake' yell Antioquána', wzologake' be'lengake' beṅ' bi nak beṅ' Israel dill' wen dill' kob che Xancho Jesúsza'. ²¹Na' yel' wak che

Xanchona' wzoalenan legake', na' ben' zan wlej yichjgake' diika' nxenilall'gake' na' benlilall'gake' Xancho Jesúza'.

22Na' ben'ka' nonlilall' Jesúza' Jerusalénna', ka wnezgakile' ba nonlilall' ben' Antioquíaka' Jesúza', na' bsel'gake' Bernabéna' jawie' legake'. 23Na' ka blline' Antioquíana', ble'ile' ba goklenchga Chioza' legake' na' le bibaile'. Na' btipche' lall' ben'ka' kwenche soachechgake' gonlilall'gake' Xancho Jesúza' do yichj do lall'gake'. 24Na' ben' zanch benlilall'gake' Xancho Jesúza', la' Bernabéna' nake' to ben' wen, na' chnabia' Espíritu Sántona' le', na' le benlilallee Chioza'.

25Na' ka wde, wza' Bernabéna' zeje' Társona' kwenche lljadilje' Sáulona', na' ka billelile'ne' na' bchi'ene' Antioquíana'. 26Na' wzoalengake' ben'ka' nonlilall' Jesúza' Antioquíana' twiz, na' bli' bsdgakile' ben' zan. Na' Antioquíana' dii nechdo' bsi'gake' ben'ka' nonlilall' Jesucristona' "Cristianos".

27Na' do kana'kzə, bal ben'ka' chyixjee daa che' Chioza' legake' wza'gake' Jerusalénna' bllingake' Antioquíana'. 28Na' wzolla' toe', beena' le Ágabo, na' bi'e dill' ka ba bzajinii Espíritu che Chioza' le', na' golle' kwe' to wbin wal doxen yell-lioni. Na' ka' gok kana' chnabia' beena' le Claudio gana' mbani Rómána'. 29Na' ben' Antioquíaka' nonlilall' Jesúza' be'gake' dill' we'gake' kon ka'k' wej gak we' to toe' kwenche gaklengake' ben'ka' nonlilall' Jesúza' gana' mbani Judeana', gana' chi' wbinna'. 30Na' ka' bengake', na' daa bdop bigox'gake'n Bernabéna' len Sáulona' kwenche jasangake'n lao ben'ka' ngoo lall' na' ben'ka' nonlilall' Jesúza' Judeana'.

Betgake' Jacóbona' na' wloogake' Pédrona' lillyana'

12 1Na' do kana'kzə ben' wñabia' Heródeza' bexee bal ben'ka' nonlilall' Jesúza' kwenche wchi' wsakee legake'. 2Na' bchogloe' gueti Jacóbona' yesya, beena' nak ben' bish' Juanna'. 3Na' ka gokbe'ile' bibayi ben'ka' chnabia' ben' Israelka' daa bene' ka', na'ch lekzka' bexee Pédrona' lo lni Paskwa' kana' chaogake' yetxtila' daa bi nchix lewadúrana'. 4Na' ka bdolile'ne', wdixje'ne' lillyana' gana' wdap shin'to soldadka' le', na' bene' tap weje' kwenche bibeji ljwellgake' wdapgake'ne'. Na' gokile' yiyoll lni Paskwa' kweje'ne' lao ben' yellka' na' wchogloe' che'



Ki nak bał nezka' de yell Jerusalénna'.

guete'. ⁵Shlak nej Pédróna' lillyana', beṇ'ka' nonlilall' Jesúza' toshiizi be'lwillgake' Chioza' ni che'.

Chioza' bibeje' Pédróna' lillyana'

⁶Na' lle'na' ka wxezə kwej Heródeza'ne' kwenche wchogloe' che' guete', Pédróna' die' chese' ladj chop soldadka', na' nchejgake'ne' chop gden, na' zi chop soldadka' chapgake' cho'a lillyana'. ⁷Na' tokonganzi bllin to anjl che Xancho Chioza' gana' de Pédróna' na' to beeni' xen wyoo loo lillyana'. Na' anjla' wdane' kwit li'ena' bisbane'ne', chi'ene':

—Lobe'te wyas.

Na' katena' biyell gdenka' nchej neena'. ⁸Na'ch che' anjla'ne':

—Bikaacha li'ona' na' bilej xelo'na'.

Na' ben Pédróna' daa chi'ene', na'ch che' anjla'ne':

—Bixoa kolloo xachelo'na', na' da dino' nad'.

⁹Na'ch zjano Pédróna' anjla', ni bi nezile' shi ka chakkzan, kon gokile' chle'do'zilen'. ¹⁰Na' bidegake' gana' lle' soldadka' shkwen, na' bidetegake' gana' lle' ben'ka' zi shkwen, na' ka bllingake' gana' zoa puert de yana' daa liizelote, to kwinzin byaljan na' bichejgake'. Na' ka ba biyoogake' neza', bikwaan anjla' toz Pédróna'. ¹¹Kana'ch gokbe'i Pédróna', na' wne':

—Naach chakbe'id' dii li Chioza' ba bselee anjl che'na' kwenche bisle' nad' lo na' Heródeza', na' bi wtil' daa non beṇ' Israelki lez gak cha'.

¹²Na' ka gokbe'ile' ba bicheje' lillyana', na' ziyaje' lill Maríana' xna' Juanna', beena' nsi'gake' Marcos. Na' lill Maríana' ndop nllag beṇ' zan choe'lwillgake' Chioza'. ¹³Ka blline', na' wnie' cho'a leeja', na' bchej to bi' noolə le Rode, jawiab' no beena' chne. ¹⁴Na' ka biyombia'b' shii Pédróna' chibachgaib', na' daa le chibaib' bikz bsalj'. Zigaate jayellb' beṇ'ka' lle' loo yoon'a' ba ze Pédróna' cho'a leeja'. ¹⁵Na'ch che'gake'b':

—Chakzilo'n.

Na' leb' wzeyidb' che'b' len'. Na' legake' che'gake'b':

—Anjl che'naljan.

¹⁶Na' Pédróna' ni zie' chnie' cho'a leeja'. Na' ka bsaljgake' ble'gakile'ne', bibanchgakile'. ¹⁷Na'ch Pédróna' bene' to sen

kon neena' kwenche soagake' llizə, na' golle' legake' ka ben Xancho Chioza' bibeje'ne' lillyana'. Na' chi'e legake':

—Li ye' Jacóbona' na' yog' ben' bish'choka' ka ba ben Xanchona' cha'.

Na'ch bizee ziyaje' gan yoblə.

18Na' ka wyeeni', wche' to ye!' wban xen ladj soldadka' daa bi gokbe'gakile' nak gok bichej Pédrona'. 19Na'ch Heródeza' bta bnie' ben'ka' biyilgake'ne', na' bi billelgakile'ne'. Na'ch wnable' soldadka' chap lillyana' nak gok bicheje', na' bikz bi dill' be'gake'. Na'ch bene' mandad betgake' soldadka'. Na' ka wde bene' ka', wzee Judeana' jsue' Cesareana'.

Ka wit Heródeza'

20Heródeza' chlee ben' Tíroka' na' ben' Sidónka'. Na' ben'ki gogkake' toz bshaljlengake' Blástona', to wen llin zakii che Heródeza', na' bengakile'ne' wen kwenche goklene' legake', la' byallgakile' si'gake' dii yeej gaogake' gana' chnabia' Heródeza'. Na' Blástona' bshaljlene' Heródeza' kwenche wxi'xene' che ben' Tíroka' na' ben' Sidónka' na' yizoalene' legake' wen sto shii. 21Na' Heródeza' bllie' bia' batan lljawiagake'ne'. Na' gokwe' xe'na' daa le nak daa chakwe' kat' chli'lawe' lao lkwe' ben'. Na'ch jshie' gana' chchogloe' che ben', na' bi'e dill' lao ben'ka' ndop nllag na'. 22Na' shlak cho'e dill', na' besyaa ben'ka' che'gake':

—To chioza'n chne, aga kontele beanaan.

23Na' anjl che Xancho Chioza' lii be'tie' Heródeza' to yillwe' wal benan ka chyin chlall' bel' bzog'ka' loo li'ena' na' wite', daa bi'e latj wloo ben'ka' le' balaan daa chidol' toz beena' nak dowalj Chios.

24Na' dill' wen che Chioza' zej chlliljchan doxen.

25Na' Bernabéna' len Sáulona' ka wde bengake' daa chiyal' gongake' Jerusalénna', biza'gake' biyajgake' Antioquíana', na' bche'gake' Juanna', beena' lekzka' nsi'gake' Marcos.

Bernabéna' na' Sáulona'

je'gake' cho'a xtill' Chioza' yell zit'ka'

13 1Na' ladj ben'ka' nonlilall' Jesúsza' yell Antioquíana' lengake' ben' chyixjee daa che' Chioza' na' ben' chli'

chsedí cho'a xtill' Chioza'. Na' legake' ben'ki: Bernabéna', Simónna', beena' che'gake' ben' gasj, Lúciona' ben' Ciréna', Sáulona' na' Manaéna', beena' bgol-len Heródeza' beena' wñabia' gana' mbani Galileana'. ²Na' to shii ka zoagake' wbasaa na' choe'la'ogake' Chioza' wñe Espíritu Sántona' legake', chi'e:

—Li wzoa Bernabéna' na' Sáulona' kwenche gongake' xshin'na', la' ni cheyinnan' ba wlej' legake'.

³Na' ka wyeelo be'lwillgake' Chioza' na' biyoll wzoagake' wbasaa, na' bxoá neeka' yichj ben'ka' chop, na'ch bse'l'gake' legake' gana' lljengake' xshin Chioza'.

**Páblona' na' Bernabéna' be'gake' cho'a
xtill' Chioza' gana' le Chipre**

⁴Na'ch Espíritu Sántona' bselee Bernabéna' na' Sáulona' yell Seleúciana' gana' wyoogake' barkwa' kwenche jwaan legake' yell-lío Chíprena' daa llia lo nisdona'. ⁵Na' ka wlez barkwa' cho'a yell Salamínana', bchejgake' na' wzologake' wdixje'gake' cho'a xtill' Chioza' to to gana' chdop chllag ben' Israelka' choe'lwillgake' Chioza'. Na' nche'gake' sto ben' le Juan kwenche gaklene' legake'. ⁶Na' wdegake' to to yellka' llia Chíprena'. Na' ka bllingake' yell Páfoza', na' jadi'gake' to ben' Israel, beena' le Barjesús. Nake' to ben' willa', na' chziyee ben' chi'e nake' to ben' chyixjee daa che' Chioza' le'. ⁷Na' beeni nllaguile' beena' chñabi'e doxen Chíprena', beena' le' Sergio Paulo. Na' Sergio Paulona' nake' to ben' chajni, na' goxe' Bernabéna' len Sáulona' kwenche wzajni'gakile'ne' cho'a xtill' Chioza'. ⁸Na' ben' willa'na', nsi'gake'ne' Elimas (na' zejín ben' willa'), goklallee gone' ka bi shajle' ben' wñabia'na' che cho'a xtill' Chioza'. ⁹Na'ch Sáulona', beena' lekzka' lie' Pablo, daa chñabia'chga Espíritu Sántona' le', bwiayenee Elímaza', ¹⁰na' golle'ne':

—iLi' ben' wxiye', ben' wen dii mal, xiín dii xiwaan nako' na' chakzbanilo' yog' daa nak dii wen! ¿Biçe chshok chlewzo' daa nak dii li che Xancho Chioza'? ¹¹Na' naa Chioza' wselee yel' zi' cho', gone' ka icholo' na' shloll wen bich ile'ilo' beeni' che wbilla'.

Na' kate golle'ne' ka' lii wcholtie', na' chgan chtobzile' chñabe' no yiyox' neena' daa bich chle'ile'. ¹²Na' ka ble'i ben' wñabia'na'

daa gok, na' wyajli'e, na' le bibanile' ka nak cho'a xtil' Xancho Jesúza' daa chli' chsedgakile'ne'.

**Páblona' na' Bernabéna' wyajgake' yell
Antioquíana' daa llia gana' mbani Pisídiana'**

13 Na'ch Páblona' na' ben'ka' chdalene' wyoogake' barkwa' yell Páfoza' na' wyajgake' yell Pérgena' daa llia gana' mbani Panfílana', na' Juan Márcona' bixonje' ziyaje' Jerusalénna'. 14 Na' Páblona' len ben'ka' chdalene' na', biza'gake' yell Pérgena' na' wyajgake' yell Antioquíana' daa llia gana' mbani Pisídiana'. Na' ka bllin lla sabda', llana' chombaän ben' Israelka', wyajgake' gana' chdop chllaggake' choe'lwillgake' Chioza', na' jche'lengake' ben'ka'. 15 Na' ka biyoll blabgake' lat' ley che Chioza' na' zi lat' daa bzej dii ben'ka' wdixjee daa goll Chioza' legake', na'ch ben'ka' chgoo xnezi cheyi diika' chongake' gana' chdop chllaggake' bsel'gake' to ben' gana' chi' Páblona' len Bernabéna' na' golle' legake':

—Le' ben' bish', shi bi dill' de we'lenle ben'ki kwenche wtipch lall'gake', wak we'len naa.

16 Na'ch wzolla' Páblona' na' blis neena' kwenche kwe'gake' llizə wzenaggake', na' chi'e:

—Le', ben' Israel, na' le' bi nakle ben' Israel choe'la'ole Chioza', li wzenag dga inia': 17 Chios, beena' nonlilall'cho cho' ben' Israel, wleje' dii xoxzto'choka' na' bene' ka wyangake' shlak wzoagake' Egiptona'. Na' bllin lla bibeje' legake' kon ye'l wak che'na'. 18 Na' wdape' ye'l chxenlall' che ye'l widenag che'ka' lo choa yiza' wzoagake' latja' gana' bibi chashj chleb. 19 Na' blliyee yellka' gall kwen lle' gana' mbani Canaánna' kwenche bi'e dii xoxzto'choka' yell-lío che'ka'. 20 Kan' gok lawi tap guiyoa yoo gashj yiz. Na'tech, bzoa' Chioza' ben'ka' wloo lall' na'gake' legake', axt nika bllin lla wzoa dii Samuela', beena' wdixjee daa goll Chioza'ne'. 21 Na'ch wñabgake' soa to ben' wñabia' kwenche inabi'e legake'. Na' Chioza' bi'e legake' dii Saúla', beena' wñabi'e legake' lo choa yiz. Goke' xiin dii beena' wle Cis, beena' gok xiin dia che dii Benjamínna'. 22 Na' ka bikwas Chioza' ye'l wñabia' che dii Saúla', bizoe' dii Davina' inabi'e na' bi'e dill' che', wne': “Davina', xiin Isáina', nake' to ben' chon ka chazlallaa, na' nezid'

gone' yog' daa cheenid' gone!." 23Na' lo dia che dii Davina' golj Jesucristona', beena' wlej Chioza' kwenche yisle' cho' ben' Israel lawi dii mala' kon ka bchebe' gone'. 24Na' ka zi' solo Jesúza' wli' wsedile' ben', dii Juanna' golle' yog' ben' Israelka' chiyal' yiyaj yilengakile' xtoleeka' na' choagake' nisa'. 25Na' ka ba zoa yiyoll gon dii Juanna' daa nak lall' nee gone', na' ba zoate illin lla guete', na' wne': "Bi nak' beena' chakile nak'. Zi' za'lə beena' zak'ch ka nad'. Na' nad' ni bi zakaa gak' xmore' kwenche wlechj' sele'na!."

26'Le' ben' bish', le' nakle xiin dia che dii Abrahamana', na' le' choe'la'ole Chioza' la'kzi bi nakle ben' Israel, Chioza' ba bselee cho'a xtilleena' laochoni daa cho'en dill' yisle' ben' kwenche bi kwiayi'gake'. 27Ben' Jerusalénka' na' ben' wñabia' che'ka' bi gokbe'gakile' bse! Chioza' Jesúza'. Ni bi wyajni'gakile' diika' bzej dii ben'ka' wdxjee daa goll Chioza' legake' kani'yi, la'kzi chlabgake'n yog' lla sabd gana' chdop chllaggake' choe'lwillgake'ne!. Na' daa wnagake' chiyal' guet Jesúza', billinin daa bzej dii ben'ka' be' dill' daa goll Chioza' legake'. 28La'kzi bibi dii mal billelgakile' ben Jesúza' dii gonan ka wchoglogake' witgake'ne!, wñabgakile' Pilátona' gone' mandad witgake'ne!. 29Na'ch ka biyoll bengakile'ne' yog' daa nyoj lee cho'a xtill' Chioza' gak che', na'ch biletjgake'ne' lee yag cruza' na' jakwash'gake'ne!. 30Na' Chioza' bilise'ne' ladj ben' wetka'. 31Na' ka wde bibane', zan lla bli'lawe' ben'ka' wno wnal'gake'ne' dezd ka wzee Galileana' zeje' Jerusalénna!. Na' legaken' choe'lengakee ben' wlall' chechoka' xtilleena' naa.

32'Na' chyixje'into' le' dill' wen dill' kob che Jesúza' daa bcheb Chioza' lao dii xozxto'choka'. 33Na' naa ba biyoll bido bene' ka bchebe' gone' checho, cho' nakcho xiin dia chegake', daa bisbane' Jesúza' ladj ben' wetka'. Gok ka nyoj Salmo de wchopina', gana' nan: "Lin' nako' Xiin, na' naa, daa solo inabi'o na' inezi ben' nadaan nak' Xo!." 34Chioza' ba bi'e dill' yilise'ne' ladj ben' wetka' na' bichga guete', na' wne': "Dii li gaklen' le' dii xen wal ka bcheb' lao dii Davina!." 35Na' lekzka' sto Salmo nan: "Bi wi'o latj gooll' iteb beli chen cha'ni, daa nak' lall' no!." 36Na' nezicho dii Davina' goklene' dii xozxto'choka' kon ka bllia Chioza' bi'a gone', na' ka bllin lla wite' jakwash'gake'ne' gana'

bkwash'gake' dii xozxtoe'ka', na' gooll' bteb beli chen che'na'.
 37Per kwerp che Jesúza', beena' bisban Chioza' ladj ben' wetka',
 bi wlliyai'n. 38Le' ben' bish', chyixje'into' le' Chioza' chizi'xene'
 xto!' nottez ben' chonlilallee Jesúza'. 39Nottez ben' gonlilalleene'
 yiyake' ben' li ben' shao' lao Chioza'. Aga no yiyak ben' li ben'
 shao' lao Chioza' daa chone' daa na ley che dii Moiséza'. 40Na'
 li wsak' kwenche ki gak chele ka bzej dii ben'ka' be' dill' daa
 goll Chioza' legake' kani'yi, gana' nan:

41Li wwia, le' ben' wenle. Li yibani.

Wllin lla kwiayi'le daa bi chajle'le.

Llaki mbanle gon' to dii wal

dii bi shajle'le la'kzi shi no ina le' ki gak.

42Na' ka bichejlen Páblona' ben'ka' nakgake'ne' txen gana'
 chdop chllag ben' Israelka', na'ch ben'ka' bi nak ben' Israel
 wñabgakile'ne' we'lene' legake' cho'a xtill' Chioza' lla sabda'
 sto. 43Na' ka billeshgake', zan ben' Israelka', na' zan ben'ka'
 chongake' legake' txen choe'la'ogake' Chioza', janogake' Páblona'
 len Bernabéna'. Na' Páblona' len Bernabéna' gollgake' legake'
 chiya! soachehgage' gonlilall'gake' Chioza' daa le chakile'
 legake'.

44Na' ka biza xman'na' sto, llana' chombaan ben' Israelka', zi
 lat'z ki biya ben'ka' lle' yella' bdop kwenche wzenaggake' cho'a
 xtill' Chioza'. 45Na' ka ble'i ben' Israelka' ben' zan ndop nllag,
 na' gokxe'gakile' Páblona' na' wnegake' zban che dillaa cho'e,
 na' biya dii wnegake' che'. 46Na'ch Páblona' len Bernabéna' aga
 bblebgake', na' gollgake' ben' Israelka':

—Benan byen zigaate le' wzajniinto' cho'a xtill' Chioza'. Per
 daa bi cheenile wzenaglen, chli'le bi chido!le gon Chioza' ye!
 mban chele zejli kani, na' solochoklento' naa wzajniinto'n ben'ka'
 bi nak ben' Israel. 47La' dgan non Xancho Chioza' mandad
 gonnto', na' ne':

Ba bzoa' li' kwenche gon' ka sho' beeni' cha'na' loo
 yichjlall'do' ben'ka' bi nak ben' Israel.

Na' yoo ben'ka' lle' doxen yell-lioni ka gongake'
 kwenche yilagake' na' bi kwiayi'gake'.

48Na' ben'ka' bi nak ben' Israel, ka bengakile' daa wna
 Páblona' len Bernabéna', le bibagakile' na' wnegake' le mba

nak cho'a xtill' Chioza'. Na' yog' ben'ka' ba wlej Chioza' kwenche gat' yel' mban chegake' zejli kani benlilall'gake' Jesúza'. ⁴⁹Ka' gok blilij cho'a xtill' Xancho Jesúza' doxen na'. ⁵⁰Na' ben' Israelka', ben'ka' bi wyajle'gake' che Jesúza', wlooyel'gake' bal' noolə wnia'ka', ben'ka' choe'la'o Chioza', na' ben' byoka' le zeyi cheyin yella' kwenche bengakile' Páblona' na' Bernabéna' zban, na' bilaggake' legake' yell che'ka'. ⁵¹Na'ch Páblona' len Bernabéna' ka biza'gake' wllib ni'eka' bishte che yella' daa bi goklall' ben'ka' lle' na' wzenaggake' che Chioza'. Na' wyajgake' yell Icóniona'. ⁵²Na' ben'ka' nonlilall' Jesúza' wzoachgagake' mbalaz, na' Espíritu Sántona' wñabi'e loo yichjlall'do'eka'.

Bllin Páblona' len Bernabéna' Icóniona'

14 ¹Na' ka bllin Páblona' len Bernabéna' Icóniona', wyajgake' gana' chdop chllag ben' Israelka' choe'llwillgake' Chioza'. Na' Chioza' goklene' legake' ka be'gake' cho'a xtilleena' kwenche ben' zan benlilall'gake' Jesúza', ka ben' Israel na' ka ben' bi nak ben' Israel. ²Na' ben' Israelka', ben'ka' bi goni shajle' che Jesúza', wlooyel'gake' bal' ben'ka' bi nak ben' Israel kwenche gokzbangakile' ben'ka' nonlilall' Jesúza'. ³Daan bigaan Páblona' len Bernabéna' Icóniona' ssha, na' be'gake' xtill' Xancho Jesúza' na' bi bllibgake', la' nxenilall'gake' zoalen Xancho Chioza' legake'. Na' Xanchona' goklene' legake' bli'gake' yel' wak che'na' kwenche gokbe'i ben' nan choe'gake' dill' li. ⁴Na' ben' Icónioka' gogkake' choplə, bale' wda'gake' ben' Israelka' na' zi bale' wda'gake' Páblona' len Bernabéna'. ⁵Na'ch ben' Israelka' bengake' txen ben'ka' bi nak ben' Israel na' gogkake' toz len ben' wñabia'ka', goklall'gake' yiya dii gongakile' Páblona' len Bernabéna' na' wlligake' legake' yaj. ⁶Na' ka wñezi Páblona' len Bernabéna' ka ba chwia ben'ka' gongakile' legake', lii biza'tegake', wyajgake' yell Lístrana' na' yell Dérbena', yellka' llia gana' mbani Licaóniana'. ⁷Na' lekzka' be'gake' dill' wen dill' kob che Jesúza' na'.

Blligake' Páblona' yaj yell Lístrana'

⁸Na' Lístrana' jadi'gake' to ben' nxinj ni'ena' ka goljtie'. Na' bi chak see daa bi chzoa chech ni'ena'. ⁹Na' chi'e chzenague'

dillaa choe' Páblona'. Na' Páblona' chwie'ne' na' gokbe'ile' chajli'e wak yiyon Chioza' le' kwenche gak see. ¹⁰Na'ch golle'ne' zillj:

—Wzolla'.

Na' lii wzolla'tie' na' gok wzee. ¹¹Ka ble'i ben' Lístraka' daa ben Páblona', wzolo chosyaagake' chnegake' xtillieeka' daa nak dill' Licaonia che'gake':

—¡Ba betj chios chechoka' gani zoacho na' chle'gakichone' ka benech!

¹²Na' wnegake' Bernabéna' nake' chios che'ka' beena' nsi'gake' Júpiter, na' Páblona' nake' chios che'ka' beena' nsi'gake' Mercurio, la' len' cho'e dillaa. ¹³Na' bxoz che yoodo' che Júpitera', daa zoa katez choogake' yella', jwee goonka' na' nwalee legakb bga de yej, na' le', na' ben'ka' ndop nllag na', goklall'gake' witgake' legakb kwenche we'la'ogake' Páblona' len Bernabéna'. ¹⁴Na' ka gokbe'i Bernabéna' len Páblona' bin gon ben'ka', na' wzologake' bchez' xe'ka', la' chakgakile' dii mal nleban chon ben'ka'. Na' jsedogake' ladje'ka', na' wnegake' zillj, che'gake':

¹⁵—Le' ben'do', ¿berache chonzle ka'? Lekzka' ben' yellioz neto', ka le', na' ba bidnto' kwenche wzajniinto' le' chiya! kweyjichjle diiki bibi zak' na' gonlilall'le Chios, ben' yaa ben' banna', beena' ben yabana', yell-lioni, na' nisdona', na' yog' dii de xan yabana', lo yell-lioni, na' loo nisdona'. ¹⁶Kani'yi Chioza' bwialoze' che benecha' bengake' kon daa nazan chegake'. ¹⁷Na' la'kzi bwialoze' ka bengake', bliile' legake' yel' wak che'na' kwenche ka' gakbe'gakile' zoe'. La' len' chone' yeja' kwenche chak dii chaz chaancho na' chat' dii cheej chaocho kwenche soacho mbalaz.

¹⁸Na' la'kzi Páblona' len Bernabéna' gollgake' ka', kanj goongakile' bi witgake' goonka' daa nan we'la'ogake' legake'.

¹⁹Na' bllin baj ben' Israelka' zaak Antioquíana' na' Icóniona', na' wlooye'gake' ben' Lístraka' kwenche blligake' Páblona' yaja'. Na' daa gogkakile' ba witen', na'ch bxobgake'ne' jadixjgake'ne' cho'a yella'te. ²⁰Na' ben'ka' nonlilall' Jesúsza' bdi'a bllaggake' gana' de Páblona', na' biyase' biyo'e yella' sto shii. Na' betiyo bizee len Bernabéna' na' biyajgake' yell Dérbena'.

²¹Na' lekzka' wdixjeegake' dill' wen dill' kob che Jesúsza' yell Dérbena', na' ben' zan benlilall'gake' Jesúsza'. Na'tech, biza'gake' bidegake' yell Lístrana', Icóniona' na'ch Antioquíana'. ²²Na' to to

yellka' gana' bidegake' btipgake' lall' ben'ka' ba chajle' che Jesúza' kwenche soachehgake' gonlilall'chgake'ne'. Na' gollgake' chiyal' yizo yizakicho bittez dii yen ile'icho kwenche gak lljazoalencho Chioza' gana' chnabi'e. ²³Na' to to yellka' wlelgake' to chop ben' koo lall' na'gake' ben'ka' ba nonlilall'gake' Jesúza'. Na' wzoagake' wbas' be'llwillgake' Chioza', na'ch bengake' legake' lall' na' Xancho Jesúza', beena' nonlilall'gake'.

**Páblona' len Bernabéna' biyajgake' yell
Antioquiana' daa Iliá gana' mbani Síriana'**

²⁴Na' wde Páblona' len Bernabéna' gana' mbani Pisídiana' na' bllingake' gana' mbani Panffliana'. ²⁵Na' be'gake' cho'a xtill' Chioza' yell Pérgena'. Na'ch biza'gake' ziyajgake' yell Atáliana'. ²⁶Na' yell Atáliana' biyoogake' to loo barkw na' billingake' yell Antioquíana' gana' lle' ben'ka' bengake' legake' lo na' Chioza' kana' bsel'gake' legake' lljengake' llinna' daa ba biyoll jengake'. ²⁷Na' ka billingake' yell Antioquíana', btopgake' ben'ka' nonlilall' Jesúza', na' gollgake' yog' daa goklen Chioza' legake' to to yellka'. Na' lekzka' gollgake' ka ben Chioza' bi'e latj che ben'ka' bi nak ben' Israel kwenche benlilall'gake' Jesúza'. ²⁸Na' Páblona' len Bernabéna' bigaangake' ssha yell Antioquíana' len ben'ka' nonlilall' Jesúza'.

Bidopgake' Jerusalénna' na' be'gake' dill'

15 ¹Shlak zoa Páblona' len Bernabéna' yell Antioquíana', bllin bal' ben' za' Judeana' na' wzologake' bli' bsdgakile' ben'ka' nonlilall' Jesúza' nan chiyal' gongake' ka na ley che dii Moiséza' na' sho'gake' sen' daa le circuncisión kwenche Chioza' wi'e yel' mban chegake' zejli kani. ²Na' Páblona' len Bernabéna' gokdil' lengake' ben' Judeaka'. Na' daa gok ka', ben' Antioquíaka' bengake' toz dill' wsel'gake' Páblona' len Bernabéna' na' sto chop ben' yell Jerusalénna' kwenche llje'lengake' postlka' dill' len ben'ka' ngoo lall' na'gake' ben'ka' nonlilall' Jesúza' Jerusalénna', cheyi daa chli' chsedi ben' Judeaka' bllin Antioquíana'.

³Na' wloogake' nez kon ka goll ben'ka' nonlilall' Jesúza' Antioquíana', na' lo ka zejgake' wdegake' gana' mbani Feníciana' na' gana' mbani Samáriana', na' gollgake' ben'ka' nonlilall' Jesúza'

ka ba wyanchga beṅ'ka' bi nak beṅ' Israel ba yoogake' lo xnez Chioza'. Na' ka beni beṅ'ki dga, le bibagakile'.

⁴Ka bllin beṅ'ki Jerusalénna', beṅ'ka' nonlilall' Jesúza' len beṅ'ka' ngoo lall' na' legake' na' postlka' blebgake' legake'. Na' Páblona' len Bernabéna' gollgake' legake' yog' daa ba goklen Chioza' legake' jengake'. ⁵Na' baḷ fariseoka' nonlilall' Jesúza' wzolla'gake' na' wngake':

—Beṅ'ka' bi nak beṅ' Israel chonan byen sho'gake' seṅ daa le circuncisión ka solo gonlilall'gake' Jesúza', na' chiyaḷ gongake' ka na ley che dii Moiséza'.

⁶Na' bdoṗ bllag postlka' len beṅ'ka' ngoo lall' na'gake' beṅ'ka' nonlilall' Jesúza' kwenche wwiagake' naklə ka sho' xnezi dga. ⁷Ba gok ssha chdiḷ cho'a xtilleeka' ka wzolla' Pédrona' na' golle' legake':

—Le', beṅ' bishaa, ba nezczile kana' wlej Chioza' nad' ladjleni kwenche llji'a dill' wen dill' kob che Jesúza' lao beṅ'ka' bi nak beṅ' Israel kwenche gonlilall'gake'ne'. ⁸Chioza', beena' nombi'e yichjlall'do' yog' beṅ', bli'e nan chlebe' beṅ'ka' bi nak beṅ' Israel daa bselee Espíritu Sántona' zoe' loo yichjlall'do'eka' kon ka bene' checho. ⁹Toz ka ba ben Chioza' checho na' che beṅ'ka', la' lekzka' ba biyib bixise' loo yichjlall'do'eka' daa ba nonlilall'gake' Jesúza'. ¹⁰Na' ¿berache bi chajle'le daa ba ben Chioza'?, na' ¿biche cheenile gon beṅ'ka' bi nak beṅ' Israel diiki? La' ni cho' ni dii xozxto'choka' biṅ' sakicho gonchon. ¹¹Lete chajle'cho daa chaki Xancho Jesúza' chon' ba bisle' cho', na' ka'kz legake'.

¹²Na' yoguee wzoagake' llizə bzenaggake' shlak Páblona' len Bernabéna' be'gake' dill' ka ben Chioza' goklene' legake' bengake' yeḷ' wakka' ladj beṅ'ka' bi nak beṅ' Israel. ¹³Na' ka biyoll be' Páblona' len Bernabéna' dill', na'ch wne Jacóbona', golle':

—Le' beṅ' bish', cheenid' wzenagle dga inia' le': ¹⁴Simón Pédroni ba bi'e dill' ka wzolo Chioza' wleje' beṅ' ladj beṅ'ka' bi nak beṅ' Israel kwenche gakgake' lall' nee. ¹⁵Na' dga gok ka' chidil-lebin daa bzej dii beṅ'ka' wdixjee daa goll Chioza' legake' kani'yi, gana' nan:

¹⁶Ka te dga, yiyed'

na' wzoa' to xiin dia che dii Davina' inabi'e.

La'kzi ye| w_nabia' che'na' nakan ka to yoo dii ba
biyinj,

wllin lla yichisa'n.

17 Gon' dga kwenche yog' ben'ka' bin' gonlilall'gake' nad'
yiyiljgake' nad',

lente yog'lo| ben'ka' bi nak ben' Israel, ben'ka' ba nak
lall' na'.

18 Kan' wna Xancho Chioza', beena' bzajniile' ben'ka'
diiki kani'teyi.

19 Na'chan nia' le', bi chiyal' ye'cho ben'ka' bi nak ben' Israel,
ben'ka' ba nonlilall'gake' Chioza', gongake' dii bi chonan byen.

20 Kon wzejcho to yish ye'chogake' bich gaogake' ye| wawa' daa
chllia ben' lao lwaa lsak' chios che'ka', na' bi gaogake' bel' che
bayix'ka' bi wlalj xchema', na' ni bi gaogake' xchen bayix'ka'. Na'
lekzka' bi inelengzake' xiin xool ben'. 21 La' kani'teyi zoakzə ben'
to to yell chzajni'gakile' ben' ley che dii Moiséza', na' lennan' ni
chlabgake' naa gana' chdop chllaggake' choe'lwillgake' Chioza'
yog' lla sabd.

Yisha' daa bse|'gake' lao ben'ka' bi nak ben' Israel

22 Na'ch postlka', na' yog' ben'ka' nonlilall' Jesúsza' len
ben'ka' ngoo lall' na' legake' bengake' toz dill' wlejgake' to chop
ben' ladje'ka' kwenche shajlengake' Páblona' len Bernabéna'
Antioquíana'. Na' wlejgake' Judas, beena' lekzka' lie' Barsabás,
na' Sílaza', nakgake' ben' mbejlawin ladj ben'ka' nonlilall' Jesúsza'.

23 Na' bse|'lengake' ben'ki to yish dii bzejgake', na' ki choe'n dill':

“Le' ben' bish' na' le' ben' zannto', le' bi nakle ben' Israel
na' zoale yell Antioquíana', na' doxen gana' mbani Síriana' na'
Cilíciana', neto' postl na' ben'ki ngoo lall' na' ben'ka' nonlilall'
Jesúsza' Jerusalénni, na' yog' ben' bish'choki lle' ni, chwapnto' le'
chiox. 24 Ba wpezinto' ba bchej to chop ben' ladjnto'ni bidgake'
to bia'lall'zgake' gana' zoale, na' benllejgakile' le' daa wnagake'
chiyal' sho'le sen daa le circuncisión, na' chiyal' gonle doxen
ka na leya'. 25 Daan, ba bennto' toz dill' wlejnto' ben'ki chop
ladjnto'ni zidwiagake' le'. Na' chse|'lennto' legake' Pábloni na'
Bernabéni, ben' bish'choki le chakicho, 26 ben'ki chzoa dii nxoll
ye| mban che'ka' daa chongake' xshin Xancho Jesucrístona'. 27 Na'

chse|nto' be|'ki le Judas na' Silas, na' legake' wzajni'gakile' le' dga chzejnto' le'. ²⁸Na' wyazlall'nto' ka bzajnií Espíritu Sántona' neto' bi wzoanto' le' gonle dii bi yizoile. Diikizə chakinto' chonan byen bi gonle: ²⁹Bi gaole ye|' wawa' daa chllia be|' lao lwaa lsak' chios che'ka', na' ni bi gaole bel' che bayix'ka' shi bi wlalj xchema', ni bi gaole xchen bayix'ka', na' lekzka' bi inelenzle xiin xool be|'. Shi wzenagle diiki nannto' le', wenkzan chonle. Ka'tz nak dill'ki chzejnto' le'."

³⁰Na'ch ka bllin be|'ka' bse|'gake' Antioquíana', na' btopgake' yog' be|'ka' nonlilall' Jesúza', na' be'gake' legake' yisha' daa nox'gake'. ³¹Na' ka blabgake'n le bibagakile' ka dillaa choe'n. ³²Na' ka nak Júdaza' na' Sílaza', daa lekzka' nakgake' be|' chyixjee daa che' Chioza' legake' be'gake' dill' zan dii btipan lall'gake' na' goklenan legake' wzoatip wzoashoshchgake'. ³³Na' biyoll wzoalengake' legake' shloll wen, na'ch be|'ka' nonlilall' Jesúza' Antioquíana' mbalaz bilaagake' legake' dill' na' biyajgake' kwit be|'ka' bse|' legake'. ³⁴Na' Sílaza' wyazlallee igaane' na'z. ³⁵Páblona' na' Bernabéna' bigaangake' Antioquíana'. Na' len zan be|' yoblə bli' bsedchgakile' be|' cho'a xtill' Xancho Jesúza'.

Sto shii wyaj Páblona' yellka' gana' ba ji'e cho'a xtill' Chioza'

³⁶Na' ba gok zan lla zoagake' Antioquíana' ka goll Páblona' Bernabéna':

—Shajcho dii yoblə yellka' gana' ba je'cho cho'a xtill' Xancho Jesúza' kwenche lljawiacho nak chak che be|'ka' ba wyajle'.

³⁷Na' Bernabéna' goklallee wche'gake' Juan, beena' lekzka' nsi'gake' Marcos. ³⁸Na' bi gooni Páblona' wche'gake'ne', la' kana' bche'gake'ne' bixonje' na' bkwaane' legake' Panfíliana', na' bich jenlene' legake' xshin Chioza'. ³⁹Na' ni cheyin, gokguedgake' na' wlaagake'. Bernabéna' wzee bchi'e Márcona' na' wyoogake' to loo barkw na' wyajgake' Chíprena'. ⁴⁰Na' Páblona' wzee bchi'e Sílaza'. Na' be|'ka' lle' Antioquíana', be|'ka' nonlilall' Jesúza', wñabgakile' Xancho Chioza' gaklene' legake' gattezə shajgake'. ⁴¹Na' Páblona' len Sílaza' wdegake' gana' mbani Síriana' na' Cilíciana' kwenche goklengake' be|'ka' nonlilall' Jesúza' wzoatip wzoashoshchgake'.

Timotewa' bene' txen Páblona' len Sílaza'

16 ¹Na'ch Páblona' len Sílaza' bllingake' yell Dérbena', na'tech wyajgake' yell Lístrana'. Na' na' zoa to bi' xkwid' nonlilall'b' Jesúza' leb' Timoteo. Nakh' xiin to noolə Israel, na' nooli nonlilallee Jesúza', per xabaa nake' beñ' griego. ²Na' beñ' Lístraka' len beñ' Icónioka' nonlilall' Jesúza' be'gake' dill' le wen nsa' cheb'. ³Na' Páblona' wñabile'b' shajlem' legake', na' wlo'eb' señ daa le circuncisión kwenche bi gakzbani beñ' Israelka' leb', la' nezgakile' xabaa bi nake' beñ' Israel. ⁴Na' yog' yellka' gana' wdegake' be'lengake' beñ'ka' nonlilall' Jesúza' dill' che diika' chiyal' gongake', diika' be' postlka' dill' kon beñ'ka' ngoo lall' na'gake' beñ'ka' nonlilall' Jesúza' yell Jerusalénna'. ⁵Na'ch beñ'ka' nonlilall' Jesúza' yellka' benlilall'chgake'ne' do yichj do lall'gake', na' lla kon lla wyanchgake'.

Ble'do'i Páblona' to beñ' Macedonia chñabile'ne' shaje' lalle'na'

⁶Páblona' len Sílaza' na' Timotewa' to wdegake' gana' mbani Frígiana' len Galáciana', daa bi be' Espíritu Sántona' latj llje'gake' cho'a xtill' Chioza' gana' mbani Ásiana'. ⁷Na' ka bllingake' gaoz yell-lío gana' le Misia, wnalall'gake' shajgake' gana' mbani Bitíniana', na' lekzka' bi be' Espíritu Sántona' latj shajgake' na'. ⁸Na'ch wdegake' yell-lío che Mísiana' bllintegake' yell Tróaza' daa lla cho'a nisdona'. ⁹Na' lo yela' Chioza' bene' ka ble'do'i Páblona' to beñ' byo, beñ' Macedonia, zie' chat'yoile'ne', chi'ene': “Dagach Macedóniani kwenche gakleno' neto.” ¹⁰Na' ka biyoll ble'do'i Páblona', lii bsini'ate chento' kwenche wyajnto' Macedóniana', la' wyajniinto' Chioza' cheenile' shajnto' llje'lennto' beñ'ka' lle' na' dill' wen dill' kob che Jesúza'.

Páblona' na' Sílaza' wyajgake' Filípoza'

¹¹Na' yell Tróaza' wyoonto' barkwa' na' wyajnto' shl'icha gana' lla to yell-lío lo nisdona' daa le Samotracia. Na' betiyo bllinnto' to yell dii le Neápolis. ¹²Na' wza'nto' Neápoliza' wyajnto' yell Filípoza'. Nakan to yell ga lle' beñ' Rómaka', na' nakan to yell xen dii zakii gana' mbani Macedóniana'. Na' bigaannto' na' chop shon lla. ¹³Na' shlak zoanto' na', lla sabda' bchejnto' yella' na'

wyajnto' to cho'a yao ga chje'lwillgake' Chioza'. Na' jche'nto' na', be'lennto' dill' noolka' bdop bllag. ¹⁴Na' ladj noolka' len to beñ' le Lidia. Nake' beñ' yell Tiatira, na' chitee lech' wen dii nak de morad. Na' choe'lawee Chioza' na' Xancho Chioza' bene' kwenche bzenague' dillaa choe' Páblona'. ¹⁵Na' ka wde wchoe' nisa' do bxoone', na' wne' neto':

—Shi chakile dii li ba nonlilallaa Xancho Jesúza', li sho' na' yigaanle lillaa.

Na' bene' byen jagaannto' lille'na'.

¹⁶Na' to shii ka zejnto' gana' choe'lwillgake' Chioza', na' billagnto' to bi' nool wew' yoob' dii xiwaa, na' dii xiwaa chonan kwenche chneyaab'. Na' nakb' to bi' ndoo lla yel chom' xshin beñ', na' dii xen chon xama' gan daa chneyaab'. ¹⁷Na'ch bi'ni wnob' Páblona' shlak zejlennto'ne', chosyaab' zillj, nab':

—Ben'kin chongake' xshin Chioza', beena' nak beñ' choo beñ' xen, na' chzajni'gakile' beñ' nez li che Chioza' gana' sho'cho kwenche bi kwiayi'cho.

¹⁸Na'ch kon ka' w nab' yog' lla, na' gokzedi Páblona', na'ch biyechje', golle' dii xiwaa yoob':

—Kon yel' wñabia' che Jesucristona' nia' li' bichej.


Na' lii bichejte dii xiwaa.

¹⁹Na' ka gokbe'i xam'ka' bich bi mech gongake' gan, na'ch be'x'gake' Páblona' len Sílaza' na' jwa'gake' legake' lao joschiska'. ²⁰Na' ka bllinlengake' legake' lao joschiska', na' che'gake':

—Ben' Israelki chta chnegake' beñ', lallchoni. ²¹Na' chli' chsedgakile' beñ' dii bi chiyal' goncho ni bi chiyal' wlebcho, cho' nakcho beñ' Roma.

²²Na' beñ' zan bdi'a na' wnegake' zban che Páblona' len Sílaza'. Na'ch joschiska' bchogbia'gake' wdingake' xe'ka' na' bet wdingake' legake'. ²³Na' ka wde bet wdinchgagake' legake', na' wloogake' legake' lillyana', na' gollgake' beena' chap lillyana' gape' legake' byendad kwenche ki yilagake'. ²⁴Na' daa gollgake' beeni ka', wlo'e legake' bill' xyoote na' bni'e yen ni'eka' to lee kwag' dii nyidjgake'.

²⁵Na' do ka chel Páblona' len Sílaza' choe'lwillgake' Chioza' na' cholgake' choe'la'ogake'ne', na' ben'ka' sto de lillyana' chzenaggake' ka chongake'. ²⁶Na' tokonganzi wde to bedxo'



*Wlo'e legake' bill' xyoote na' bñi'e yen ñi'eka'
to lee kwag' dii nyidjgake'. Hch. 16:24*

xen wal na' bñiban doxen lillyana'. Na' lii byaljten, na' gdenka' diika' nchejgake' beñ'ka' de lillyana' tolazzin biyellgakan. 27 Na' beena' chap lillyana' bibane' na' ble'ile' ba nyaljchee lillyana', na'ch wleje' spad che'na' nan yiyit kwine' daa gokile' yog' beñ'ka' de lillyana' ba billeshgake'. 28 Na' Páblona' besyee, golle'ne':

—¡Bibi goni kwino'! Nikz lle' yog'nto'.

29 Na'ch beena' chap lillyana' wñabe' to yi' na' wyoodoe' jawie' gana' yoo Páblona' len Sílaza', na' lii bchek'te xibe'na' lawe'ka' do chxizze' daa le bblebe'. 30 Na' lii bibejtie' legake' lillyana', na' chi'e:

—¿Le', beñ'do', beran chiya! gon' kwenche bi kwiayaa?

31 Na' gollgake'ne':

—Benlilaloo Xancho Jesucrístona', li' na' do xiin xoolo', kwenche yisle' le' na' bi kwiayi'le.

32 Na' be'lengake' le' na' beñ'ka' zoa lille'na' cho'a xtill' Xancho Jesúza'. 33 Na'ch beena' chap lillyana' wdibe' we'na' lliagake', la'kzi nakan wal chel. Na' lekzka' yog'lo'tie' lii wchoategake'

nisa'. ³⁴Na' bichi'e Páblona' len Sílaza' lille'na' na' bweej bwawe' legake'. Na' le chibayi beeni do xiin̄ xoole' daa ba nonlilall'gake' Chioza'.

³⁵Na' ka wyeeni', joschiska' bsel'gake' ben' jellgake' beena' chap lillyana' yisane' legake' kwenche yiyajgake'. ³⁶Na' beena' chap lillyana' golle' Páblona':

—Ba bsel' joschiska' ben'ki, na' nagake' ba de lsens yisan' le'. Na' wak yiyajle naa, kochno bi goni le'.

³⁷Na' Páblona' golle' legake':

—Neto' ndento' kwent yell Rómana', na' ni bi biyiljni'agake' bin bennto' ba bet wdingake' neto' lao lkwe' ben' na' wdixjzgage' neto' lillyani. ¿Ana' naa cheenzgakile' yisangake' neto' do ngash'zə? Yidch kwingake' yibejgake' neto'.

³⁸Na' jayellgake' joschiska' daa goll Páblona' legake', na' joschiska' le bllebgake' ka wnezgakile' Páblona' len Sílaza' ndegake' kwent ka ben' Roma. ³⁹Na'ch wyaj joschiska' jaye'xengake' Páblona' len Sílaza' na' bibejgake' legake' lillyana', na' got'yogakile' legake' bich yigaangake' yella'. ⁴⁰Na' ka bichej Páblona' len Sílaza' lillyana', na' biyajgake' lill Lídiana' jawiagake' ben'ka' ba nonlilall' Jesúza' na' btipchgage' lall'gake', na'tech biza'gake'.

Bta bne ben' malka' ben' Tesalónicaka'

17 ¹Na' ka biza' Páblona' len Sílaza', wdegake' yell Anfípoliza' na' yell Apolóniana', na' bllingake' yell Tesalónicana' gana' zoa yooná' gana' chdop chllag ben' Israelka' choe'lwillgake' Chioza'. ²Na' lo shon̄ xman yog' lla sabdka' wyaj Páblona' gana' chdop chllaggake', kon ka yooloe' chone', na' be'lene' legake' Cho'a Xtill' Chioza', ³bzajniile' legake' Crístona', beena' wlej Chioza' inabi'e, benan byen biya dii wxak'zi'e na' wite', na' bibane' ladj ben' wetka'. Na' chi'e legake':

—Jesúza', beena' choe'len' le' xtilleena' naa, len' Crístona', beena' wlej Chioza' inabi'e.

⁴Na' bal ben' Israelka' wyajle'gake' na' bengake' txen Páblona' len Sílaza', na' lekzka' zan ben' griegoka', ben'ka' ba choe'la'ogake' Chioza', wyajle'gake' che Jesúza', na' lekzka' zan noolka' zakii. ⁵Na' ben' Israelka' bi wyajle', gokxe'gakile' Páblona' len Sílaza',

na' btopgake' beṅ' wdallagka' nak beṅ' mal, na' wlekgake' to dii zed yella'. Na'ch wyajgake' lill beena' le Jasón jadiljgake' Páblona' len Sílaza' kwenche gongake' legake' lo na' beṅ' yellka'. ⁶Na' daa bi zoa Páblona' len Sílaza' na', na'ch wdoyogake' Jasónna' na' zi to chop beṅ'ka' nonlilall' Jesúza' na' jwa'gake' legake' lao joschiska'. Na' wnegake' zillj che'gake':

—Beṅ'ka' chda chbekgake' dii zed doxen yell-lioni ba bla'gake' yell chechoni. ⁷Na' Jasónni ba blebze' legake' lille'na'. Na' ba nakgake' toz bich chzenaggake' daa nllia Césara' bia' goncho, la' nagake' zoa sto beṅ' wṅabia' le Jesús.


⁸Na' beṅ' yellka' len joschis che'ka' bllaagake' na' goklesh'gakile'. ⁹Na' wxenlall' joschiska' bllia Jasónna' mech len beṅ'ka' nakgake'ne' txen, na'ch bisangake' legake'.

Páblona' len Sílaza' wyajgake' Bereana'

¹⁰Na' kon ka goḷ, beṅ'ka' nonlilall' Jesúza' bisa'dogake' Páblona' len Sílaza' kwenche yiyajgake' yell Bereana'. Na' ka bllingake' yella', lii wyajtegake' gana' chdop chllag beṅ' Israelka' choe'lwillgake' Chioza'. ¹¹Na' beṅ' Bereaka' nakchgake' beṅ' wench aga ka beṅ' Tesalónicaka', na' bibagakile' bzenaggake' daa bzajnii Páblona' len Sílaza' legake'. Na' yog' lla biyiljgake' lee Cho'a Xtill' Chioza' shi nakan ka daa chli' chsedgakile' legake'. ¹²Na' zan beṅ' Israelka' zoa na' beṅ'ilall'gake' Jesúza' na' ka'kzə zan beṅ' griegoka', ka beṅ' byoka' na' ka noolka' zakii. ¹³Na'ch beṅ' Israelka' lle' Tesalónicana', beṅ'ka' bi beṅ'ilall' Jesúza', ka wneggakile' Páblona' choe'lene' beṅ' Bereaka' xtill' Chioza', na'ch wyajgake' jata janegake' beṅ' yellka'. ¹⁴Na' beṅ'ka' nonlilall' Jesúza' lii bsel'tegake' Páblona' cho'a nisdo'nalə, na' Sílaza' len Timotewa' bigaangake' Bereana'zə. ¹⁵Na' beṅ'ka' zejlen Páblona' jwa'gake'ne' gana' lliate yell Aténaza'. Na' ka zi yiza'gake' yiyajgake' Bereana', Páblona' golle' legake' ye'gake' Sílaza' len Timotewa' wtalall'gake' shajgake' gana' zoe'.

Páblona' zoe' yell Aténaza'

¹⁶Na' shlak chbez Páblona' Sílaza' len Timotewa' yell Aténaza', le bllaa yichje' daa ble'ile' to ni to na' nzoa beṅ'



Latji len Areópago na' wzoan yell Aténaza'.

Aténaska' diika' choe'la'ogake'. ¹⁷Ni cheyi daan bzajniile' beṇ' Israelka' gana' chdop chllaggake' choe'lwillgake' Chioza', na' len zi xonj beṇ' griego. Na' lekzka' yog' lla wyaje' gana' chak yaana' gana' lle' lla' beṇ' na' be'lene' legake' dill'. ¹⁸Na' baḷ epicúreoka', beṇ'ka' chsedgake' daa bli' bsemi beena' wle Epicúreo, len baḷ estóicoka', wzologake' wdil xtilleeka' len Páblona'. Na' baḷe' che':

—¿Beran naz beeni chshaljchgue'?

Na' zi baḷe' nagake':

—¿Aaga beenin zidye'lene' cho' dillaa daa nan chiyaḷ' we'la'ocho sto chios yoblə?

Wnagake' ka' daa chyixje'i Páblona' legake' dill' wen dill' kob che Jesúza', chi'e legake' bibane' ladj beṇ' wetka'. ¹⁹Na'ch bche'gake' Páblona' to latj gana' nsi'gake' Areópago ga chdopgake' choe'gake' dill', na' ka bllinlengake'ne', che'gake':

—Cheeninto' inezinto' bi dii koban chli' chsedilo'. ²⁰La' ndantekzi nak dill'ki choo, na' cheeninto' inezinto' bi zejin.

²¹La' yog' beṇ' Aténaska' na' lekzka' beṇ' zit'ka' zoa na', bichkzə bilə chongake', to chinozgake' bi dill' kob wzenaggake' na' to xtillii daazə choe'gake' yog' lla.

²²Na'ch Páblona' wzie' ladje'ka' gana' nzi' Areópago, na' golle' legake':

—Le' beṇ' Atenas, chakbe'id' le chibaile choe'la'ole diika' noni chios chele. ²³La' ba ble'id' yell cheleni to to latj gana' chgoole diika' balaan, na' ble'id' to ga da' to dill' dii na: “Che

Chios, beena' kono nombia'." Na' beena' chgoole balaan la'kzi bi nombia'lene', dill' che'nan' zidyen'le' le' naa.

24'Chios, beena' ben yell-lioni na' yog' dii de lawinna' nake' Xan yabana' na' yell-lioni. Aga zoe' loo yoodo' dii choni ni'a na' ben'. 25'Na' aga bi chyalji Chioza' dii inacho gak gon ben' yell-liona' che'. La' len' none' yel' mban che yog'lolcho, na' none' bishbe checho, na' yog' bi dii de checho.

26'Len' bxe bsile' to ben' yell-lion, na' yog'lolcho cho' nakcho xiin dia che beena' bxe bsile', na' le'kze' ba nllie' bia' bal yiz soacho yell-lioni na' gana' soa to tocho. 27'Na' bzoe' cho' yell-lioni kwenche yiyilcho nakan goncho gombia'chone'. Na' dii li gal' gllin zelen Chioza' to tocho, 28'la' len' chone' ka mbancho na' ka chzo chdacho. Kan' bzej bal ben' sin' cheleka', ben'ka' wngake': "Nakcho xiin Chioza'." 29'Na' daa nakcho xiin Chioza', bi chiya' gakicho nake' to ben' de or, de plat, de yaj, de yag, ka chaljlall' ben'ka' chongake' diiki. 30'Kana'teyi Chioza' bwialoze' ben ben'ka' daa nazan chegake' yel' bi chajni che'ka', per naanlla chone' byen yog'lol ben' lle' doxen yell-lioni yiyaj yilengakile'. 31'La' Chioza' ba bllie' bia' to lla gone' yel' joschis che to to ben' lle' yell-lioni, na' gone' che to toe' kon ka chidolee. Na' ba bliile' cho' beena' wleje' gon yel' joschisa' daa bilise'ne' ladj ben' wetka'.

32'Na' ka bengakile' wna Páblona' Chioza' chisbane' ben' ladj ben' wetka', bale' bxillgake', na' zi bale' gollgake'ne':

—Sto llagalə wzenagnto' cho' cheyi dga choo dill'.

33'Na' biza' Páblona' gana' lle' ben'ka'. 34'Na' bal ben' bengake'ne' txen na' benlilall'gake' Jesúza'. Na' ladje'ka' len to ben' lie' Dionisio, beena' len ben'ka' zakii chdop latja' nzi' Areópago, na' lekzka' sto noolə lie' Dámaris, na' sto chop ben' yoblə.

Biyaj Páblona' yell Coríntona'

18 1Ka wde biza' Páblona' yell Aténaza', na' biyaje' yell Coríntona'. 2Na' ka billine' Coríntona' billague' to ben' Israel lie' Aquila. Na' beeni nake' ben' yell Ponto na' nool che'na' lie' Priscila. Zi' bllinzgake' Coríntona' biza'gake' gana' mbani Itáliana', la' Claudiona', ben' wnabia'na', bisheshe' yog' ben' Israelka' Rómana' gana' zoe'. Na' Páblona' jawie' legake', 3na' daa

nlangake' toz ka llin, bigaanlene' legake', na' wdiagake' yid xa bayix'ka' daa chchingake' lwaa yoo. ⁴Na' yog' lla sabd, Páblona' chaje' gana' chdop chllag ben' Israelka' choe'lwillgake' Chioza', na' chzajniile' ben'ka' lle' na' xtill' Jesúza', ka ben' Israel na' ka ben' bi nak ben' Israel.

⁵Na' Sílaza' len Timotewa' biza'gake' Macedóniana' na' bllingake' gana' zoa Páblona'. Na' daa bllingake', bich bi llin yoblə ben Páblona', san toz xshin Chioza' bene' na' bzajniile' ben' Israelka' nan Jesúza' nake' Crístona', beena' wlej Chioza' inabi'e. ⁶Per wzololəgake' chakdil-lengake'ne' na' wnegake' zban che', na' wllib xalaane'na' lawe'ka' kwenche bli'e nan chbejyichje' legake', na' golle':

—Le'zkzan wlliyi' kwinle. Aga bi dol' gap' nad'. Na' naa lljali' lljasedid' ben'ka' bi nak ben' Israel.

⁷Na'ch bizee kwite'ka' na' biyaje' lill to ben' le Justo, beena' choe'la'o Chioza', na' zoa lille'na' gao gana' chdop chllag ben' Israelka' choe'lwillgake' Chioza'. ⁸Na' to ben' le Crispo ngoo lall' nee chgwee xnezi cheyi diika' chon ben' Israelka' gana' chdop chllaggake', na' do xiin xooole' wyajle'gake' che Xancho Jesúza'. Na' ben' zanch ben' Coríntoka', ka bengakile' xtill' Chioza' daa be'len Páblona' legake', wyajle'gake' na' wchoagake' nisa'. ⁹Na'ch to lle' bli'lao Xancho Jesúza' Páblona', na' golle'ne':

—Bi illebo'. Be'ch xtillaana' lao ben'ki na' bi so' llizə. ¹⁰Nad' zoalen' li', na' bi wi'a latj no bi goni li', la' ben' zan zi' gombia'gake' nad' yelli.

¹¹Na' bigaan Páblona' Coríntona' twiz yoo gashj bli' bsdile' ben' cho'a xtill' Chioza'.

¹²Na' kana' chnabia' beena' le Galión gana' mbani Acáyana', ben' Israelka' gokgake' toz bex'gake' Páblona' na' bche'gake'ne' gana' chon Galiónna' yel' joschisa'. ¹³Na' che'gake' Galiónna':

—Beeni chde' chgooyelee ben' kwenche we'la'ogake' Chioza' nlla'lə aga ka na ley che Rómána' daa chnabia' cho'.

¹⁴Ka nan ine Páblona', lii wnete Galiónna' ben' Israelka', chi'e:

—Ka nak dga chaole xya, shi bi dol' nap beeni wa shi bi xya wal bene', wak gon' yel' joschis chelena'. ¹⁵San shi chaole xya che dill' daa cho'e, na' daa chzetje' le ben', na' che ley chelena', bi nakan ka dii gon' yel' joschis cheyin. Le'zə, li wwia naklə gonlen.

16 Na' bibeje' legake' gana' chone' yel' joschisa'. 17 Na'ch yog' ben' griegoka' bex'gake' Sósteneza', beena' chgoo xnezin cheyi diika' chon ben' Israelka' gana' chdop chllaggake' choe'lwillgake' Chioza', betsodgake'ne'. Na' chwiazə Galiónna' bikzə bi golle' legake'.

Páblona' biyaje' yell Antioquíana'

18 Ka wde gok ka', Páblona' bigaanche' sshach Coríntona'. Na'ch bilēe dill' ben'ka' nonlilall' Jesúza' na' bizee kwenche shaje' gana' mbani Síriana'. Na' Priscílana' len Aquílana' zejlengake'ne'. Na' ka zi' sho'gake' loo barkwa' yiza'gake' yell Cencreana', Páblona' bshib yichje'na' kon ka nchebe' gone' lao Chioza'. 19 Ka bllingake' yell Éfesona', Páblona' bikwaanze' Priscílana' len Aquílana', na' wzee wyaje' gana' chdop chllag ben' Israelka' choe'lwillgake' Chioza' na' be'lene' ben'ka' dill'. 20 Na' ben'ka' ndop nllag na', wñabgakile' Páblona' yigaanlenche' legake', na' Páblona' bi goonile'. 21 Na'ch chi'e legake':

—Chonan byen yiyaa Jerusalénna' kat' gal' lnina' daa za', na' widchkz' yidwia' le' shi Chioza' wi'e latj.

Na'ch bizee Éfesona' biyo'e to loo barkw. 22 Na' ka betje' barkwa' Cesareana', wyaje' Jerusalénna' jawape' chiox ben'ka' nonlilall' Jesúza'. Na' bizee biyaje' Antioquíana'. 23 Na' bigaane' shloll, na'tech wzee wyaje' sto shii to to yell gana' mbani Galáciana' na' Frígiana' jatipche' lall' ben'ka' nonlilall' Jesúza'.

Apóloza' bi'e xtil' Chioza' Éfesona'

24 Na' do kana' bllin to ben' Israel Éfesona' lie' Apolos, ben' golj yell Alejandríana'. Na' chak cho'e dill' lao lkwe' ben', na' le nsede' Cho'a Xtil' Chioza'. 25 Apóloza' nsede' che Xancho Jesúza', na' do yichj do lallee cho'e dill' che' kon ga zeelo nezile', per zeelo nezile' daa bli' bse di Juanna' che daa chchoa ben' nisa'. 26 Na' Apóloza' bi bllebe' bi'e dill' che Jesúza' gana' chdop chllag ben' Israelka' choe'lwillgake' Chioza'. Na' ka beni Priscílana' len Aquílana' ka chli' chse di Apóloza', na'ch biche'gake'ne' kwenche bzajni'chgakile'ne' kwaslōl ka nak xnez Chioza'. 27 Ka goki Apóloza' shaje' gana' mbani Acáyana', ben'ka' nonlilall' Jesúza' btipgake' lallee na' bzejgake' to yish dii bexēe che ben'ka'

nonlilall' Jesúza' na', kwenche wlebgake'ne'. Na' ka blline', le goklene' ben'ka' ba biyesh'lallii Chioza' kwenche nonlilall'gake' Jesúza'. ²⁸Na' bli' bsdile' ben' nan klelan chajni ben' Israelka' che Jesúza'. Na' bibi gok yee ben' Israelka' daa bliile' legake' to to gana' nyoj Cho'a Xtill' Chioza' daa na Jesúza' nake' Crístona', beena' wsel' Chioza' inabi'e.

Ka wzoa Páblona' Éfesona'

19 ¹Na' shlak wzoa Apóloza' Coríntona', Páblona' wdie' to to yellka' lliá ladj yaa yaoka' gana' mbani Galáciana' na' Ásiana', na' bllintie' Éfesona' gana' jadi'e bal' ben' ba nonlilall' Jesúza'. ²Na' wnable' legake', chi'e:

—¿Azidsoa Espíritu Sántona' loo yichjlall'do'lena' ka wzolole chonlilall'le Jesúza'?

Na' ben'ka' gollgake'ne':

—Ni bi nezinto' shi zoa Espíritu Sántona' beena' no' ka'.

³Na'ch Páblona' wiznable' legake':

—¿Bin wyajniile ka wchoale nisa'?

Na' che'gake'ne':

—Kon ka bzajni dii Juanna'.

⁴Na'ch goll Páblona' legake':

—Dii Juanna' bzajniile' ben' chiyal' choagake' nisa' daa wli'n ba biyaj bilengakile' na' lekzka' golle' legake' chiyal' gonlilall'gake' beena' zi' yid, na' len' Jesúza', beena' wlej Chioza' inabi'e.

⁵Na' ka bengakile' daa goll Páblona' legake', na' wchoagake' nisa' daa chonlilall'gake' Xancho Jesúza'. ⁶Na' ka bxoá na' Páblona' yichje'ka', Espíritu Sántona' wyo'e loo yichjlall'do'eka' na' wnegake' wde wdeli dill' na' lekzka' wdixje'gake' dill' daa goll Chioza' legake'. ⁷Na' ben'ki gok cheyin ka' nakgake' ka do shllin.

⁸Na' wzoa Páblona' Éfesona' shon beo' bli' bsdile' ben' Israelka' gana' chdop chllaggake' choe'llwillgake' Chioza' na' bi bllebe'. Na' be'lenche' ben'ka' dill' kwenche wyajni'gakile' ka chnabia' Chioza' loo yichjlall'do' ben'ka' nonlilall'gake'ne'. ⁹Na' bal' ben'ka' nak ben' lall'do' wal aga goongakile' shajle'gake', na' biya dii wnagake' lao lkwe' ben' che nez li nez shao' che Jesucrístona'. Na'ch biza' Páblona' kwite'ka', na' bichi'e ben'ka'

ba nonlilall' Jesúza', wyajlene' legake' lill to ben' le Tirano dii nak ka yoo skwel gana' chdi'a ben', na' bli' bsdchile' legake' yog' lla. ¹⁰Gokte chop yiz bli' bsdile' legake', na' yog'lol' ben'ka' lle' doxen Ásiana' bengakile' xtill' Xancho Jesúza', ka ben' Israel ka ben' griego. ¹¹Na' Chioza' bchine' Páblona' kwenche bene' yel' wak xen dii benan ka bibanchgayi ben'. ¹²Na' axt no bachyichj, no lech' chjatigake'ne' na' chiyox'gake'n ga de ben' bi shao' na' chiyakgake', na' lekzka' chichej dii xiwaa yoo ben'.

¹³Na' bal' ben' Israelka' chdagake' to to yell chibejgake' dii xiw'ka' yoo ben', na' chakgakile' wchingake' le Xancho Jesúza' kwenche yibejgake'n. Na' che'gake'n:

—Kon yel' wak che Jesúza', beena' choe' Páblona' xtilleena', nannto' le', li yichej.

¹⁴Ka' ben gall xiin to ben' Israel le Esceva, beena' nak to wñabia' che bxoza'. ¹⁵Na' ka nan yibejgake' dii xiwaa, na' gollan legake':

—Nombi'a Jesúza', na' lekzka' Páblona', per le', bi nezid' no le'.

¹⁶Na'ch beena' yoo dii xiwaa bxitee bnize' legake', na' bchezee xalaane'ka' na' bene' legake' zi' axt bllie' legake' we' na' gal'yid gal'bel'zgake' bixonjgake' lille'na'. ¹⁷Na' yog' ben'ka' zoa Éfesona', ka ben' Israel ka ben' bi nak ben' Israel, wnezgakile' ka gok che ben'ka', na' le bblebgake' na' wloochgake' Xancho Jesúza' balaan.

¹⁸Na' zan ben'ka' ba nonlilall'gake' Jesúza' jaxoadol'gake' lao lkwe' ben' ka nak dii malka' ba bengake'. ¹⁹Na' zan ben'ka' blan yel' willa'na' jwa'gake' libr che'ka' daa bsdgake' na' bzeygake'n lao yog' ben'ka'. Na' bengake' kwent ka'k' zak' librka' bzeygake', na' bllinan ka do shiyona mil mech plat. ²⁰Ka' gok blliljch xtill' Xancho Jesúza' na' ben' zanch benlilall'gake'ne' daa gokbe'gakile' xtill' Chioza' nsa'n yel' wak xen.

²¹Na' ka wde gok yog' diiki, Páblona' bchoglallee shaje' lljawie' ben'ka' lle' yellka' llia Macedóniana' na' Acáyana', na'tech yiyaje' Jerusalénna'. Na' lekzka' golle': “Ka yiyoll yiyaa Jerusalénna' chiyal' shaa Rómána'.” ²²Na'ch bselee Timotewa' na' Erástona' Macedóniana', ben'ki chop chaklengake'ne', na' le' bigaane' Ásiana' zi shloll wen.

Bta bñe Demétriona' ben' Éfesoka'

23Na' got' to dii zed wal Éfesona' daa chli' chsedi Páblona' che nez li nez shao' che Jesucristona'. 24Na' beena' wlek dii zeda' lie' Demetrio, na' noni xshine' chone' de plat lwaa lsak' yoodo' che xnax Dianana', beena' noni chios chegake'. Na' dii xen chone' gan cheyin len ben'ka' chonlengake'ne' llinna'. 25Na' btope' ben'ka' chonlene' llinna' na' yog' ben'ka' nlangake' llin ka daa, golle' legake':

—Nezile llin dga nlancho dii xen chkwaanān checho. 26Na' ba chen chle'ile ka chon beena' le Pablo, chde' chzajniile' ben' wlall chechoki na' doxen gani mbani Ásiani, chi'e aga bi zakii lwaa lsak' dii chon ben' kwenche we'la'ozgake'n. Na' ben' zan ba chzenaggake' che'. 27Na' nxoll bich too diiki choncho, na' lekzka' nxoll bich sey che yoodo' gana' zoa xnax Diana chechona', beena' nak ben' choo ben' xen. Na' beeni choe'la'o yog'zə ben' lle' gani mbani Ásiani na' ben' lle' doxen yell-lioni, gongakile'ne' ka to ben' bibi zakii.

28Ka goll Demétriona' legake' ka', le bllaagake' na' besyaagake', nagake':

—Ben' choo ben' xen nak xnax Diana chechona', cho' ben' Éfeso!

29Na' yog'lole' gogkake' toz, wlekgake' dii lchix wal yella', na' bex'gake' chop ben' Macedonia, toe' le Gayo, na' stoe' le Aristarco, ben'ka' zejlen Páblona'. Na' wdoygake' legake' bllinlentegake' legake' gana' chidopgake' choe'gake' dill'. 30Na' Páblona' gokile' sho'e ladj ben'ka' ndop nllag na' kwenche nan we'lene' legake' dill', per ben'ka' nonlilall' Jesúsza' aga be'gake' latj sho'e. 31Na' lekzka' ladj joschis che ben' Ásiaka' len ben' nllagui Páblona', na' bsel'gake' rson, che'gake'ne':

—Ben goklen, bi shoo gana' lle' ben'ka'.

32Na' ben'ka' ndop nllag na' chosyaagake', wde wdeli dii na to toe'. Na' zan ben'ka' len ladje'ka' ni bi nezgakile' biche lle'zgake' na'. 33Na' bal ben' Israelka' bllig'gake' Alejándrona' lao ben'ka' kwenche wi'e dill' lawe'ka'. Na'ch Alejándrona' blis neena' kwenche soagake' llizə na' wzenaggake' daa yee legake'. 34Na' ka ble'gakile'ne' na' gokbe'gakile' nan ben' Israelan, na'ch bizologake' chosyaagake', nagake':

—¡Ben' choo ben' xen nak xnax Diana chechona', cho' ben' Éfeso!

Ka do chop gor besyaagake' che'gake' ka'.

³⁵Na'ch beena' nak sikriban che yella' bzoe' legake' llizə. Na'ch golle' legake':

—Le' ben' wlall, yog' ben' yell-lío nezgakile' cho' ben' Éfeso chido' cho gap wwiacho yoodo' che xnax Diana chechona', beena' nak ben' choo ben' xen. Na' nezgakile' lwaa lsakeena' za'n yabalə, ³⁶na' ni to kono gak ina aga kan' nakan. Na' li soa llizə kwenche bi gonle to dii bi chiya' gonle. ³⁷Ka nak ben'ki ba bidwa'le ni, bi inacho ba wlangake' bi de loo yoodo' chechona', ni bi inacho ba wnegake' zban che xnax Diana chechona'. ³⁸Na' shi Demétrioni na' ben'ka' chonlengake'ne' llinna' de dii chak chegake' kon nottezə ben', daan chi' ben'ka' chchoglogake' che ben' na' wak shajgake' lawe'ka' kwenche gongake' yel' joschis che'ka'. ³⁹Na' shi bichlə dii cheenile gak, chiya' yitopcho yog'lol ben' yell na' we'chon dill'. ⁴⁰La' ka nak dga gok naa, nxoll ina ben' to cho'zan chta chnecho ben' yell, na' zbera inacho shi ba chnabgakile' cho' che dga ba gok naa?

⁴¹Ka wde golle' legake' ka', na' bisheshe' legake'.

Biyaj Páblona' Macedóniana' na' Gréciana'

20 ¹Na' ka bibe'lli daa ben ben' Éfesoka', na'ch gox Páblona' ben'ka' nonlilall' Jesúsza' na' be'lene' legake' to chop dill' dii gaklenan legake' na' wdele' to togake', na' bilee legake' dill'. Na' bizee zjade' gana' mbani Macedóniana'. ²Na' bidie' to to yellka' llia Macedóniana' na' be'lene' ben'ka' nonlilall' Jesúsza' zan dill' dii btipan lall'gake'. Na' biyolla' billine' Gréciana', ³na' shon beo' wzoe' na'. Na' ba zoa yiyo'e loo barkwa' kwenche yiyaje' gana' mbani Síriana', ka wnezile' ba chino ben' Israelka' le'. Na' bchoglallee bigwee nez kon ni'aze ziyaje' Macedóniana'lə. ⁴Na' ben' zan zejlengake' Páblona' Ásiana'. Ladje'ka' len Sópatera' xiin Pírrona', ben' Bereana'; na' Aristárcona' len Segúndona', ben' Tesalónicaka'; na' Gáyona', ben' Dérbena'; Timotewa', na'ch Tíquiconá' len Trófimona', ben' Ásiaka'. ⁵Na' yog' ben'ki wllialogake' laonto'na', na' wlezgake' neto' yell Tróaza'. ⁶Na' ka wde lni Paskwa' kat' chaogake' yetxtila' daa bi nchix levadúrana',

na'ch biza'nto' yell Filípoza' biyoonto' to loo barkw. Na' ka gok to xman biza'nto' na' billinnto' yell Tróaza' gana' ba chbez beñ'ka' neto'. Na' wzoanto' na' gall lla.

Billin Páblona' yell Tróaza'

7Na' ka bllin lla dmiwa', lla nech che xmanna', bdop bllagnto' weej wdaonto' txen len beñ'ka' nonlilall' Jesúza', na' Páblona' bli' bsdile' legake'. Na' daa ba nakan yizee yetiyo, axt chelch wyeelo be'lene' legake' dill'. 8Na' ndop nllagnto' to loo yoo dii llia shkvia cha'lə, na' nakan bido y'i'zi. 9Na' to bi' wew' lliab' cho'a ventanna', na' leb' Eutico. Na' daa bshaljlen Páblona' beñ'ka' ssha, bex'kza bishgala' leb' na' bxopb' cho'a ventan che yoo de shon kwiana' gana' lliab', na' ka bilisgake'b' ba witb'. 10Na'ch biyetj Páblona', na' ka blline' gana' jadixjgake'b' bchekee wdele'b'. Na' golle' beñ'ka':

—Bi illeble; mbankzba'n.

11Na'ch biyep Páblona' dii yoblə, bxoxje' yetxtila' na' wdaogake'n. Na'tech bizoloe' choe'lene' legake' dill' ni ka wyeeni'teyi. Na'ch bizee. 12Na' ka billesh beñ'ka', chibagakile' biche'gake' bi' wewaa shi'a shbam'.

Biza' Páblona' Tróaza'

13Na'ch neto' bibialonto' biyoonto' to loo barkw wyajnto' yell Asónna' gana' yillagnto' Páblona' ka bgaannto' dill', na' bigwee nez ni'aze'. 14Na' ka billagnto' Páblona' Asónna', na' biyoolene' neto' loo barkwa' na' wyajnto' yella' le Mitilene. 15Na'ch biza'nto' Mitilénena', na' betiyo bidento' gaozə yell-lio Quíona' daa llia lo nido'na'. Na' gok lillj billinnto' yell-lio Sámoza' daa llia lo nido'na', na' llana' sto wyajchnto' yell Milétona'. 16Ka' bennto', la' Páblona' bi goonile' shajchnto' Éfesona' kwenche bi sha'ile' Ásiana', daa ba chakbyenile' yilline' Jerusalénna' daa ba zoa gal' lni Pentecostéza'.

Billag Páblona' beñ'ka' ngoo lo na'gake' beñ'ka' nonlilall' Jesúza' Éfesona'

17Na' ka zoanto' Milétona', Páblona' bselee rson na' goxe' beñ'ka' ngoo lo na'gake' beñ'ka' nonlilall' Jesúza' Éfesona'. 18Na'

ka bllingake', goll Páblona' legake':

—Le' nezile nak bsa' cha' dezd nechte ka wzoalen' le' Ásiani. 19Ba wzoa' ba ben' xshin Chioza' do yichj do lallaa, na' zan shii gokyeshid' na' wchell', na' biya dii ben ble'id' daa bchi' bsak' ben' Israelka' nad'. 20Na' aga ni che ka' bsan' bich wnia' le' daa chiya' inezile, san bli' bsdchzkid' le' gana' chdop chllagle na' ka'kzə lill to tole. 21Ka ben' Israel ka ben' bi nak ben' Israel, be'lengakee dill' nan chiya' yiyaj yilengakile' che dii malka' chongake' lao Chioza' na' gonlilall'gake' Xancho Jesucristona'. 22Na' naa, Espíritu che Chioza' chone' byen yiyaa Jerusalénna', na' bi nezid' bi gak cha' na'. 23Zeelo dii nezid', Espíritu Sántona' ne' nad' to to yell gana' tia' gataa lillya na' biya dii gak cha'. 24Na' aga bi chakid' cheyi diika' gak cha', la' aga llialo yel' mban cha'ni, san llialote yiyoll gon' yog'lol daa ben Xancho Jesús'a lo na' gon', la' len' wleje' nad' kwenche chixji'a dill' wen dill' kob che Chioza' daa chakile' cho'.

25'Na' ba bzajniid' le' ka chon Chioza' chnabi'e loo yichjlall'do' ben' chonlilalleene', na' naa ni stole le' bich ile'ile nad' yell-lioni. 26Daan nia' le' naa, aga bi dol' nap' shi nole kwiayi'. 27La' ba bzajniid' le' yog' daa cheeni Chioza'. Bibi bkwashaa dii inacho bi wnia' le'. 28Na' li wsak', li gap wwia ben'ka' nakle txen, la' Espíritu Sántona' wleje' le' kwenche gap wwiale ben'ka' nonlilall' Xancho Jesús'a, ben'ka' biya'o bizi'lene' xchene'na' daa blalje' lee yag cruza'. 29La' nezid' kat' bich soalen' le' na' yid ben' gonllejgakile' le' kwenche kwej yichjle daa nonlilall'le Jesús'a. Gongake' ka ba znia, ba chjatao xil'do' che ben'. 30Na' ladjlena' ichej ben' wli' wsedile' le' daa bi nak shli kwenche gonlene' txen. 31Na' li wsak' kwenche kono siye' le'. Na' li lljadini ka ben' lo shon yiza' wzoalen' le', la' ka tella ka wal got'yoid' to tole kwenche wzenagle che Chioza', na' axt wchell' ni chele.

32'Na' naa, chon' le' lo na' Chioza' len cho'a xtilleena' daa na le chakile' cho'. La' lennan' napan yel' wak kwenche gакlenan le' soachehle gonlilall'lene'. Na' ka' lljazoalenlene' txen len yog' ben' nakgake' lall' nee. 33Nezkzile bibin' selallaa chele, ni xmehle, ni xalaanle, ni bichlə dii naple. 34Na' nezkzile ni'a na'ni benlen' llin kwenche bllelid' bi dii byalljenid' ben'ki chonlengake' nad' xshin Chioza'. 35Ben' llinna' kwenche bliid' le' ka chiya'

gaklencho ben' kat' bi chyalljgakile'. La' chiyal' lljadinicho xtill' Xancho Jesúza' kana' wne': "Mbalazch soacho shi we'cho ben' bi we'chone', aga ka daa ikaacho bi dii gone' cho'."

36Na' ka biyoll be'len Páblona' legake' dill', na'ch bchek' xibe'ka' be'lwillgake' Chioza'. 37Na' yog'gake' wchell, na' wdel'gake' Páblona' na' bnopgake'ne'. 38Na' le nyesh' wzoagake' daa goll Páblona' legake' bich ile'i ljwellgake'. Na' jasangake'ne' gana' biyo'e barkwa'.

Biyaj Páblona' Jerusalénna'

21 1Na' ka bilaanto' ben' Éfesoka', na'ch biyoonto' loo barkwa' ziyajnto' shlichá yell-lío Coza' daa llia lo nido'na', na' betiyo billinnto' yell-lío Ródaza' daa llia lo nido'na', na' biza'nto' billinnto' yell Pátarana'. 2Na' ka billinnto' Pátarana' ble'into' to barkw dii shaj gana' mbani Feníciana', na' biyoonto'n. 3Na' ka zejnto' loo barkwa' ble'into' yell-lío Chíprena' daa llia lo nido'na' na' to wdeznto' shlaana'lə zejnto' yell Tírona' daa llia gana' mbani Síriana'. Na' ka billin barkwa' Tírona', biłetjgake' yoa'na' noa'n na' biyetjnto'. 4Na' jadiljnto' ben'ka' nonlilall' Jesúza' na' bigaanlennto' legake' to xman. Na' Espíritu Sántona' golle' legake' bi chiyal' yiyaj Páblona' Jerusalénna'. 5Na' ka gok to xman biza'nto'. Na' yog' ben'ka' ba nonlilall' Jesúza' yell Tírona', do xiin xoolgake', wza'lengake' neto' cho'a yella'. Na' ka bllinnto' cho'a nido'na', bchek' xibnto' be'lwillnto' Chioza'. 6Na'ch bilaa ljwellnto' dill', na' biyoonto' loo barkwa', na' ben'ka' biyajgake' lill che chegake'.

7Na' biza'nto' Tírona' billinnto' yell Tolemáidana', na' bwapnto' chiox ben'ka' nonlilall' Jesúza' na', na' bigaanlennto' legake' shlla. 8Na' betiyo biza'nto' Tolemáidana' na' billinnto' yell Cesareana'. Na' wyajnto' lill Felípena' beena' choe' dill' wen dill' kob che Crístona', na' nake' txen ben'ka' gall chaklengake' postlka', na' bigaannto' lille'na'. 9Na' zoa tap bi' nool wew' che', na' chyixje'gakb' daa che' Chioza' legakb'. 10Na' ka ba gok shon tap lla zoanto' lille'na', na' bla' to ben' Judea lie' Ágabo, ben' chyixjee daa che' Chioza' le'. 11Bidwie' neto' na' wnabe' xpachlee Páblona' na' bichej ni'a na' kwine', na' chi'e:

—Ba bzajnii Espíritu Sántona' nad' ne' ben' wlallka' lle'

Jerusalénna' w̄hejgake' n̄i'a na' x̄an bachleeni ka ba n̄hej' n̄i'a na'ni, na' gongake'ne' lo na' ben̄'ka' bi nak ben̄' Israel.

12Na' ka beninto' wna Ágabona' ka', neto' len ben̄' Cesareaka' got'yointo' Páblona' bi yiyaje' Jerusalénna'. 13Na' Páblona' wne' neto':

—Bi kwell-le cha', bi gonle ka gakyeshid'. Zoakz' wtil' diika', aga toz daa w̄hejgake' nad', san wakte witgake' nad' daa nonlilallaa X̄ancho Jesucrístona'.

14Na' ka gokbe'into' bi chzenag Páblona' daa che'nto'ne' bi yiyaje' Jerusalénna', na'ch wnanto':

—Gakshga ka cheeni X̄ancho Jesúsza'.

15Na' ka wde, bisini'a chento' kwenche biza'nto' ziyajnto' Jerusalénna'. 16Na' bal ben̄' Cesareaka' nonlilall' Jesúsza' wza'lengake' neto'. Na' b̄che'gake' neto' lill to ben̄' le Mnasón, gana' yigaan̄nto'. Beeni nake' ben̄' Chipre na' ssha ba gok nonlilallee Jesúsza'.

Páblona' jawie' Jacóbona' Jerusalénna'

17Na' ka billin̄nto' Jerusalénna', le chibayi ben̄'ka' naknto' txen nonlilall'nto' Jesúsza'. 18Na' betiyo wza'len Páblona' neto' jawianto' Jacóbona'. Na' ka bllin̄nto', ba lle' yog' ben̄'ka' ngoo lo na'gake' ben̄'ka' nonlilall' Jesúsza' Jerusalénna'. 19Na' biyoll bwap Páblona' legake' chiox, na' golle' legake' to to diika' goklen Chioza' le' daa bene' ladj ben̄'ka' bi nak ben̄' Israel. 20Na' ka wde bzenaggake' diika' wna Páblona', be'la'ogake' Chioza'. Na'ch gollgake'ne':

—Li', ben̄' bish', nezkzilo' ben̄' zan wal inlleb ben̄' Israelka' ba nonlilall'gake' Jesúsza', na' yoguee nagake' chonan byen goncho daa na leya'. 21Na' ba bengakile' rson ka chono', na' nagake' chzajniilo' yog' ben̄' Israelka' lle' yell zit'ka' bich gongake' ka na ley che dii Moiséza', ni bi koo bi' che'ka' sēn daa le circunció̄n, na' bich gongake' daa yoolocho choncho. 22¿Nakra gonchon, lla? La' lii idop illagte ben̄' kat' inezgakile' ba biyedo'. 23Waklja gono'n ki: Ladjnto'ni zoa tap ben̄' n̄chebe' to dii n̄chebe' lao Chioza', na' chonan byen wdelazgake' daa n̄chebgake'. 24Chiyal' w̄chi'o legake' yoodo'na' kwenche txen yixi yiyechle. Na' li' chixjo' daa chiyal' chixjgake' kwenche gak wshib yichje'ka' ka nllia leya'

bia'. Na' shi gono' ka', yog' ben' inezgakile' bi nakan ka nagake' cho', na' gakbe'gakile' lekzka' chzenago' daa na leya'. ²⁵Na' ka nak ben'ka' bi nak ben' Israel na' ba nonlilall'gake' Jesúza', ba bzejnto' legake' bi kwe' yichjgake' diika' zejlencho cho' ben' Israel. Na' gollnto'gake' daa chiya' gongake': bi gaogake' ye' wao daa ba bllia ben' lao lwaa lsak' daa choe'la'ogake', na' bi gaogake' xchen bayixaa, ni xpel' bana' bi wlalj xchema', na' bi inelenzgake' xiin xool ben'.

Bex'gake' Páblona' yoodo'na'

²⁶Na' betiyo ka bixi biyech Páblona' len ben'ka' zi tap, na' wyajgake' yoodo'na' kwenche wzenile' bxoza' bi llan sheelo daa ba nchebgake' kwenche ka yiyoll yixi yiyechgake' ka nllia leya' bia' na' we'gake' bayix'do'ka' witgake'.

²⁷Na' ba zoa iza' gall lla chongake' daa chiya' gongake' kwenche yixi yiyechgake', na' bal ben' Israelka', ben'ka' zaak Ásiana', ble'gakile' Páblona' loo yoodo'na'. Na'ch bta bnegake' ben'ka' lle' na', kwenche bex'gake' Páblona'. ²⁸Na' wnegake' zilljə che'gake':

—Le', ben' Israel, li gaken neto'. Beeni chde' doxen chli' chsedile' ben' kwenche gakzbangakile' cho' ben' Israel, len ley chechona' na' yoodo' chechoni. Na' naa sto dii zban wal ba bizone', ba wlo'e to chop ben' griego yoodo' chechoni, la' bi de lsens sho' ben'ki lill xlatj Chios chechona'.

²⁹Wnagake' ka' daa ba ble'gakile' Trófimona', to ben' yell Éfeso, chdalene' Páblona' txen Jerusaléna', na' gokgakile' lekzka' bche' Páblona'ne' yoodo'na'.

³⁰Yog'z ben' lle' yella' bllesh bcheengake' zejdogake'. Na'ch bigoyogake' Páblona' ax't de xneze' bibejgake'ne' yoodo'na', na' lii bsejtegake' puertka'. ³¹Na' ba llagdia'gake' Páblona' cheengakile' wittekzgabe'ne' ka bllin dillaa lao ben' wñabia' che soldadka' nan chak dane nleb doxen yell Jerusaléna'. ³²Na' lii btoptie' soldadka' na' ben'ka' ngoo lall' na' legake' na' wyajdogake' gana' lle' ben'ka'. Na' ben'ka' chit Páblona' ka ble'gakile' ben' wñabia'na' len soldad che'ka', na'ch bsangake' bich bet wdingake'ne'. ³³Na'ch jabig' ben' wñabia'na', na' bexee Páblona' na' bene' mandad bchejgabe'ne' chop gden. Na'ch wñabile' ben'ka' no beena' na'

bin bene'. ³⁴Na' beṇ'ka' kon chosyaagake' na' chiya dii na to toe', na' bi wyajniṇ beṇ' wṇabia'na' daa zi'te chongake' sshag. Na'ch bene' mandad biḥe' soldadka' Páblona' gana' zoagake'. ³⁵Na' ka bllingake' cho'a shkwiaka' lle' cho'a lill soldadka' benan byen bḷen soldadka' Páblona' daa zej beṇ' Israelka' cheengakile' wṇizgake'ne'. ³⁶Na' beṇ' zan nogake'ne' chosyaagake', che'gake':
—¡Lii wittegue'!

Páblona' cho'e dill' lao beṇ' Israelka'

³⁷Na' ka ba zoa lljloogake' Páblona' gana' zoa lill soldadka', na'ch golle' beṇ' wṇabia'na':

—¿Awak we'len' li' to ḥop cho'a dill'?

Na' beṇ' wṇabia'na' golle'ne':

—¿Achako' dill' griegona'? ³⁸¿Aaga lin' beṇ' Egíptona' beena' wzoshiyi' beṇ' wṇabia'ka' kani batzə, na' bḥi'e tapa mil beṇ' wen xyaka' latja' gana' bibi chashj ḥḷeb?

³⁹Na'ch goll Páblona'ne':

—Aga le' nad'. Nad' nak' to beṇ' Israel, beṇ' yell Tarso dii nak to yell xen gana' mbani Cilíciana'. Ben goklen be' latj we'len' beṇ'ki dill'.

⁴⁰Na' beṇ' wṇabia'na' bi'e lsens. Na'ch wze Páblona' lo shkwiaka' na' bze neena' lawe'ka' kwenḥe soagake' llizə. Na'ch ka wche'lligake' na' wzoloe' be'lene' legake' dill' hebrewa' daa nak xtill'gake', chi'e:

22 ¹—Le' beṇ' bish', na' le' beṇ' gol, li wzenag dill' ḥa'ni wi'a.

²Na' beṇ'ka', ka bengakile' ḥṇe Páblona' dill' hebrewa' na' wll'e'gake' llizə. Na' Páblona' chi'e legake':

³—Nad' nak' beṇ' Israel na' golj' yell Társona' gana' mbani Cilíciana', per bgol' Jerusalénni, na' bli' bsemi maestro Gamaliela' nad' kwaslōl ka na ley ḥe dii xozxto'choka', na' toshiizi choe'l-lallaa chon' ka chazlall' Chioza' do yichj do lallaa, ka chonkzle le' naanlla. ⁴Na' bḥi' bsakaa beṇ'ka' ba wyoo lo nez li nez shao' ḥe Jesucrístona' na' goklallaa guetgake'. Na' beḥaa ka nool ka beṇ' byo, na' wlo'a legake' lillyana'. ⁵Beena' nak bḥoz choo bḥoz xen na' yog' beṇ' golka' ḥṇabia' beṇ' Israelka' nezgakile' ka ben'. Na' legake' bengake' nad' yish daa beḥaa

ka wzaa zyaa yell Damáscona', gokid' lljexaa yog'lol ben'ka' nogake' xtill' Jesucristona' na' yiche'gakee Jerusalénni kwenche sak'zi'gake'.

Be' Páblona' dill' ka gok benlilallee Jesúza'

(Hch. 9:1-19; 26:12-18)

6'Na' ka do gobill, ka ba zoa illin' Damáscona', tokonganzi wyalj to yi' dii za' yabana' lo neza' gana' zyaa. 7'Na' to wzoatishz' lo yona'. Na'ch benid' shii to ben' wne' nad': "Saulo, Saulo, ¿berache chchi' chsak'zo' nad'?" 8'Na' wñabidee, chepee: "¿No li', ben'?" Na' wne': "Nadaan Jesús, ben' Nazareta', beena' chchi' chsakoo." 9'Na' ben'ka' zyaalen' txen ble'gakile' yi'na' daa wyalj na' bllibgake', per aga bengakile' daa wna beena' nad'. 10'Na'ch goshee: "¿Beran chiyal' gon', Xan'?" Na' wne' nad': "Biyas na' wyaj Damáscona', na' na' inagake' li' yog' daa chiyal' gono'." 11'Na' beeni' wala' bcholan nad', na' ben'ka' zyaalen' txen biyox'gake' na'na' na' bche'gake' nad' Damáscona'.

12'Na' Damáscona' zoa to ben' le Ananías, na' zoe' chone' yog' daa na leya', na' yog' ben' Israelka' zoa Damáscona' nagake' che' nake' to ben' chon dii wen. 13'Na' Ananíaza' bide' bidwie' nad', na' ka blee, wne' nad': "Saulo, ben' bish', ñaa yile'ilo' sto shii." Na' kate wne' ka', lii bile'teid', na'ch gok ble'idee. 14'Na'ch wne' nad': "Chioza', beena' be'la'o dii xoxxto'choka', ba wleje' li' kwenche gombi'o daa cheenile' gono', na' kwenche ble'ilo' beena' nak liizelozi ben' wen, na' benteilo' kwine'n ba bshaljlene' li'. 15'Na' li' wi'o xtilleena' doxen yell-lioni, na' we'leno' ben' dill' yog'lol diika' ba ben ble'ilo'. 16'Na' ñaa, bibi wsej wllonan choatego' nisa' na' wñabi Xancho Jesúza' yisol yinite' saaxya cho'ka'."

17'Na' ka biyed' Jerusalénni, wyaa yoodo'na' je'llwill' Chioza', na' Chioza' bene' ka ble'do'id'. 18'Na' ble'id' Jesúza', beena' nak Xan', na' wne' nad': "Btalaloo bchej Jerusalénni, la' aga no wzenag xtillaana' daa we'lengako'ne'." 19'Na'ch chepee: "Xan', legake' nezgakile' ka wya' to to gana' chdop chllagnto' choe'llwillnto' Chioza' jexaa ben'ka' nonlilall' li', na' bet wdingakee na' biche'gakee ni, bsejgakee lillyana'. 20'Na' kana' betgake' dii Estébanna' beena' be' xtilloona', len' bi'a latj betgake'ne', na' wdap' xa ben'ka' bet le'." 21'Na' Jesúza', beena' nak Xan', wne'

nad': "Wloo nez, wyaj yell zit'ka' na' je'len ben'ka' bi nak ben' Israel xtilaana'."

Páblona' goke' lo na' ben' wñabia' che soldadka'

22 Zeelo diika'z bzenaggake' che Páblona', na'ch wzolo chosyaagake' che'gake':

—¡Bisol binittegue' yell-lioni! ¡Aga chiyal' soach ka le'!

23 Na' bikzə bsangake' chosyaagake' daa le chllaagake'. Axt no xe'ka' chzal'gake' ka'lə na' no bishte yona' chashgake'n chzal'gake'n cha'lə. 24 Na' ben' wñabia' che soldadka' bene' mandad wloogake' Páblona' gana' zoa lill soldadka' na' wit chingake'ne' kwenche wi'e dill' bin bene' daa zi'te chllaa ben'ka' le'. 25 Na' ka ba nchejgake'ne' kwenche wit chingake'ne', Páblona' golle' xan soldadka':

—¿Ade lsens wit chinle to ben' nde kwent Rómana' la'kzi bin' yiyiljyoll-le bin bene'?

26 Na' ka goll Páblona' xan soldadka' ka', na'ch jelle' ben' wñabia' che'ka':

—Wsak'shkilo', nde beeni kwent yell Rómana', na.

27 Na' ben' wñabia' che soldadka' wyaje' kwit Páblona' na' wñabile'ne', chi'ene':

—¿Alin ndio' kwent yell Rómana'?

Na' Páblona' chi'ene':

—Awe.

28 Na'ch ben' wñabia' che soldadka' chi'e Páblona':

—Nad' mech xen wxakidaan kwenche ndia' kwent yell Rómana'.

Na' Páblona' golle'ne':

—Nad' dezd ka goljtia' ndia' kwent yell Rómana'.

29 Na' daa goll Páblona' ka', ben'ka' nan wit chingake'ne' lii bikwastegake' kwite'na'. Na' axt beena' chñabia' soldadka', ka gokbe'ile' Páblona' ndie' kwent yell Rómana', le bllibe' daa bene' mandad bchejgake'ne' gdenka'.

Bzegake' Páblona' lao ben'ka' chñabia' ben' Israelka'

30 Na' betiyo, ben' wñabia' che soldadka' btope' bxozka' chñabia' na' yog'lol ben'ka' chñabia' ben' Israelka'. Na' bselle'

gdenka' daa nchej ni'a na' Páblona', na' wleje'ne' bzie'ne' lao ben'ka' daa cheenile' inezile' biçhe chao ben' Israelka' xya che'.

23 ¹Na'ch Páblona' bwie' ben'ka' chñabia' ben' Israelka' na' golle' legake':

—Le' ben' bish', nezi yichjlall'dawaani axt naa chon' daa chazlall' Chioza'.

²Na'ch Ananíaza', beena' nak b̄xoz choo b̄xoz xen, golle' ben'ka' ze kwit Páblona' kwall'gake' cho'ena'. ³Na' Páblona' golle'ne':

—¡Chioza' wit chine' li', wxiye'! Li' chi'oni kwenche yiya yiyiljo' nad' kon ka na leya', per chyishjo' daa na leya' daa beno' mandad wlall'gake' cho'ani.

⁴Na'ch ben'ka' lle' na', che'gake' Páblona':

—¿Naktekara chiyaxjilo' chilliizo' dill' beena' nak b̄xoz choo b̄xen che Chioza'?

⁵Na'ch Páblona' golle' legake':

—Le' ben' bish', bi nezd' shi len' b̄xoz choo b̄xoz xenna'. Shel'ka' nezd', aga goshee ka', la' Cho'a Xtill' Chioza' nan: “Bi inio' zban to ben' wñabia' che yell cho'na'.”

⁶Na' Páblona' gokbe'ile' ben'ka' chñabia' nakgake' chop kwenlə. Bale' nak txen saduceoka' na' bale' nak txen fariseoka'. Na'ch wñie' zillj chi'e:

—Le' ben' bish', nad' nak' fariseo na' naktia' xiin fariseo. Na' chaole xya cha' daa non' lez yiban ben' wetka'.

⁷Ka goll Páblona' ka' na' gok to wishesh wal ladj fariseoka' len saduceoka'. Na' gokgake' choplə. ⁸La' saduceoka' nagake' aga wibanch ben' wetka', na' lekzka' nagake' aga no anjl zoa ni dii xiw'. Na' fariseoka' chajle'gake' zoa anjl na' zoa dii xiw' na' chajle'gake' yiban ben' wetka'. ⁹Na' yog'gake' besyaagake' choe'gake' wde wdeli dill'. Na'ch wzolla' bal' ben'ka' chli' chsedi leya' nakgake' txen fariseoka', na' che'gake':

—Ni to dii mal bin' gon beeni. Shera shi to ben' bi gak ile'icho wa to anjlan' ba wñie' le'. Bi chiyal' soshi'cho Chioza'.

¹⁰Na' daa zi'telə gokdił-len ljjwell ben'ka', bxolli ben' wñabia' che soldadka' wxoxj wtingake' Páblona'. Na'ch wñie' soldadka' yibejgake' Páblona' ladge'ka' na' lljaloogake'ne' dii yoblə gana' zoa lille'ka'.

11 Na' llana' sto ka gol, bli'lao Xancho Jesúza' Páblona' na' golle'ne':

—Bendiplaloo Pablo, ka ba be'kzo' xtillaana' Jerusalénni, ka'kzan chonan byen lljeno' Rómána'.

Chgoogake' xnezin witgake' Páblona'

12 Na' betiyo ba_l ben' Israelka' gokgake' toz kwenche witgake' Páblona', na' wloo cho'agake' bibi yeej gaogake' axt ki guet Páblona', na' gollgake' Chioza' wsak'zi'e beena' yeej gao shlak bin' witgake'ne'. 13 Wdeli choa ben'ka' wloo cho'agake' witgake' Páblona'. 14 Na'ch wyajgake' lao bxozka' chnabia' na' lao ben' gol che'ka' chnabia' ben' Israelka' na' jellgake':

—Ba bchebnto' wsak'zi' Chioza' neto' shi yeej gaoznto' na' bin' witnto' Páblona'. 15 Na' le' nakle ben' wnabia' chento', li gak toz na' li inabi ben' wnabia' che soldadka' kweje'ne' wxe na' yidweene' laoleni, na' wda'tezilen yiyiljyoll-le berakzan bene'. Na' neto' kwe'nonto'ne' tneza' kwenche witnto'ne' ka zi' ilee ni.

16 Na' bi' che ben' zan Páblona' benib' dill'ka' be'gake', na' wyajb' gana' zoa lill soldadka' jasi'nib' Páblona'. 17 Na' Páblona' wnie' to ben' nak xan to guiyoa soldadka', golle'ne':

—Jwa'gach bi'ni lao ben' wnabia' che soldadka', la' de to dii ye'b' le'.

18 Na' xan soldadka' jweeb' lao ben' wnabia' che yog' soldadka', na' golle'ne':

—Páblona', beena' nej lillyana', wnabile' nad' yidwa' bi'ni lawo'ni, la' de to dii inab' li' na.

19 Na' ben' wnabia' che yog' soldadka' bexee na' bi'na', na' bchi'eb' ga kono lle'. Na'ch wnabile'b':

—¿Beran cheenilo' ino' nad'?

20 Na' bi' xkwidaa gollb' le':

—Ben' Israelka' ba gokgake' toz kwenche inabgakile' li' kwejo' Páblona' wxe na' wseloone' lao ben'ka' chnabia' legake', na' wda'tezgakile'n yiyiljyollgake' berakzan bene'. 21 Na' bi shajli'o chegake', la' wdeli choa ben'ka' kwe'nogake'ne' tneza' kwenche witgake'ne', na' che'gake' Chioza' wsak'zi'e legake' shi yeej gaozgake' na' bin' guete'. Na' ba chbezgake' gono' ka cheengakile'.

22Na'ch ben' wñabia' che soldadka' chi'eb':
 —Ni to kono yoo ka nak dga ba wno' nad'.
 Na'ch biza'b'.

Bsel'gake' Páblona' lao ben' wñabia'na' le Félix

23Na'ch ben' wñabia' che soldadka' wñie' chop xan soldad che'ka' na' bene' mandad wzengakile' soldadka' wsini'a chegake' kwenche ichejgake' koogake' nez do ka chida ga wala' shajgake' Cesareana'. Na' bene' mandad chop guiyoagake' shajgake' ni'azgake', na' giyonshigake' kwiagake' kabay na' zi chop guiyoagake' gox'gake' lanza. 24Na' lekzka' golle' legake' koogake' xa kabayka' wchin Páblona' na' illine' shi'a shbane' lao Félix'a, beena' chñabia'. 25Na'ch bgoxee legake' to yish dii na ki:

26“Si'xengacho' ben' wñabia' Félix, nad' Claudio Lisias chzej li', na' chwap' li' chiox. 27Ka nak beeni chselaa lawo'na', ben' Israelka' be'x'gake'ne' na' ba zoa witgake'ne' shel' ki nad' jasla'ne' len soldad cha'ka', la' wñezid' ndie' kwent yell Rómana'. 28Na' daa goklallid' ñezid' berache chaogake' xya che', jwaane' lao ben'ka' chñabia' ben' Israelka'. 29Na' got'bia' chaogake' xya che' daa bi chone' ka na ley che'ka', per bi chonan ka guete' wa gatee lillya. 30Na' ka wñezid' ben' Israelka' ba ngoogake' xnezin witgake'ne', bchoglallaa wselaaane' lawo'na'. Na' ba gosh' ben'ka' chao xya che' yidgake' lawo'na' na' ñagake' li' bin chaklen chegake' Pábloni. Ka'tz dii nia' li'.”

31Na'ch soldadka' lle' na' bche'gake' Páblona' zejlengake'ne', bllinlentegake'ne' yella' le Antípatris kon ka goll ben' wñabia' che'ka' legake'. 32Na' betiyo, soldadka' zej ni'azgake' bibiigake' ziyajgake' Jerusalénna'. Na' ben'ka' llia kabayka' zejlenchgake' Páblona'. 33Na' ka bllingake' Cesareana', be'gake' ben' wñabia'na' yisha' nox'gake' na' bengake' Páblona' lo nee. 34Na' ka wde blab ben' wñabia'na' yisha', na'ch wñabile' Páblona' ga benaan. Na' ka wñezile' Páblona' nake' ben' yell Tarso, daa llia gana' mbani Cilíciana', 35na'ch golle'ne':

—Na' wzenagshkid' bin ñno' kat' yid ben'ka' chao xya cho'.

Na'ch bene' mandad lljasejgake'ne' yoon'a' ben dii Heródeza', gana' chzoa ben' wñabia'ka'.

Be' Páblona' dill' lao Félix'a

24 ¹Gok gay' lla zoa Páblona' Cesareana' ka bllin b̄xoz choo b̄xoz xenna', beena' le Ananías, na' n̄chi'e bal ben' golka' ch̄n̄abia' na' kon to ben' wide dill', ben' le Tértulo. Na' bllingake' lao beena' ch̄n̄abia' kwen̄che gaogake' xya che Páblona'. ²Na'ch bdegake' Páblona' lao ben' w̄n̄abia'na' le Félix na' wzolo Tértulona' chawe' xya che', chi'e:

—Choxkeno' li', ben' w̄n̄abia', zoanto' mbalaz na' chak wen chento' lallnto'ni daa chak koo x̄nezi yog'lōl̄te kon ye'l' sin' cho'na'. ³Na' daan, gattez zoanto' toshiizi nanto' li' choxkeno' dii zan las, li' ben' w̄n̄abia'. ⁴Na' kwen̄che bich wshayinto' li', ch̄n̄abinto' li' gono' goklen wzenago' to chop ka nak dga in̄anto' li'. ⁵Ka nak beeni ze lawo'ni, nezinto' nake' to ben' chbek dii zed, na' chdaze' doxen yell-lioni chta ch̄nie' ben' kwen̄che neto' ben' Israel gaknto' chopl̄a, na' ngoo lo nee x̄onj ben' chon̄l̄ilall' to ben' Nazaret. ⁶Ga biyollin, goklallee kwee loo yoodo'na' ben' bi nak ben' Israel. Daan bex'nto'ne'. ⁷Na' wyaz ben' w̄n̄abia' che soldadka', beena' le Lisias, na' bigoyoe'ne' lo na'nto'na'. ⁸Na' wne' neto' chiya'l' yidnto' lawo'ni kwen̄che gaonto' xya che'. Na' kwino' n̄aa, wak in̄abilo' Pábloni kwen̄che in̄ezilo' biche chaonto' xya che'.

⁹Na' ben' Israelka' lle'lengake' na', bischopgake' dillaa che'gake': “Ka nakannan.” ¹⁰Na'ch ben' w̄n̄abia'na' bene' sen lao Páblona' kwen̄che wi'e dill', na'ch wzolo Páblona' chi'e:

—Nezid' ba gok zan yiz chono' ye'l' joschis che ben'ki lle' gani mbanilo'. Daan chibaid' wi'a dill' daa chak cha' lawo'ni. ¹¹Zi' gok shllin̄ lla billin' Jerusalenna' jaye'lawaa Chioza', na' shi cheenilo' gakiyilo'n, wak in̄abo' kwen̄che x̄enlalloo ka nakannan'. ¹²Na' kono ble'i nad' chakdīl̄-len' ben' wa chbekw' wdil̄ wishesh ladj ben', ni loo yoodo'na' ni gan yobl̄a ga chdop chllagnto' choe'l̄willnto' Chioza' ni gachli yella'. ¹³Na' ka nak diiki na ben'ki cha', ni ton bi gongake' gan in̄agake' ka nakannan'. ¹⁴Lete to dii w̄heb' lawo'ni choe'lawaa Chioza', beena' be'la'o dii x̄ozxto'nto'ka', kon ka nak nez li nez shao' che Jesucrístona' daa yo'a, daa na ben'ki bi zejan shli. Per chajli'a yog' daa na ley che Chioza' na' diika' bzej dii ben'ka' wdixjee daa golle' legake'. ¹⁵Na' ka ben'ki chao xya cha' na' ka nad', toz ka nonnto' lez

yisban Chioza' ben' wetka', ka ben' wen ka ben' mal. ¹⁶Daan chon' byen yixi yiyech yichjlall'dawaani, la' cheenid' bibi dol' gap' lao Chioza' ni lao ben' yell-lioni.

¹⁷'Ba gok zan yiz chda' yell zit'ka', na' billin' Jerusalénna' kwenche wi'a mech dii gaklenen ben' wlall cha'ka' na' lekzka' wi'a bi dii wi'a yoodo'na'. ¹⁸Na' diikin chon' ka biyoll bixi biyech' kon ka na leya', kat' to chop ben' Israel, ben' zaak Ásiana', ble'gakile' nad' yoodo'na'. Aga no ben' ntop nshag' na' ni to wdil wishesh bi mbek'. ¹⁹Legaken' chiyal' yidgake' ni gaogake' xya cha' shi bin ble'gakile' chon'. ²⁰Wa ben'ki zoa ni, inashkigake' shi bi dii mal billelgakile' cha' kana' jwa'gake' nad' lao ben' wñabia' chento'ka'. ²¹¿Awa shi daa besyaa goshgakee: "Chaozle xya cha' daa chajli'a wllin lla yiban ben' wetka'?"

²²Na' ka biyoll beni Félix'a wna Páblona' ka', na' bsane' bich bene' yell' joschis che'na', la' ba wñezile' nakan nak diika' chajle' ben'ka' yoo lo nez li nez shao' che Jesucristona'. Na' golle' ben'ka':

—Kat' yid Lísiaza', beena' chñabia' soldadka', kana' inezyen'id' nakran nak dga chak chele.

²³Na'ch Félix'a golle' xan soldadka' wseje' Páblona', per bi wllone' sho' ben'ka' nombia' le' na' llje'gake'ne' bi dii chyalljile'.

²⁴Na' ka wde chop shon lla, bizllinlen Félix'a xoole'na' le Drusila, to nool Israel. Na'ch ben Félix'a mandad bllin Páblona' lawe'ka' kwenche wzenaggake' dillaa daa cho'e daa ne' chiyal' gonlilall'cho Jesucristona'. ²⁵Na'ch be' Páblona' dill' chi'e chiyal' goncho byen goncho wen na' bi goncho daa nazan checho, la' wllin lla yizi' Chioza' kwent che to tocho. Na' ka beni Félix'a xtilleena', le bllibe'. Na'ch golle' Páblona':

—Ba gokz to kat', na' kat' gat' latj cha'na' inia' li' dii yoblə.

²⁶Félix'a lekzka' goklallee we' Páblona' le' mech kwenche yisane'ne'. Daan zekizezi wñie'ne' kwenche be'lene'ne' dill'. ²⁷Ka'z wde chop yiz, na' ka bichej Félix'a bich wñabi'e na' wyoo to ben' yoblə lie' Porcio Festo. Na' kwenche ile'shii ben' Israelka' Félix'a, bi bisane' Páblona'.

Páblona' bi'e dill' lao Féstona'

25

¹Na'ch ka bllin Féstona' Cesareana' kwenche inabi'e, na' wzoe' shon lla. Na'tech wzee wyaje' Jerusalénna'.

2Na' b̄xozka' ch̄n̄abia' na' nochl̄ə b̄n̄'ka' ch̄n̄abia' b̄n̄' Israelka' ka w̄n̄ezgakile' ba blline' Jerusal̄enna', na'ch jtaogake' xya ch̄e Páblona' lawe'na'. 3Na' w̄n̄abgakile'ne' gone' to goklen yiselee Páblona' Jerusal̄enna' kwen̄che gak yel' jos̄chis ch̄e'na'. Gollgake'ne' ka' daa goklall'gake' witgake'ne' tneza'. 4Per goll Féstona' legake':

—Cesareana'zkz̄ə yigaan̄ Páblona', na' aga chllach yiyaa na'l̄ə.

5Na' golle' legake':

—B̄n̄'ka' ch̄n̄abia' le' chiya'l' sa'lengake' nad' Cesareana' kwen̄che gaole xya shi bi dii malan bene'.

6Na' ka do zi ga shi lla wzoa Féstona' Jerusal̄enna', na' bizee ziyaje' Cesareana'. Na' betiyo wchi'e gana' gone' yel' jos̄chisa' na' bene' mandad j̄xi'gake' Páblona'. 7Na' ka wyoo Páblona' gana' chi' Féstona' lii wbig'te b̄n̄' Israelka' zaak Jerusal̄enna' chaogake' xya ch̄e', che'gake' dii zan dii mal ba bene', per na' ni to daa wdaogake' xya ch̄e' bi bengake' gan ye'gake' ka nakannan'.

8Na'ch Páblona' bzoa rson ch̄e', chi'e legake':

—Nad' ni tl̄ish' dii mal b̄n̄' gon', ni b̄n̄' ch̄ishj' ley ch̄ento'na' neto' b̄n̄' Israel, ni b̄n̄' wn̄it' balaan̄ ch̄e yoodo' ch̄ento'na', ni bigan' in̄ia' zban ch̄e Césara' beena' ch̄n̄abia'.

9Na' daa goklall' Féstona' ile'shii b̄n̄' Israelka' le', na' chi'e Páblona':

—¿Acheenilo' yiyajo' Jerusal̄enna' kwen̄che gon' yel' jos̄chis cho'na' na'l̄ə?

10Na' Páblona' chi'ene':

—Ba zia' lawo'ni, na' b̄n̄' w̄n̄abia' Césara' ba nzoe' li' ni kwen̄che gono' yel' jos̄chis, na' nin chiya'l' gak yel' jos̄chis cha'na'. N̄ezkzilo' aga bi ben' ch̄e b̄n̄' wlall̄ cha'ki. 11Shi ba ben' dii chon ka chidoḷaa guet', wakkz̄ə guet'. Per shi bibi ben' ch̄e b̄n̄'ki chao xya cha', kono gak gon nad' lo na'gake'. Na' ch̄n̄ab' wdio' nad' lao b̄n̄' w̄n̄abia' Césara' kwen̄che kwine' gone' yel' jos̄chis cha'na'.

12Na'ch Féstona', ka wde be'lene' dill' b̄n̄'ka' chaklen le' chone' yel' jos̄chisa', na'ch chi'e Páblona':

—Ba w̄n̄abo' tio' lao b̄n̄' w̄n̄abia' Césara' kwen̄che gone' yel' jos̄chis cho'na', na' wseḷaa li' lawe'na'.

Páblona' bi'e dill' lao beṇ' wṇabia' Agrípana'

13Na' gok chop shon̄ lla na'ch bllin beṇ' wṇabia' Agrípana' len Berenícena' yell Cesareana' jawapgake' Féstona' chiox. 14Na' daa wzoagake' Cesareana' zan lla, Féstona' be'lene' Agrípana' dill' ka nak daa chak che Páblona', na' golle'ne':

—Ni nej to beṇ' bi ben Félixa' yeṇ' joschis che'na'. 15Ka wya' Jerusalénna', beṇ' wṇabia' che b̄xozka' na' beṇ' golka' chṇabia' beṇ' Israelka' wdaogake' xya che' lawa'na', goklall'gake' wchogbi'a guete'. 16Na' gosh'gakee ka choncho cho' beṇ' Roma, aga lii wchogbia'tezcho guet to beṇ' shi bi sie' wzoa rson che' lao beṇ'ka' chao xya che'. 17Daan, ka bid beṇ'ka' bidtao xya che', bi bshe'ida'n, san betiyoz lii bentia' wṇeyi j̄xi'gake'ne' kwenche gon' yeṇ' joschis che'na'. 18Na' beṇ'ka' bidtao xya che', ni tlish' diika' wza'lallaa bene' bi wṇagake'. 19Daa zeelo nagake' che', nlla'lə chajli'e che Chioza' na' chde' cho'e dill' che to beṇ' wle Jesús, beena' ba wit, na' le' ne' mbankze'. 20Na' daa bi nezid' nak gon' yeṇ' joschis che beṇ'ki, wṇabid' le' shi cheenile' yiza'lene' nad' Jerusalénna' kwenche gak yeṇ' joschis che'na' na'. 21Per Páblona' wṇabe' tie' lao César Augústona' kwenche gone' yeṇ' joschis che'na', na' ben' mandad shejze' axt kat'ch gak wseṇaane' Rómana'.

22Na'ch Agrípana' golle' Féstona':

—Lekzka' cheenid' wzenag' ka dillaa cho'e.

Na' Féstona' chi'ene':

—Wxete wzenago'n, shka'.

23Na' betiyo bllin Agrípana' lega beṇ' zakii, len Berenícena' na' len baḷ beṇ'ka' chṇabia'gake' soldadka', na' beṇ'ka' mbejlawin yella'. Na'ch Féstona' bselee beṇ' j̄xi'gake' Páblona'. 24Na' wṇe Féstona', chi'e:

—Li' beṇ' wṇabia' Agrípana', na' yog'le le' lle'le ni, ka nak beeni ze ni, yog' beṇ' Israelka', ka beṇ' lle' Jerusalénna' na' ka beṇ' lle' Cesareani, chaogake' xya che', na' chongake' byen chogbi'a guete'. 25Na' nad' chakbe'id' aga bi dii mal ba ben beeni kwenche chogbi'a guete'. Na' kwine' ba wṇabe' tie' lao César Augústona' kwenche gone' yeṇ' joschis che'na', na' ba bcheb' wdia'ne' na'lə. 26Per bi chillelid' bin ben Pábloni kwenche wzej' Césara' yepée bin bene'. Daan ba nzia'ne' laoleni na' lawo'niyen'kzə li', beṇ'

wṇabia' Agripa, kwenche inabyollichone' bin bene', na' ka' wllia' lee yisha'. ²⁷La' chakid' bi nakan wen wselaa to ben' lawe'na' kwenche wchogloe' che' na' bi nzej' bin bene'.

Páblona' bzoe' rson che' lao Agrípana'

26 ¹Na' Agrípana' golle' Páblona':
—Bzoashki rson cho'na' naa.

Na'ch Páblona' blis neena' na' wzoloe' bi'e dillaa, chi'e:

²—Li' ben' wṇabia' Agripa, mbalaz wal chakid' daa gak wzoa rson cha'ni lawo'ni che yog' diika' chao ben' Israelka' xya cha'. ³La' nezczilo' ka yoolo neto' ben' Israel chonnto', na' lezkza' che dii chix chento'ka'. Daan chṇab' gapgacho' yel' chxenlall' na' wzenaggacho' ka nak dga inia' li' naa.

⁴Yog'lol' ben' Israelka' nezgakile' ka bsa' cha' ladje'ka', ka yell cha'na' gana' bgol' na' ka Jerusalénna'. ⁵Na' lezkza' nezgakile' toshiizi nak' toz fariseoka', ben'ka' chzenagchgake' che ley che dii Moiséza' aga ka nochlā ben' yoblā. Na' wak yizi' cho'agake'n shi gueengakile'. ⁶Na' naa chaogake' xya cha' daa non' lez wllin lla gon Chioza' ka bchebe' lao dii xozxto'nto'ka'. ⁷Na' neto' naknto' shllin kwente dia che dii Israela', nonnto' lez gon Chioza' daa bchebe' gak, na' daan choe'la'onto' Chioza' ka tella ka wal. Na' daa non' lez gak daa bcheb Chioza', daan chao ben' Israelki xya cha', li' ben' wṇabia'. ⁸¿Berache bi chajle'le wak yisban Chioza' ben' wetka'?

Páblona' bi'e dill' ka bsak'zi'e ben'ka' nonlilall' Jesúza'

⁹Lezkza' nad' gokid' chiyal' wsak'zi'a ben'ka' nonlilall' Jesús, ben' Nazareta'. ¹⁰Na' ka' ben' Jerusalénna'. Na' bxoza' chṇabia' bengake' lsens wlo'a lillyana' ben'ka' nonlilall' Jesúza', na' ka betgake' legake' lezkza' len' chakid' kan' chiyal' gak. ¹¹Zan shii wya' gana' chdop chllagnto' choe'lwillnto' Chioza' na' biya dii benid' legake' kwenche inegake' zban che Jesucristona'. Na' le bllaachga' legake', ax̄t yell zit'ka' wya' jasak'zi'gakee.

Sto shii be' Páblona' dill' ka gok blla' yichjlall'do'ena'

(Hch. 9:1-19; 22:6-16)

¹²Na' lezkza' nan lljenid' ben'ka' nonlilall' Jesúza' yell

Damáscona', na' b̄xozka' ch̄nabia' bsel'gake' nad' na' bengake' lsens lljasak'zi'gakee. ¹³Na' ki gok cha', li' ben' w̄nabia'. Ka zyaa ngwaa neza', do ka gobill ble'id' to yi' wal dii za' yabana' dii chzeeni'ch aga ka wbillā', na' wyechjan nad' len ben'ka' zyaalen'. ¹⁴Yog'tento' wzoatishnto' lo yona', na'ch nad' benid' shii to ben' w̄nie' nad' dill' hebreo, ne': "Saulo, Saulo, ¿berache ch̄chi' chsak'zo' nad'? Daa chono' ka', zi' che kwinzon' chono' na' chak cho' ka chak che goona' chilibb xisa' daa chbibe'b kwenche sa'b." ¹⁵Na'ch wnia', chepee: "¿Nora li', ben'?" Na' wne': "Nadaan Jesúza', beena' ch̄chi' chsakoo. ¹⁶Na' naa biyas. Ba bli'law' li' kwenche gono' ka cheenid' na' kwenche wi'o dill' che dga chen chle'ilo' naa na' cheyi diika' zi' wliid' li'. ¹⁷Na' wselāa li' gana' lle' ben'ka' bi nak ben' Israel, na' gaklen' li' kwenche ni legake' na' ni ben' Israelka' bi witgake' li'. ¹⁸Na' wselāa li' kwenche lljali' lljasedilo' legake' kwenche sho' beeni' cha'na' loo yichjlall'do'eka' na' bich tagake' lo yel chola'. Gono' ka bich inabia' Satanáza' legake', san gonlilall'gake' Chioza' na' gonlilall'tegake' nad' na' yizi'xen' xtoleeka'. Na' lengake' ikaagake' daa we' Chioza' ben'ka' nak lall' nee."

¹⁹Kan' gok cha', li' ben' w̄nabia' Agripa, na'chan bzenag' daa wna Jesúza' ka bli'lawe' nad'. ²⁰Na' zigaate ben' Damáscoka' bli' bsdid' cho'a xtill' Jesucristona', na'tech ben' Jerusalénka', na' ben' lle' doxen yell-lío Judeana', na' lekzka' ben'ka' bi nak ben' Israel. Gosh'gake' chiyal' yiyaj yileni che xtoleeka' na' wzenaggake' che Chioza', na' gongake' ka gakbe'i ben' nan ba biyaj bilengakile'. ²¹Na' ni cheyi diikin, bex' ben' wlall' cha'ka' nad' yoodo'na' na' nan witgake' nad'. ²²Per Chioza' chaklene' nad' kwenche choe'ch' xtilleena' lao ben' axt naanlla, ka lao ben' zakii na' ka lao ben' bi zakii. Na' kon ka wnakz dii Moiséza' gak na' ka wnakzə dii ben'ka' wdixjee daa goll Chioza' legake' kani'yi, kon kakzan nia', aga bichlə dii yoblan nia'. ²³La' legake' wnagake' Chioza' nllie' bia' Crístona', beena' wselee, yiya dii yen ile'ile' na' witgake'ne', na' len' gake' ben' necha' yibane' ladj ben' wetka', na' chixje'ile' ben' Israelka' na' ben'ka' bi nak ben' Israel nakan chiyal' gongake' kwenche sho' beeni' che'na' loo yichjlall'do'eka'.

Páblona' goklallee gonlilall' Agrípana' Jesúza'

24Na' shlak Páblona' chzoa rson che'na', besyaa Féstona', chi'ene':

—¡Chaktonto'n, Pablo! Daa zi'telə chsedo' ba chontontin li'.

25Na' Páblona' chi'ene':

—Aga chaktonta'n, ben'do', san dill' lin cho'a, na' nakan dii shajle'cho. 26Na' ben' wñabia' Agrípani ñezile' che yog' diiki nia' le', daan chiyaxjid' cho'a dill' lawe'ni. Aga inacho bi ñezile' diika' gok, la' ga lle' lla' beñaan gokan. 27Na' li', ben' wñabia' Agrípana, ¿achajli'o cho'a xtill' Chioza' daa bzej dii ben'ka' wdixjee daa golle' legake' kani'yi? Nad' ñezid' chajli'o.

28Na'ch Agrípana' chi'e Páblona':

—¿Achakilo' xtitz wshaljleno' nad' cho'a xtill' Jesúza' na' gonlilallaane'?

29Na'ch Páblona' chi'ene':

—La' xtitzə wa la' ssha wshaljlen' li', Chioza' wi'e latj aga tozo' li' shajli'o san yog' ben'ki lle' ni chengakile' dillii cho'a shajle'gake' ka ba wyajli'a nad', per aga nia' wñejgake' legake' gden ka nñejgake' nad'.

30Na' ka biyoll wna Páblona' ka', na'ch bizolla' Agrípana' na' Berenícena' len Féstona' na' yog' ben'ka' wche'lengake'. 31Na'ch bichejgake' gana' lle'gake' na' be'gake' dill', che' ljwelle':

—Aga bi ben beeni kwenche chogbi'a guete' ni bi chiyal' gatee lillyana'.

32Na'ch Agrípana' golle' Féstona':

—Wak yislacho beeni shel'ka' ki ba wñabe' tie' lao ben' wñabia' Césara' kwenche gone' ye' joschis che'na'.

Bsel'gake' Páblona' yell Rómána'

27 1Na'ch ka bñoglall'gake' wsel'gake' neto' Itáliana' loo barkwlə, bengake' Páblona' kon sto chop pres yoblə lo na' beena' le Julio, nake' xan to guiyoa soldadka' ben'ka' nzi' soldad che beena' chñabia' Rómána'. 2Na'ch wyoonto' to loo barkw dii za' yell Adramítiona' na' zejan Ásiana'. Na' wza'len to ben' le Aristarco neto'. Nake' ben' Tesalónica, daa lliá gana' mbani Macedóniana'. 3Na' betiyo bllinnto' yell Sidónna',

na' Júliona' le wen benile' Páblona' na' bi'e latj jawie' ben'ka' nombi'e yella' kwenche be'gake'ne' bi dii byalljile'. ⁴Na' ka biza'nto' Sidonna' na' wdeteznto' yichjlə yell-lío Chíprena' daa llia lo nisdona' kwenche bkweejan neto' daa le ze be'na'. ⁵Na' wdetento' lo nisdona' daa de tcho'a yell-lío gana' mbani Cilíciana' na' Panfíliana', na' bllinnto' cho'a yell Mírana', daa llia gana' mbani Líciana'.

⁶Na' yell Mírana' xan soldadka' bllelile' to barkw dii za' Alejandríana' na' zejan Itáliana', na' bidie' neto' lo'inna'. ⁷Na' zan lla wyajlennto' barkwa' sho'lall'zə, na' kani bllinnto' cho'a yell Gnídona'. Na' daa ze be'na' klelə, na' wyechjnto' yell-lío Crétana' daa llia lo nisdona', wdeteznto' cho'a yell Salmónna'. ⁸Na' kani gok zejnto' tcho'a nisdona' ax̄t ni bllintento' gana' le Buenos Puertos, gaozə yell Laseana'.

⁹Zan llate ba wllainto' na' ba chonan dii nxoll shajchnto' lo nisdona' daa ba zoa yilen dii zaga'. Na' goll Páblona' legake':

10—Chakbe'id' shi shajchcho nxoll kwiayi' barkwi na' kwiayi'te yoa'na' nsa'n, na' aga toz diiki san lenkzcho le nxoll kwiayi'cho.

¹¹Per na' xan soldadka', bzenagche' che beena' chsa' barkwa' na' che xaninna', na' bi bzenague' daa goll Páblona' legake'. ¹²Na' daa bi nak latja' wen yigaan̄nto' na'z shlak chi' dii zaga', zangake' bchoglall'gake' shajchnto' kwenche illinnto' yell Fenícena' gana' yigaan̄nto' shlak te dii zaga'. Nakan to latj ga mbani Crétana', gana' choo barkwka', na' bitek choon be'na' daa za' cha'lə ni daa za' lli'lə.

Wze to be' wal lo nisdona'

¹³Na'ch wzolo ze to be'les dii za' lli'lə, na' ben'ka' chsa' barkwa' gokgakile' wakkzə shajgake'. Na'ch wdegake' tcho'azi yell-lío che Crétana' daa llia lo nisdona'. ¹⁴Ka gok shloll, wzolo to be' wal dii za' cha'lə. ¹⁵Na'ch wzolon chlligaan barkwa' na' bikzə bi gok gonnto', na' bsanlall'choklənto'n nllig' be'na' len. ¹⁶Na' ka wdento' gaozə to yell-liodo' le Clauda daa llia lo nisdona', na' bich zetek be'na'. Na'ch barkwdo'na' ngoyo barkw xenna' bilepnto'n loo barkw xenna', per kani gokan. ¹⁷Na' ka biyoll bilepnto'n, na'ch bchejgake' barkw xenna' rietka' kwenche

goklenan daa. Na' daa bllebgage' ljshia barkwa' lo yoxa' latja' le Sirte, na' bitobgage' lech'ka' daa chonan ka chza' barkwa' na' be'gage' latj bllig' be'na' barkwa' kwenche shajan kon ga wlliga'n len. ¹⁸Na' betiyo, daa zizikli wzech be'na', na' wzologake' bsheshgage' yoa'na' nsa' barkwa' na' bzal'gage'n loo nisdona' kwenche bichtek gok barkwa' zii. ¹⁹Na' ka gok shon lla, axt len xshinlaz barkwa' bzal'nto' loo nisdona'. ²⁰Na' zan lla bi bli'lao wbillla' ni beljka', na' daa zechga be'na', bich bennto' lez yilanto'.

²¹Na' ka ba gok zan lla bin' gaonto', na'ch Páblona' wzie' ladj ben'ka' na' chi'e legake':

—Shel' bzenagle cha' kana' zoacho Crétana', ka wnia' le' bich shajcho, aga bi bnitcho ni bi zoacho dii nxoll, shel'ka'. ²²Na' naa bikzə gonchoplall'zle, la' ni tole bi guet. Toz barkwi kwiayi'. ²³La' daa nle'yi Chios cha'na' beena' chonlilallaa bselee to anjl bli'lawe' nad'. ²⁴Na' anjla' wne' nad': “Bi illebo' Pablo. Chonan byen illino' lao ben' wñabia' Césara', na' ni cho' li' yiyesh'lallii Chioza' yog' ben'ka' zejleno' txen loo barkwi na' bi guetgage'.” ²⁵Na' naa, li wtiplall'le, la' nxenilallaa Chioza' na' nezyenid' kon ka wna anjla' nad' kayen'nan gak. ²⁶Per chonan byen wwiacho naklə goncho kwenche yichoonan cho' to lo yell-liodo' dii llia lo nisdoni.

²⁷Na' ba gok shda' wbill ka bllinnto' gana' de Nisdo' Adriáticoná', na' ni chllig' be'na' barkwa' to ki to ka'lə lo nisdona'. Na' ka bllin chel, ben'ka' chsa' barkwa' gokbe'gakile' ba chllinnto' gana' de yo billa'. ²⁸Na'ch bletjgage' to ya kwenche bchixgage' ka'k' zitj nisa', na' ka bchixgage'n zitjan shin'toyichoa metr. Na'ch ka wza'n zilat' na'ch bizchixgage'n dii yoblə na' zitjan gallichoa metr. ²⁹Na' daa bllebgage' ljsho' barkwa' lee yajka', bletjgage' tap ya xen dii llia xoziiin kwenche kwe' barkwa' tozga, shel' wxegakile' lii sheeni'te. ³⁰Na' ben'ka' chsa' barkwa' gokgakile' yixonjgage'. Na'ch wzologake' chletjgage' barkwdo'na' daa yoo loo barkw xenna', chontezgage' ka chletj sto ya xen che barkwa'. ³¹Na'ch Páblona' golle' xan soldadka' na' soldad che'ka':

—Shi ben'ki bich yigaangake' loo barkwi, aga wilalat'le shi naa.

³²Na'ch soldadka' bhoggake' rietka' daa nchej barkwdo'na' na' bxopan loo nisa'.

33Na' ka ba zoa sheeni' Páblona' golle' legake':

—Li gaolat'. Ba gok shda' wbill bi chaole daa chall chlleble.

34Na' nia' chonan byen gaolat'le kwenche yiyakshao'lall'le, la' ni tole bi kwiayi'.

35Na' ka biyoll wna Páblona' ka', na' bexee to yetxtil na' bi'e Chioza' yel' choxken lao ben'ka' lene' na' bxoxje'n na' wzoloe' chawe'. 36Na' ka ble'gakile' chawe', na'ch yoguee bendiplall'gake' wdaogake'. 37Yog'lol' neto' yoonto' loo barkwa' naknto' chop guiyoa guiyonshin'to. 38Na' ka beljgakile', na'ch bzal'gake' trígona' daa nsa' barkwa' loo nisa' kwenche bich goktek barkwa' zii.

Wche' barkwa' yel

39Na' ka wyeeni', ben'ka' chsa' barkwa' aga biyombia'gake' yell-liona', per ble'gakile' to ladj lchi ga choo xoz' nisa' gana' gogkakile' wak sho' barkw che'ka'. Na' bhogllall'gake' lljlekwwake'n lo yoxa'. 40Na' bhoggake' riet che ya xenka' daa chzagaan barkwa' na' wchoonlall'gake'n loo nisa'. Na'ch bisellgake' yaga' daa chaklanan chzechj chlliin barkwa', na' bizeshgake' lechaa daa ze yichjinna' kwenche bllig' be'na'n, na' wzolo barkwa' zjabigaan cho'a nisa'. 41Na' jshia xin' barkwa' to ga zoayaa yoxa' loo nisdona' na' gogaan, na' aga gokch yichejan. Na'ch bli che nisdona' wzolon bxoxj btinan xan barkwa'. 42Na'ch soldadka' nan witgake' preska' kwenche ni toe' bi xoa yela' lo nisa' na' yixonjgake'. 43Per xane'ka' bi bi'e latj witgake' legake' daa goklallee yisle' Páblona'. Na' bene' mandad zigaate ben'ka' chak xoa yela' wxit'gake' loo nisa' kwenche yillingake' lo yo billa', 44na' ben'ka' bi chak xoagake' yela' wchingake' yagla'ka' wa diika' ba goxj che barkwa' kwenche gak yillingake' lo yona'. Na' ka' bennton', na' yog'lolnto' billinnto' shi'a shao' lo yo billa'.

Páblona' wzoe' Máltana'

28 1Na' ka biyoll billin yog'nto' shi'a shao' lo yo billa', na' wnezinto' yell-liona' len Malta. 2Na' ben'ka' lle' na' le wen bengakile' neto', na' daa chak zag na' leyi chakte yeja', bxengake' yi'na' xen na'ch goxgake' yog'nto' kwenche bishaanto'. 3Na'ch Páblona' btope' xonj xis bill, na' ka bzaleen lo yi'na' bichej

to be_l ladjinna' na' wdinyaab neena'. ⁴Na' ka ble'i be_n' Máltaka' na_l' be_la' na' Páblona', na'ch che' ljwelle':

—Be_n' wen xyalja beeni. La'kzi bile' lo nisdona', Chioza' aga wi'e latj ibane'.


⁵Na'ch Páblona' wllib neena' kwenche bxop be_la' lo yi'na', na' aga bi gokile'. ⁶Na' yoggake' chbezgake' sa' neena' yina', wa tokonganzi yillie' na' guete'. Na' ka ba gok ssha chbezgake' na' ble'gakile' bibi chakile', na'ch wzolo nagake':

—Chioslja beeni.

⁷Na' gaozə gana' bllinnto' de yell-lio che beena' chnabia' doxen gana' mbani Máltana', na' lie' Publio. Na' blebe' neto' lille'na' na' wzoalennto'ne' shon lla na' benshi'e neto'. ⁸Na' xa Públiona' die' yo'e dii la na' chaktie' besa'. Na'ch wyaj Páblona' jawie'ne', na' ka biyoll be'lwille' Chioza' bxoə neena' yichje'na' na' biyakile'. ⁹Na' ka wnezi be_n' Máltaka' daa ben Páblona', na'ch wyaj yog' be_n'ka' bi shao' lawe'na' na' biyakgakile'. ¹⁰Na' be_n'ka' le benshiigake' neto', na' ka biza'nto', dii zan dii bengake' neto', diika' iyalljinto'.

Ka bllin Páblona' Rómána'

¹¹Shon beo' wzoanto' Máltana'. Na' ka biza'nto' biyoonto' to loo barkw dii bchej Alejandríana' daa lekzka' bigaanān Máltana' shlak wde dii zaga'. Na' xin' barkwa' da' chop lwaa lsak' chios che be_n' griegoka', be_n'ka' le Cástor na' Pólux. ¹²Na' ka bllinnto' yell Siracúsana', na' wzoanto' shonə lla. ¹³Na' bizza'nto' Siracúsana' bllintento' yell Régiona'. Na' betiyo wzolo chak be'na' daa za' lli'lə na'ch gok wza'chnto', na' bichop lla bllinnto' yell Puteólina' gana' bichejnto' loo barkwa'. ¹⁴Na' Puteólina' billagnto' ba_l be_n'ka' nak neto' txen chonlilall'nto' Jesúsza', na' wñabigake' neto' yigaanlennto' legake' to xman. Na' ka wde xmanna', na'ch biza'nto' zejnto' Rómána'. ¹⁵Na' be_n' Rómaka' nonlilall' Jesúsza', ka wñezgakile' ba zoa illinnto', na'ch wyajgake' jlezgake' neto' yella' le Apio, gana' chak yaana', na' gana' le Shon Yoo Ga Chigaan Be_n'. Na' ka ble'i Páblona' legake', bi'e ye_l' choxken Chioza' na' biyondiplatee. ¹⁶Na' ka bllinnto' Rómána', xan soldadka' bene' preska' lall' na' beena' chnabia' soldadka' zoa na', san Páblona', bi'e latj wzoe' chele', na' toz soldada' wdape'ne'.



Ki gok yooka' wzoa yell Rómána'.

Páblona' bi'e xtill' Jesúza' Rómána'

17 Na' ka gok shoñ lla zoa Páblona' na', na'ch goxe' beñ' Israelka' zakii, beñ'ka' lle' Rómána'. Na' ka bdopgake' na' golle' legake':

—Le' beñ' bish', shlak wzoa' Jerusalénna' beñ' wlall chechoka' lle' na' beñ'gake' nad' na' bengake' nad' lo na' beñ' Rómaki la'kzi aga bi beñ' chegake' na' bin' chishj' diika' wna dii xozxto'choka' chiya' goncho. 18 Na' biyoll wñabyollgakile' nad' bin beñ', beñ' wñabia'ka' goklall'gake' wsangake' nad', la' aga bi beñ' kwenche wchogbia'gake' guet'. 19 Per beñ' wlall chechoka' lle' Jerusalénna' aga be'gake' latj yisangake' nad'. Na' benan byen wñab' tia' lao beñ' wñabia' Césara' kwenche gone' ye' joschis cha'na'. Per aga gaw' xya daa beñ' wlall chechoka' cha'. 20 Na' ni cheyi dga chak chan' ba gox' le' kwenche ile'id' le' na' we'len' le' dill'. La' ni cheyi daa noncho lez, cho' beñ' Israelan, nchejgake' nad' gdenki.

21 Na'ch che'gake' Páblona':

—Aga bin' yish ila' laonto'ni dii za' Judeana' dii we'n dill' cho'. Na' ni to beñ' wlall chechoka' bin' ila' biz gon inagake' cho'. 22 Na' cheeninto' wzenagnto' bi dillaan wi'o, la' nezinto' doxenz chnegake' zban che beñ'ka' nakgake' txen dii koba' chliile.

23 Na'ch bzoagake' to lla kwenche idopgake'. Na' ka bllin llana' bliagake' bia', beñ' zan bdop gana' zoa Páblona'. Na' be'lene' legake' dill' do lla, bzajniile' legake' che ye' wñabia' che Chioza'.

Na' bene' to dii byen kwenche shajle' ben'ka' che Jesúza'. Bzajniile' legake' diika' nyoj che Jesúza' lee ley che dii Moiséza' na' diika' bzej dii ben'ka' wdixjee daa goll Chioza' legake'. ²⁴Na' bale' wyajle'gake' diika' goll Páblona' legake', na' zi bale' bi wyajle'. ²⁵Na' daa bi gok toz xtilleeka', na' wzolo chilleshgake'. Ka gokbe'i Páblona' ba chilleshgake', stoz dga golle' legake':

—Shlichakzan goll Espíritu Sántona' dii Isaíaza', daa bi'e dill' lao dii xozxto'choka' chi'e legake':

²⁶Wyaj na' jellsha ben' Israelka':

La'kzi wzenagle bi shajni'kzile

Na' la'kzi chle'teile bi gakbe'kzile bin zejín.

²⁷Bikzə bi rson chazle, daa naklikzle lall'do' wal,

na' chonle ka kwell lchol,

ni bi cheenile wzenagle,

ni bi cheenile ile'ile,

na' ni bi cheenile shajniile

kwenche yiyaj yilenile

na' gon' ka yiyakshao' yichjlall'do'lena'.

²⁸Chiya! inezile Chioza' ba ngwee xnezi yisle' ben'ka' bi nak ben' Israel kwenche bi kwiayi'gake', na' lelgake' wlebgake' cho'a xtilleena'.

²⁹Ka biyoll goll Páblona' legake' ka', na'ch ziyajgake' chakdi-len ljjwllgake'.

³⁰Chop yizyen' bigaan Páblona' yooná' gana' wdixje', na' blebe' nottezə ben' jawia le'. ³¹Na' aga no bsej bllon bzajni Páblona' ben'ka' nakan nak yel' wñabia' che Chioza' na' bli' bsedile' ben' cho'a xtill' Xancho Jesucristona'.